


KULOMBODIIBWA

 Twasàkidila, Mwanèètù Williams. Ndi nsekelelaku, Mwanèètù Salano ne mukàjèndè, ne batumiibwe bônso bàdi mwab'ewu mu didyà dyà mikùkùku edi dilòòlò edi. Ncyà bushùwà ne ndyèsè dinènè dyà kwikala kaaba aka. Mwva ànu mwindile dîbà edi kacya ànu kwônso kutùbangilè aku.

² Nènkù ndi—ndi muswe kwela inábànzà awu twasàkidila, ncicyèna mwà kuvùluka dîná dyèndè to, Billy ngùcifuma kudingambila ne, nguvwa mumpèèshe kàbòmbì kàà mbòmbò yà Noël, nènkù ucifuma ànu ku dilwa naayi ku màshinyi mu katanci kakesè emu. Mwanèètù wa bakàji awu, ncicyèna mwà kuvùluka dîná dyèndè to, ngwa muneemu mu Californie emu. Ki civwa àànyì matapishì à Noël à kumpàla. Pa nànkù ndi—ndi nkwele twasàkidila bwà bwalu abu.

³ Mpindyewu, dilòòlò edi kùdi . . . Mpindyewu mu Tucson tudi dîbà citèemà ne tusunsa dikumi, kàdi ndi ngeela meeji ne tucidi tusunsa dikumi paanyimà pàà dîbà mwandamukùlù muneemu. Nànkù twètù . . . Ntu ne njiya kampànda munkaci mwà bantu, ntu bu muyiishi wa kàyi ùma mukana's, pa nànkù ndi—ndi ntèkemena ne . . . [Disangisha didi dituuta bikashi—Muf.] Twasàkidilaayi. Muntu bu . . . bantu bàà maalu mimpè muneemu emu. Ndi nkwela twasàkidila.

⁴ Kàdi ndi—ndi muiishe mupicisha, ndyùmvwaku mwamba kupùmùka yònsò, dilòòlò edi, ndi mubangile kule be kuumukila ku—ku Shreveport ne mu ditunga dijimà (ngenda ndwa nùnkù ewu) dilòòlò ne dilòòlò dyònsò, nènkù udi udyumvwa ànu munyùkùshibwe ndambù—ndambù, nudi bamanye's, ne cimpumpu, eku pa muminu pàsaama. Ndi mubangile ku Shreveport. Mèmè kujimija nsuki yàànyì pàmvwà . . . kukaadi ndambù wa bidimu. Nènkù mvwa ne kantu kakesè kàmvwa mvwala ku mutù pàndi nyiisha ku nseke yà ku nord, bwà kwepuka cimpumpu. Mèmè kuya ku Shreveport kadi kukàpwa mwoyi, ki mèmè kupeta cimpumpu cyà menemene's. Lupeepèlè lùlwa eku mùshindù ewu, mu bushùwà bwà bwalu kuyi ubyùmvwa to. Mmituuke ku mpuukapuuka, ne dikòbà diciikale dinèfuke, nènkù ne kaadikòpakana kakesè dyàkamwe muminu wàkidila; kukèngelabi bwà mèmè kwimanyika masangisha àbùngì. Pa nànkù dilòòlò edi dîyi dimpàte ndambù's.

⁵ Tudi baswe kwamba ne tudi bapicile mu cikondo cilenga cyà dikema mu dilwa mwab'ewu, nànsha nànkù, mu masangisha. Makèlèlèlè dilòòlò tuvwa bapicile mu cikondo cilenga cyà dikema mu . . . ne bàna bèètù, kuulu kwàka, mu dyàpa dikwabo adi. Nànkù awu tuvwa ne cisumbù cinène kuntwaku ne batèeleji bàà dikema, bantu bàà kaneemu kàà menemene ne maalu mimpè.

Pa nàнку bîdi byenza ne ndyũmvwè bĩmpè menemene bwà kwikala citùpà cyà Beena Kantu-ku-byanza bàà Èvànjeeliyò mu Kaabujimà. Kukaadi . . .

⁶ Ndi ne Mukenji, mũndi ndyumvwa, wà kùdi Nzambi. Ncintu cyà pabwàci ndambù bwà bamwè bantu. Nènku ncyèna ne cĩndi mwà kwenza bwà kutamba kwikala . . . Bikèngela ngiikale ànu cĩndi aci. Nènku tudi . . . Ncyèna ne meeji à kwikala mushiilàngàne ne bakwabo to, bîdi ànu ne ndi—ndi ne mwoyi mu dishintuluka dyà cikondo. Tudi . . .

⁷ Paùdi ànu munkaci mwà kwibaka cimanu cilulàme, byònsò mbĩmpè, ba—batenteki bà madyòto bàdi mwà kuya benda balonda mulongo. Kàdi pakaadibi bikèngela bwà wèwè kukònya ditumba, s'ki mwaba ùdi cikondo . . . Ne twètù katwèna twibaka cimanu to; tudi twibaka nzùbu, nudi numòna's, pa nàнку matumba aa adi ne cyà kulwa. Àkalwa mu cikondo cyà Martin Luther, John Wesley, ne cikondo cyà beena Mpenta; s'ngwòwò aa apa cyàkàbìdi. Nàнку tudi . . . mbikolè bwà kwenza matumba. Kàdi ndi ne kusàkidila kwàbũngi bwà . . . kùdi Nzambi, nànsha muvwabi bikolè amu, bantu mbandamune lukama pa lukama. Pa nàнку tudi ne kusàkidila kwàbũngi, tusàkidila muntu ne muntu wa kunùdi.

Nènku mpindyewu kumpàla kwà twètù kubuulula Mukàndà, twànji kwakula ne Mwenawù, bu nwènù mwà kuswa, katanci kakesè cyanààna, patùdi twinyika mitù yetù apa:

⁸ Nzambi munanga, tudi tuKusàkidila dilòòlò edi bwà dyèsè dyà kumanya Yesù Kilistò (Musùngidi wetù) Mwân'Èbè, mu diitufwila dyà luse ku mpèkaatù yetù cyanààna, ne bwà kumanya ne Mashi Èndè mmakumbane àdi mabwikidije mpèkaatù yetù yònsò ne matomboka ètù. Mmikupula menemene ne myela mu mbù wa cipwàmwòyi wa Nzambi ne Mukàj'Èndè musela neĩmane ku Didya dyà Dibanji, mukezuke, kàyi musambakaja, bwà kusèdiibwa kùdi Mwànà wa Nzambi. Mùshindù mwine utùdi tuKusàkidila bwà dikumbana dyònsò edi ne diitabuuja dyà kumanya ne katwèna ne dyeyemena ne dikumbanyina dyètù twètù biine to kàdi mu dikumbanyina Dyèndè, bwà cyàkatwenzelaYe. Tudi ne kusàkidila kwàbũngi.

⁹ Twasàkidila bwà dyà—dyàkalenga divwa bàna bèètù aba bapete dīshiyà dyà mbù ne mu matunga a kuntwaku kùdi bantu ne nzala ne nyòtā yā Nzambi. Ndi ndòmba, Mukalenge, bwà ne bòbò baalukile cyàkàbìdi, bwà ne bàna bàdìbo babweje mu Bukalenge abu bààvwijiibwaku baamamwèndè wa kaakù mukàji ne baatatwèndè wa kaakù mulùme bàà bàna bààbwejabo pààbo abu. Enzaku nàнку, Taatù.

¹⁰ Tùbènèshèku pàmwè, dilòòlò edi, ne swàku bwà Nyumà Mwĩmpè àtupèèsheku bintu bitùdi tukèngèla. Bwikidija mukana mwètù ku bintu bĩvwà kabiyi bikèngela twètù kwamba, kàdi ukangule myoyi yetù bwà kwakidila cyŪdi mufwànyine

kutwàmbila aci. Enzaku nàнку, Taatù. Mu Dìnà dyà Yesù mmutùdi tulòmba emu. Amen.

¹¹ Mpindyewu tubuululààyaaku mu Bible mu kaacyèna-bwalu kakesè kàndi njinga kwakwilapu bwà katanci kakesè dilòlòlò edi, ne cidi cisanganyibwa mu Maakò Munsantu, nshapità wa 10.

¹² Nènku mvwa ne... Kukaadi ndambù wa bidimu pàmvwà njinga kwakula, kabìvwa bikengela—kabìvwa binkèngela mene kwikala ne tuntu tufùnda pa kabèji to, mvwa mwà kubìvùluka. Nènku kabìvwa binkèngela bwà kwangata binetè bwà kubibala mu Bible to. Kàdi kacya ànu ngàpita pa bidimu makumi àbìdì ne bitaanu mpindyewu, misangu yibìdì, nènku bìdi ànu bu binkolèle ndambu bwà mèmè kwe—kwenza mùmvwà ne ciibidilu cyà kwenza amu. Nènku mbyenze ànu mùdi kashinyi kasunsuke, kàdi ncidi ànu ngenda nyeemesha. Uh-huh, ndi muswe kwikala ànu mutungunuke ne kukoka bikolè too ne pàdibi... pàndi nya ku mushiki wà bilatalata bwà kufwimbiibwa cyàkàbìdì. Ki mulayi ngwòwò awu.

¹³ Luuka Munsantu, nshapità wa 10, kubangila ku... Ngeela meeji ne mvwa mwambe mvensa wa 21, ní ndi mwà kucipeta lwà mwaba ewu. Ndi mutupakane, m'Maako Munsantu. Mfwilaayikù luse.

¹⁴ Maako Munsantu, nshapità wa 10, ku—ku makumi àbìdì ne... kubangila ku mvensà wa 21, ndi muswe kubala. Twàngatàayi mvensa wa 17, èyowà's we:

Nènku pàkaavwaye muye bikolè mu njila, kulwaku muntu ne lubilu, ne kutwaye binu panshi kumpàla kwèndè, ne kumwebejaye, wàmba ne: Mulongeshi mwîmpè, ncinyi cîngènzà bwà ngaamòna mwà kupyàna mwoyi wà cyèndèlèlè?

Ki Yesù kumwambila ne: Udi umbiikila mwîmpè bwà cinyi? kùdi muntu mwîmpè ànu umwepele, ne mbwena kwamba ne, Nzambi.

Wèwè's udi mumanye mikenji ne: Kwèndi masandi, Kushipyanganyi, Kwibi, Kudìngididyanganyi bwalu, Kwibidi nànsha, Neemèka tatwèbè ne mamwèbè.

Ki yèyè kwandamuna e kumwambila ne: Mulongeshi, byònsò ebi ndi mubyenze nkacya ku bwànà bwànyì.

Pashìishe kwamba... Pashìishe Yesù umutangila e kumunangaye, ne kumwambila ne: Cintu cimwèpelè ncikupangike: kwata njila ndaaku, ne upanyishe cyònsò cyùdi naaci, nènku, upeeshè bapele, nènku newikale ne mabanji mu dyulu: nènku ulwe, ne wambule nkuruse webè, ne undonde mèmè.

Nènku wàkabungama ku mèyì awu, ne yèyè kuya ne kanyinganyinga, bwalu ùvwa ne bintu binènè.

Nènku Mukalenge àbèneshèku dibala dyà Dìyì Dyèndè.

¹⁵ Mpindyewu, netwikalè mwà kwakula dilòòlò edi pa cyena-bwalu kampànda. Ndi muswe bwà mutù wànyì wa bwalu wikàle “Undonde Mémè,” ne cyena-bwalu cyànyì, *Kulombodiibwa*.

¹⁶ Mpindyewu mbwalu bwà dikema’s, kàdi mvwa ndyambidila ne pàmwàpa, leelù ewu mu kusambila... Nènku mvwa munengeshe be, ne dilòòlò dyònsò kushààla ànu buludi pa Mukenji ùndi naawù, ùdi Mukalenge mumpèeshe bwà kwakulapù. Mvwa mwele meeji dilòòlò edi, mu nshapita mupyamùpyà ewu, ne ndi mufwànyine kuwùlengela ku mmwenenu mushiilàngàne. Nènku misangu yàbùngì tutu baakulèkule pa cyòci eci, bàcibiikila ne: “Mukookeshi Mubanja wa Citende.” Ne—ne bààbùngì bàà ku bambi badi mwab’ewu aba, bàna bèètù, kakuyi mpatà to bakaadi bacilenge mu mishindù mishiilàngàne. Nènku ndi muswe kuteeta bwà kucilenga mu mùshindù mu—mushiilàngane dilòòlò edi ne wà kwònsò eku, wà *Kulombodiibwa* ewu.

¹⁷ Eci, vùlukààyi eci ne, muntu yònsò wa kutùdì, mwànà ne mukulumpe, cidya cyèbè cyà kumpàla cyùtù mwenze mu mwoyi wèbè, byàkakèngela bwà muntu kampànda kukulombolaye. Ncyà bushùwà. Ne cidya cyèbè cyà ndekeelu ciwènza aci, muntu kampànda neàkulombole. Bìkèngela bwà muntu kampànda àlombole.

¹⁸ Nzambì mmutùfwànyikije ne mìkòòkò. Nènku muntu yêyè mumanye dimuna dyà mìkòòkò ne ngiikàdilu wa mìkòòkò, mòna’s, s’udi mumanye ne mùkòòkò kawèna mwà kupeta njila wa kuyiila to. Bìkèngela bawùlombole. Nànsha ne mu bishipeelu, tudi tusangana ne bàlwalwamù ne mùkòòkò mulombola mu cishipeelu amu kùdi mbuji. Mbuji ngudi umulombolamu, pashiishe pàdiye ufika ku ndekeelu kwà mupwa aku ùdi utumpika uya pambelu, nènku mùkòòkò ùtùngunuka buludi ne mu cishipeelu. Pa nànkù bòbò. . . Tudi tusangana ne mùkòòkò kawèna mwà kupeta njila wa kuyiila to.

¹⁹ Ndi mvùluka dilabula dîngààkapetà ne mukwàbò, musangu kampànda. Mvwa mulami wa diitu mu Indiana, nènku mvwa mupatuke muye mu cisuku; ki mémè kuumvwa cintu kampànda, lubila lwà lutàmbe kwenza luse. Nènku civwa nkàna ka—kakesè kàà mùkòòkò, kavwà—kavwà kajimije mamwàkù. Nènku kakàvwakù mwà kupeta mwà kuya kudiye to, ne maamù kàvwakù mwà kupeta mwà kuya kùdi—kùdi kàna kakesè kàà mùkòòkò aku to. Mémè kwambula kakwàcikwètù, ne mùshindù mene wakangeyemenaku’s. Mémè kuya kuntwaku, byanza byànyì kacya byàkwata kakwàcikwètù aku. Ndila mwadi, ki—ki mémè kuumvwa. Mùshindù mwine wakeeyemeshaku mutù wàkù mukesè awu kùndi bivwa byenze ànu bu ne kàvwa kamanye ne mvwa—mvwa—mvwa mwà kukàkwàcisha’s.

²⁰ Mémè kudyàmbidila ne: “Éyi Lubwebwe lwà Bikondo, lupandiibwe bwànyì, ngambule mu mabòkò a Mukalenge Yesù,

ngiikale ànu ne disànka bu mûndi mumanye ne nèn—nèngiikale mwà kuya Kumbelu bwà kashààla ne bananga bàànyi.” Mémè kudyambidila ne: “Ku ndekeelu kwà lwendu lwànyi lwà mwoyi, untwaleku ànu mu mabòkò Èbè, Mukalenge, mûshindù awu. Mu mûshindù wà ngaamanya ne nèngàmbwibwe dyamwàmwa dyà musulu díbà adi, ku luseke lukwabo kwaka kwikala kakuyi tuninganyinga ne màsaamà, ne bikwàbò, ne nèngiikalè ne bananga bândi munange.”

²¹ Nènku bu nwènù balonge bufùki, kùdi cintu cinène mu bufùki. Cyònsò cîndi—cîndi mémè ntangila, ne cidi Nzambi mwenze, Yèyè ki Mwena bufùki. Bufùki bùdi bwenda mu ntungunukilu. Bufùki bwònsò bùdi bwenda ànu bufwànàngàne. Nudi numòna’s, bintu byònsò. . . Ànu mûngàmbi amu, ngeela meeji ndilòlò dishààle, ne: “Bufùki bùdi bufila bujaadiki bwà Nzambi.” Bu ne kacya kutu mwanji kwikalaku ne Bible to, udi ànu mufwànyine kutangila bufùki ne kumanya ne Bible ewu m’Bulelèlà.

²² Ndi—ndi mupetè dyèsè dyà kunyunguluka eku ne eku kwà buloba bujimà. Ne ndi mubale bitùpà bishiilèshiilàngàne, ne ndi mumòne ntèndeelèlu mishiilèshiilàngàne; ba-Mùzùlùmanyi, ne ndikù mubale Koran, ne—ne kumòna ba-Sikhs, ba-Jains, ne ba-Mùzùlùmaanyì, ne ba-Bouddistes, ne bakwàbò. Kàdi nànsha nànkù, yònsò wa kùdìbo, badi ne nkìndi ne mu—mu—mu—mukàndà wà twitabààyi ne mukàndà wà mikenji, ne bikwàbò. Kàdi Bible wetù m’Bulelèlà, ne Nzambi wetù ki Umwepele udi wa bushùwà; bwalu byàkakèngela bwà yònsò wa kudibo kufunkunaye lukita mwaba kampànda kuvwa mujuudi wabò mucuikalemu, kàdi bwena Kilistò bùtu bùfunkuna ku lukita munda mutupu ne bùdi mwà kwikala ne mwoyi mu Bwikadi bwà Ewu wàkediibwamù awu. Udi ne mwoyi! Kì n’Nzambi *uvwa* to, N’Nzambi *udi*. Kì “*Mvwa*” anyi “*Nèngiikalè*” to, kàdi “NDI.”

²³ Ne bufùki bwònsò bùdi bwenda mu ntungunukilu, bu mûngàmbi, pàmvwà ngàkula pa Bikondo byètù byà Èkèleeziyà (bitùdi naabi ne mikàndà mpindyewu yidi yipàtukà ayi). Kùdi. . . Cîndi. . . pa bìdi bìtangila difùnda dyànyi dyà Bikondo byà Èkèleeziyà. Nènku mûshindù utùdi tumòna Èkèleeziyà, mùdiYè mukolè, ubanda ànu menemene mùdi bufùki bwònsò bwenza.

²⁴ Nènku tuvwa twakula ditùkù adi bwà mùdi díbà dipatuka mu dindà, bu mwànà mukesè wa mu dibòko, mutekète menemene, kadiyi ne dikàndà dikumbane to. Nènku bu mudi ditùkù dyènda diya kumpàla, didi dyènda dishààla ne makàndà, dikolakana. Pa díbà mwandamukùlù jaajaaja didi diya mu kàlaasà, bu mùdi mwànà wa balùme wa citende anyi wa bakàji wa citende amu. Nènku pashiishe pa díbà dikumi ne umwe jaajaaja didi dipatuka mu kàlaasà, ne didi pabwìpi bwà kukwatadi mudimu wàdi—wàdi. Nènku pashiishe dyenda diya too ne ku díbà isatu jaajaaja dishintuluka, dyùmuka

munkacinkaci mwà mwoyi diya ku bukulàkàjì. Ne pashiishe difwa mu mapingaja. Ki ndekeelu wa díbà awu anyi? To. Dìdì dyàlukila dindà didì dilonà, bwà kufila bujaadiki ne kùdì mwoyi, lufù, dijiikiibwa, dibìikà dyà ku lufù. Nwamònu anyi? Nwamònu anyi?

²⁵ Tudi tutàngila micì, mudiya yìnyunga ne cìdiya yenza. Kukaadi cikondo kampànda mvwa nsanganyiibwa mu Kentucky mwàmwa, ntu—ntu munange kuya kalemba nshindì, ki mèmè kupwekaku mu muvù wa mabeji apòòpoka wà cidimu amu bwà kuya kalemba nshindì ne mulunda wanyi. Nènku bìdì . . . panshì pàvwa pùmè be.

²⁶ Ne muntu kanà yònsò ukààdikù mulembe nshindì wa cisengasenga ewu, mmumanye mutubi bikolè bwà kuyibucikila. Pàdì, ma—mabeji awu, ùdyatè ànu òmwè, dyènza mutoyi nènku, kaa, Houdini katuku nànsha mumanye kudifinda bu—bu tukwacikwètù atu to, mùshindù mene uditu mwà kuya bimpàmbambà's wè! Kàdì díbà adi kuteeta bwà kumwashila mu dísu ku bule bwà metres makumi anaayi ne asambòmbò, bìdì bikukèngela ulemba ulembelamu bwà kukumbaja búngì buteeka ku ditùkù.

²⁷ Pa nànkù, Mukalenge Wood, mulunda wanyi, Ntemu wa Yèhowàh mukudimune mucima, uvwa naanyi. Nènku twètù. . . Yèyè ne: “Ndi mumanye ferme mwaba ewu mùdì muntu kampànda mwikale ne byàbúngì. . .” Tudi tubibìikila kuntwaku ne, “bipòòngòpòòngò.”

²⁸ Mbanganyi bàdì bamanye cìdì *lupòòngò* ne ncinyi? Èè, udi wa mu citùpà kaayi cyà Kentucky, twamb'eku twamb'eku? Nwamònu anyi? Nènku ki kùndì mèmè ewu mufùmine.

²⁹ Byenze bu mùdì mu òmwè dyà ku mápà edi, kì nkwanji kwenza matùkù to; bikèngela ngambile Mwanèètù Williams ne bakwàbò, bàna bèètù aba. Kwambabo ne: “Netujuuke kuulu mpindyewu bwà kwimba musambu—musambu wà ditùnga.”

³⁰ Ki mèmè ne: “Bwà kwètù kundela ku Kentucky kwà kale, kule. . .” Nànshapu muntu wa kungimbisha, pa nànkù. . . Ki musambu wà ditùnga ùmwèpelè umvwa pàanyi mumanye awu. Nànkù awu tuvwa—tuvwa mpindyewu. . .

³¹ Èyo, mukalenge. [Mwanèètù Branham wàpèèshiibu kabeji kafùnda—Muf.] “Swayiku, nusambidileku inàbànza kampànda mwab'ewu mpindyewu udi mashi azòloloka mu dyùlù.”

Tusambilàayi:

³² Nzambì munanga, ndi nKulòmba, Mukalenge, Wèwè ke—ke Mwondopi munène nènku ndi ndòmba bwà ngàsà Webè ne luse bilengeku mukàjì munanga ewu ànu mpindyewu ewu bwà kwimanyika mashi awu. Bu bantu bàdì biitabuuja badisangishe pàmwè, inàbànza awu mmulwe mwaba ewu bwà kusankila Dìyì dyà Mukalenge ne bwobùmwè bwà cisàmbà, nènku ndi

nKulòmba, Mukalenge, ànu mpindyewu mene, bwà kutandisha mwena lukuna ne kwimanyika mashi. Mu Dinà dyà Yesù Kilistò. Amen. (Nènku tudi tucìtabuuja, tudi tucìtabuuja.)

³³ Tutùngùnuka ànu ne bwalu bulonda bwà kwenza bu tudi tupeta njiya kampànda bangabanga ne twètù kufika buludi ku tuntu tukesè tùndì mufunde kaaba aka etu, ne ndambu wa Mifundu.

³⁴ Mpindyewu kwambaye ne: “Èè, mukulumpe ewu, netùye kuntwaku bwà kumumòna. Ùdi ne bipòòngòpòòngò bùngì cyanààna mu mwaba wèndè awu,” yêyè ne: “kàdi mmwena dyabulu.” Yêyè ne: “Pìikalabi ne...Yêyè’s mmufwànyine kutwipata ne milawu twètù baye kuntwaku.”

³⁵ Mêmè ne: “Kàdi nshìndì nyôyì eyi katumònyi kaaba aka. Tuvwa bààsè citùùdilu aci kukaadi mbingu yìbìdì.” Nènku tuvwa ne manyaanu, ne myevu misase ku cibànga kwònsò.

³⁶ Ki yêyè ne: “Èè?”

Mêmè ne: “Tuyaayaaku.”

³⁷ Ki twètù kupweka ndambu wa kilòmèètà, mu ntanta wa kilòmèètà mitwe ku makumi asàtù ne ibidi. Mwva nsanganyibwaku ku luseke alu musangu kampànda kumpàla, bwà malòòlò asatu, mu citùùdilu cyà ba-Méthodistes kuvwa bintu binène bìvwa Mukalenge mwenze, ne disangisha dinène dyà dyondopa munkacì mwà ba-Méthodistes. Nènku pashìshe twètù kuya lwà paanyimà pàà tukuna ne bipòòngòpòòngò ne mbuwa. Nènku bikèngela ànu wèwè mumanye Kentucky bwà kucimanya, ne mmwaba wà mùshindù kaayi ùdì ukabwelawu. Nènku patuvwa baye lwà paanyimà apu twètù kufika ku nzùbu kampànda, nènku ke muntu mulùme mununu ewu musòmbè mwab’awu, bantu balùme banunu bàbìdì, basòmbè mwab’awu ne bifulu byàbò bipwekeshila mwísù, ki—ki yêyè ne: “Nyêyè wàwa,” yêyè ne, “s’ki mupape udiku’s.” Yêyè ne: “Utu ukina mwaku awu wa ne ‘muyiishi,’” mwakambaye.

³⁸ Ki mêmè ne: “Èè, cìmpè cyà kwenza ngǎnjì nshààle musòmbèle mu kàshinyì, bwà cyanààna katwàkupeta mùshindù wa kuya kalemba to nànsha kakesè.” Mêmè ne: “Bwela ùkamukonkè ní tudi mwà kulemba.”

³⁹ Ki kupatukaye ne kubangaye kubwelamu, kuyiikilaye nààbò. Ne mu Kentucky, misangu yònsò, nudi bamanye’s, bitu ànu ne “bwela,” ne bikwàbò. Nènku ki kuyaye kuntwaku ne kwamba ne: “Ndi ànu ndikonka ní tudiku mwà kulemba katancì kakesè mu mwaba wèbè ewu.”

⁴⁰ Mukulumpe uvwa musòmbè mwab’awu, ne bidimu byàmba kutwà ku makumi mwandamutekète ne bitaanu, ne mfwankà wa cipatu kacya wàkalama ku mishiku, yêyè ne...kutwila mate, è kwambaye ne: “Dyèbè nganyì?”

Yêyè ne: “Dyànyì ng’Wood.”

Yèyè ne: “Udiku ne malanda ne mukulumpe Jim uvwa kale wàwa musòmbèbe . . .”

Yèyè ne: “Èyo, ndi mwànà wa Jim.” Yèyè ne: “Ndi Banks. Èyo.”

41 “Èè,” mwakambaye, “mukulumpe Jim uvwa muntu wa meeji matòòke.” Yèyè ne: “Ncyà bushùwà, enza cyùdi muswe kwenza.” Yèyè ne—yèyè ne: “Udi mulwe nkaayeebe anyi?”

Yèyè ne: “To, mpaasàtà wanyi mèmè’s ùdi pambelu pàpa.”

Yèyè ne: “Cinyi?”

Yèyè ne: “Mpaasàtà wanyì ùdi pambelu pàpa mu kàshinyi,” yèyè ne, “ùtu ùlemba naanyì pamwè.”

42 Yèyè ne: “Wood, kungambidiku ne udi mushààdile menemene mu mùshindù wà ukààdi wenda upulumunangana ne mwambi kwònsò kuyaaya to?”

43 Nàнку mmukulumpe, mukàyàbàle mu cyakwidi, ki mèmè kudyàmbidila ne bivwa bimpè mèmè kupatukila mu kàshinyi, nudi bamanye’s. Ki mèmè kupatuka e kuseemena, ki yèyè ne: “Èè, nènku wèwè ki muyiishi, àmbà’s?”

44 Mèmè ne: “Èyowà’s, mukalenge.” Kumbandisha kumpwekesha; ne mashi à nshindì pambidi, ne bukooya. Yèyè ne—yèyè ne. . . Mèmè ne: “Ncyèna ànu ne mmwenekelu wendè to.”

45 Yèyè ne: “Èè, mèmè’s ntu bu munange byà nàнку awu.” Yèyè ne: “Udi mumanye’s, ndi muswè nkwambileku bwalu.” Yèyè ne: “Mèmè’s ndi ne cyà kwikala mwena dyabùlù!”

46 Mèmè ne: “Èyowà’s, mukalenge, ndi nguumvwa nàнку.” Mèmè ne: “Ncyèna ngeela meeji ne ncyà kuditwila naaci makumbu to, nànsha nàнку. Kì mmwòmò anyi?”

47 Ki yèyè ne: “Èè,” yèyè ne, “ncyèna mumanye to.” Kwambayè ne: “Nénkwambilè cìndi mèmè ngeela meeji bwènù nwènù balumyana.”

Mèmè ne: “Èyo.”

48 Yèyè ne: “Udi munkaci mwà kwela mbowà mangùlùbè.” Kàdi mbanganyi bàdi bamanye cìdi ciine aci cyumvwija? Nwamònu anyi? Cìdi cyumvwija ne mbwa wa mashimi, nudi numòna’s; kasengela nshimbà kakèèna kuulu aku to nànsha kakesè, nwamònu’s. Kwambaye ne: “Wèwè’s udi munkaci mwà kwela mbowà mangùlùbè’s.”

Mèmè ne: “Aci’s nku mmwenenu’s.”

49 Ki yèyè ne: “Èè,” yèyè ne, “tàngilà, udi umòna mùmbùndà wa kale wà mwishì ùdi pààpa wàwa anyi?”

“Èyowà.”

50 “Ndi mulediibwe kuntu kwàka, kukaadi bidimu makumi mwandamutekète ne bitaanu.” Ki yèyè ne: “Ndi musòmbèbe ànu

mu tukuna etu, emu mwônsò emu, munda mwà bidimu byônsò ebi.” Ki yêyè ne: “Nkaadi mutàngile mu maulu, mutàngile eku ne kwàka, ne, ncyà bushùwà ne, mu bidimu makumi mwandamutekète ne bitaanu byônsò ebi, ndi mufwànyine kwikalaku mumône cintu kampànda cyà cyàmba kufwànàngana ne Nzambi. Kwenaku pèèbè wela meeji nànkù anyi?”

⁵¹ Mêmè ne: “Èè, mbilondeshile ku cyûdi utàngila’s, wamònu’s, anyi cyûdi ukèba.”

⁵² Ki yêyè ne: “Èè,” yêyè ne, “ncyà bushùwà ne ncyêna—ncyêna ngiitabuuja ne kûdi cifûkiibwa bu nànkù to. Nènku ndi ngeela meeji ne nwênù balumyàna nudi ànu nupatuka cyanààna nulabakaja bantu bwà kubàdyàfula mfranga yààbò ne bikwàbò byônsò. Nènku mùshindù awu ki ùyaayàbi’s.”

⁵³ Mêmè ne: “Èè, wêwê’s udi mwena ntanda wa mu Àmèrikè, s’udi ne bukenji ku ngeelelu webè—webè wa meeji.”

⁵⁴ Yêyè ne: “Kûdi muntu umwepelè, musangu kampànda, ùmwàku muumvwe bàmba,” mwakambaye, “ùndi mêmè mu bushùwà... Bu yêyè... Bu mêmè mwà kupetakù mùshindù wà kuyiikila ne muntu awu,” yêyè ne, “ndi njingaku bwà—bwà kumukùdikaku ndambù wa nkonko.”

Mêmè ne: “Èyowà’s, mukalenge.”

⁵⁵ Yêyè ne: “Ùvwa mmuyiishi, udi mufwànyine kumumanya.” Yêyè ne: “Ùvwa mwenze masangisha lwà mu Campbellsville emu, ànu àbidi àdi panshi àà, mu lupangu lwà èkèleeziyà kampànda lwà kuulu kwaka, mu cituùdilu kampànda.” Ki yêyè ne: “Nyêwù ngàpù ne dîna dyèndè mwoyi’s.” Yêyè ne: “Ngwa ku Indiana.”

Ki—ki mêmè ne: “Kaa? Èyowà’s, mukalenge.”

⁵⁶ Ki Mwanèètù Wood kubangaye kwamba ne: “Èè, mêmè... ” (“Kwàmbiku aci to.”) Ki yêyè kwamba...

Mêmè ne: “Kàdi bwalu bwèndè bùdi bìshi’s?”

⁵⁷ Yêyè ne: “Èè,” mwakambaye, “inàbànzà mununu...” (muntu kampànda) “lwà pa kakuna pàpa...” Yêyè ne: “Udi mumanye’s, ùvwa ùpunga ne lufù kansèrè kàmba kuya nendè.” Ki yêyè ne: “Mukàjàanyì ne mêmè tuvwa mwà kuya kuntwaku mu dîndà bwà—bwà kumushintulwila byà pa bulààlu.” Yêyè ne: “Kakuvwaku nànsha mùshindù wà kutàmba kumujuula bwà kumusòmbesha pa pô tó,” yêyè ne, “bìvwa ànu bikèngela kukòka ndàlà.” Ki yêyè ne: “Ùvwa ùpunga ne lufù. Mukàjì awu ukaavwa muye ku Louisville, kwambaye muvwa bangàngabukà bamulekèle bambe muvwaye ‘ne cyà kufwà.’

⁵⁸ “Ki mwanààbò wa bakàjì kuyaye ku masangisha awu, kwambaye ne: ‘Muyiishi awu uvwa mwimane pa cibumbà cyà ku cyambilu apu, kupingajaye mèsù mu batèèleji ne kutèèlaye mukàjì ewu mu dîna dyèndè, ne kumwambilaye ne: “Pàvwaye muumuke, uvwa mwangate mùshwàla ne muwele mu kabuta

kèndè—kèndè kàà ku byanza.” Ne kutèèlaye dìnà dyà mukàjì ewu lwà kwinshi aku, uvwa mu ntantà wa kilòmèètà makumi àsàtù ne yìbìdì kwinshi eku, ne kwambaye muvwaye ukenga ne kansèrè, cìvwà dìnà dyèndè, ne lutàtù luvwaye mupicilemù alu; yèyè ne: “Angàta mùshwàla awu ukawùtèèke pambidi pàà mukàjì awu,” ne kwambayè ne “mukàjì awu nèòndopiibwe ku kansèrè kèndè.””

⁵⁹ Ki yèyè ne: “Kulwabò kaaba aka dilòlòlò adi.” Yèyè ne: “Bulelèlè, mèmè kuuvwa mbila mikolè yà yenza ne bwòwà kuntu aku. Mèmè kudyambidila ne bavwa mbeena Armée du Salut balekelela pa lusongo lwà kakuna aku’s. Yèyè ne: ‘Èè,’ mèmè ne: ‘ngeela meeji ne mwanèètù wa bakàjì mukulakaji awu’s wáfù.’ Yèyè ne: ‘Netù. . . Maalaba netùye bwà kamwangata ne màshinyì àà cisemuna, nènku netùye nendè too ne ku cibeeba cinène,’ kwamba ne: ‘bwà bààmòna mwà kuya nendè kùdi mujiiki wa bitalu.’ Ki yèyè ne. . . Twètù kwindila. Kabyena bikèngela bwà twètù kubànda kuntwaku pa diine dībà dyà bufuku adi to.” Yèyè ne: “Kùdi ntantà bu wa kilòmèètà mujima ne citùpà too ne pa kakuna apa.” Yèyè ne: “Twètù kuya kuntwaku pààkacyàbu ne dindà, kàdi udi mumanye cyàkenzekà anyi?”

Mèmè ne: “To, mukalenge.”

⁶⁰ Yèyè ne: “Ki mukàjì ewu musòmbè mwab’awu òmbotangana ne pommè myòsha, unwangana ne kàfè, ne bayèndè.”

Mèmè ne: “Ngwambilamu anyi?”

Yèyè ne: “Èyowà’s, mukalenge.”

“Kaa!” Mungààkamba. “Mpindyewu, mukalenge, kî ncyùdì uswa kwamba menemene to.”

⁶¹ Yèyè ne: “Cìdi cìntacisha ncyà ne. . . mmunyi muvwa muntu awu, wa bwalu kacya kayiku mwanji kufika muneemu emu, kàdi mumanye ciine aci.” Nwamònu anyi?

Ki mèmè kwamba ne: “Kaa, wèwè kwèna witabuuja aci to.”

Yèyè ne: “Mbulelèlè’s.”

Mèmè ne: “Udi witabuuja aci anyi?” Nwamònu anyi?

⁶² Yèyè—yèyè kwamba ne: “Èè, ndààku wèwè ànu pa kakuna apu, mèmè’s ndi mwà kukujaadikilaci.” S’ki yèyè awu munkaci mwà kunyiisha mpindyewu, nudi numòna’s.

⁶³ Ki mèmè—mèmè ne: “Um-um.” Mèmè kwangula cimuma cyà pomme, ki—ki mèmè kwamba ne: “Ndiku mwà kupeta cìmwè cyà ku bimuma byà pomme ebi anyi?” Ki mèmè kucikùpwila ku bilàmbà byànyì aku.

⁶⁴ Yèyè ne: “Èè, mantètèmbwe à nsumààngulungu nyawu àbìdya àbìmana’s, ngeela meeji ne udi mwà kupeta cìmwè.” Ki pashiishe. . . Nènku mpindyewu mèmè kwamba ne: “Èè, . . .”

Mêmè—mêmè kutwa mênù...kutwamù mênù, e kwamba ne: “Eci’s m’pomme mulenga wa dikema.”

65 Yèyè ne: “Kaa, èyowà’s.” Yèyè ne: “Udi mumanye mudi bwalu anyi? Ngakakùna mucì awu mwaba awu, kaa, kukaadi bidimu makumi anaayi, anyi cintu bu nàнку awu.”

Mêmè ne: “Kaa, bushùwà anyi?”

“Èyowà’s, mukalenge.”

66 Ki mêmè ne: “Èè, ne cidimu cyônsò...” Mêmè ne: “Ndi mmôna ne katwena banji kupeta mashika makolè to, tucidi ànu ku mbangilu wa ngondo wa mwandamukùlù.” Ki mêmè ne: “Mabeji awu adi apòòpoka ku micì.”

67 “Èyowà’s, mukalenge. Ncyà bushùwà, s’muvù wà mabeji apòòpoka ucibangilaku. Ngeela meeji ne netùwùpete ne lukasa be bwà ewu musangu.”

68 Mêmè ne: “Èyowà’s, mukalenge.” Kushintulula cyena-bwalu aci, nwamònu’s. Ki yèyè ne...Mêmè ne: “Èè, udi mumanye’s, mbwalu bwà dikema’s,” mêmè ne, “bwà mùshindù mwine ùdi mâyi a mu mucì awu apatuka mu mucì awu’s.” Mêmè ne: “Nênku mabeji awu ng’apòòpoka, kàdi nànsha nàнку kakwenaku... kakwena—kakwena mashika makolè bwà kushebeya dibeji adi to.”

69 Ki yèyè ne: “Èè,” yèyè ne, “aci cidi ne dipetangana kaayi ne citùdi munkaci mwa kwakula eci?”

70 Ki mêmè ne: “Èè, ndi—ndi ànu ndikonka’s.” (Udi mumanye’s, maman ùvwa misangu yônsò ànu wamba ne: “Mwânà tumutàngidile lungenyi lumujimine, nudi bamanye’s.” Kî mêmè ànu kumutàngidila.)

71 Ki kutùngùnkayè, kwambaye ne: “Èè, èyo, ciine aci cidi dipetangana kaayi?”

72 Mêmè ne: “Udi mumanye’s, Nzambì ngudi utwàla bimuma byà pomme abi kuulu aku’s, ne usankila bimuma byà pomme abi ne mabeji, nènku udi usòmbela mu—mu dileji ne bikwabo. Adi apweka mu movù wà cidimu wà mabeji apòòpoka amu ne,” mêmè ne, “alukila cyàkàbìdi kuulu ne bimuma bya pomme abi ne mabeji kàbìdi.”

73 Ki yèyè ne: “Kaa, aci’s cidi ànu bufùki. Nwamònu’s, aci’s cidi ànu bufùki.”

74 Mêmè ne: “Èè, mu bushùwà bwà bwalu, aci’s mbufùki.” Mêmè ne: “Aci’s mbufùki, kàdi bìdi bìkèngela bwà Muntu kampànda kwikalaye ukontonona bufùki.” Nwamònu’s, mêmè...kwambayè...“Ngambilàku mpindyewu cidi cyenza nàнку ncinyi?”

75 Ki yèyè ne: “Èè, cidi ànu—ànu ku wa ngiikadilu bufùki bwètù ebu.”

⁷⁶ Mémè ne: “Nganyì udi wambila kaadibèji kakesè aku mpindyewu, ne kùdì . . .?” Mémè ne: “Mpindyewu, cìdì cyenza ne dibèji adi òmate, mbwalu màyi à mucì awu adi apweka abwela mu muji. Kàdi bu màyi à mu mucì awu mwà kushààla makalame kuulu kwà mucì awu mu muvù wa mashika amu? Cìwà mwà kwenzeka ncinyì?”

⁷⁷ Yèyè ne: “Mbifwànyine kushipa mucì awu.”

⁷⁸ “Èè,” mémè ne, “mpindyewu, n’lungenyi kaayi lùdi lupwekesha màyi à mu mucì awu mu miji, lwàmba ne: ‘Patukààku mwab’ewu mpindyewu, mmuvù wà mabèji apòòpoka wà cidimu ùdì ulwa, pweka too ne mu miji ùsokome’? Nènku shààla mwinshi mu miji byenze bu mu lukita’s; nènku dībà adi muvù wa bintu bitoloka ulwàlwa wàlukile kàbìdì, ukwame pomme yàbùngì, ne utolweshe mabèji àbùngì ne bikwàbò.”

⁷⁹ Yèyè ne: “Aci’s cìdì ànu bufùki pa bwòbù, nebwènzè nànkù.” Yèyè ne: “Lwìdì lwà kuulu! Dishintuluka, udi mumanye, dilwa dyà muvù wa bintu bipòòpoka.”

⁸⁰ Mémè ne: “Tèèka mbekeci wa màyi pa dikunji pààpa, ne umònebi bufùki ní budi buàpwekesha kwinshi kwà dikunji aku ne buàbandisha kuulu aku cyàkàbìdì. Nwamònu anyi?” Nwamònu anyi?

“Èè,” mwakambaye, “udi mufwànyine kwikala ne cintu kampànda.”

Mémè ne: “Anji elabi meeji pa bwalu abu patùdì tuya kalemba apa.”

Ki yèyè ne: “Èè,” ki yèyè ne, “lembaayi mwaba wònsò wunùdì baswè kulemba awu.”

⁸¹ Ki mémè ne: “Pàngààlukilà, wèwè mwà kungambila ne mmeeji kaayi àdì apatula màyi à mu mucì awu mu mucì awu aàpwekesha too ne mu miji, bwà kushààla mu muvù wònsò wa mashika ne kwalukila mu muvù wa mashika udi ulonda awu. Nènkwambilè ne m’Meeji àmwèàmwè awu àdì màngambile bwalu bwà mukàjì awu kuntu kwàka.”

Yèyè ne: “Makwambile wèwè?”

Mémè ne: “Èyowà’s, mukalenge.”

Yèyè ne: “Kì ngwèwè muyiishi awu to!”

Mémè ne: “Udiku mwà kumanya dìnà dyèndè anyi?”

Yèyè ne: “Èyowà.”

Mémè ne: “Branham?”

Yèyè ne: “Nyèyè awu’s.”

Mémè ne: “Aci—aci’s ncyà bushùwà.” Nwamònu anyi?

82 Kàdi nudi bamanye mùdi bwalu anyi? Mémè kulumbola mukulumpe awu kùdi Kilistò, ànu mwaba awu ku bujaadiki bwèndè yèyè mwine.

83 Nènku paanyimà pàà cidimu cijima mémè kupweka kuntwaku ne kweyeka ne kàshinyi (ne mukàndà wa dyanyisha wà mu Indiana mulamikapù) mu lupangu amu. Bàkaavwa buumuke baye, yèyè ùkaavwa mufwè. Nànku pangààkapingana, ki mukàjèndè awu mwimane mwab'awu wàmba kunnwishila màyi ku lusona; mvwa ngèla meeji ne mvwa ne dyanyisha dyà kuya kalemba. Ki kupatukaye mwaba awu, kwambaye ne: “Kwèna mwà kubala anyi?”

84 Mémè ne: “Èyowà's, mandamu.”

Yèyè ne: “Ùvwa mumòne bimanyinu abi bìdi byàmba ne ‘Kakwena byà Dilemba to!’?”

85 Mémè ne: “Èyowà's, mandamu, kàdi,” mémè ne, “ndi—ndi ne dyanyisha.”

86 “Kwèna ne dyanyisha to!” mwakambaye. Ki yèyè ne: “Tudi ne mwaba ewu—mwaba mukàndika kùkaadi bidimu byàbùngi.”

87 Mémè ne: “Èè, mwanètù wa bakàji, dîbà adi mémè—mémè ke uvwa mutùpàkane's, ùmfwileku luse.”

88 Ki yèyè ne: “Luse lwà bwalu kaayi! Ne mukàndà wà dyanyisha wa ku Indiana awu's, ke wèwè kwimana apa, udi muntu mubùle ne bundu's!”

Mémè ne: “Udi unganyishilaku bwà kucyùmvwija anyi?”
Mémè ne. . .

Yèyè ne: “Udi mukwanyishila nganyi?”

89 Mémè ne: “Ncyèna ànu mumanye. . .” Mémè ne: “Ùvwa mmuntu mukulumpè mushindame musòmbè pambelu pàapa mu lutanda, pàmvwà nsanganyiibwa mwab'ewu cidimu cishààle eci, ne tuvwa twakula pa bwalu bwà Nzambi.” Nwamònu anyi?

Ki kutàngilaye, kwambaye ne: “Ngwèwè Mwanètù Branham anyi?”

Ki mémè ne: “Èyowà's, mandamu.”

90 Yèyè ne: “Mfwilèku luse. Ncivwa mumanye ne wèwè uvwa nganyi to.” Yèyè ne: “Ndi muswè nkwambile bujaadiki bwèndè. Mèbà èndè à ndekeelu pavwaye ùpunga ne lufù, wàkeela byanza byèndè muulu ne kutùmbishayè Nzambi.” Yèyè ne: “Yèyè wàkafwila mu diitabuuya dyà bwenà Kilistò, ne wàkambwibwa kuya kùdi Nzambi.” Nwamònu anyi?

91 “Bòbò bapuwe, mabwe neèle mbila mikolè dyàkàmwè.” Kùdi cintu kampànda mu bufùki.

92 Tàngilààyì nyuunyi, tàngilààyì nyama, tàngilààyì bintu byònsò, nènku nutàngilààyì bufùki.

⁹³ Tàngilààyi nyuunyi wa nkuci mukesè awu mùshindù ùdiye ùbuuka. Nyuunyi kaayipu wa mushiilàngàne's wè, nwamònu's. Yèyè—yèyè kàtu ne kanyònga to, kàtu mwà kudyà mudi cikòlolo mwà kudyà amu to. Nwamònu anyi? Kàtu ne kanyònga mu yèyè to. Kabyena bikèngela bwà kwowayè màyi mu—mu—mu màyi to, bwalu ùdi ne cintu kampànda munda mwèndè amu; cidi cimusukula kutwadijila ànu munda amu, nudi bamòne's.

⁹⁴ Mùshindù awu ke ùdi mwena Kilistò. Mùshindù awu ke ùdi Nzambi ùDileeja, mu—mu—mu nkuci. Nwamònu's, bwalu. . . nènku. . . Yesù uvwa muleejùibwe bu Mwànà wa mùkòòkò. Misangu yònsò ànu mu bufùki nenùpete Nzambi. Ne Nzambi kutufwanyikija ne mìkòòkò yìdì ne cyà kulombodiibwa ayi. Kacya nukaadiku bamòne kuntwaku, s'mvwa muyiishe diyiisha pa cyòci aci kukaadi cikondo kampànda's? Bwa Nkuci upweka pa Mwànà wa mùkòòkò, bwà kulombola Mwànà wa mùkòòkò, ne Yèyè kuMulombola ku cishiyeelu. Nkuci awu—awu—awu's! Mpindyewu, piikala Mwànà wa mùkòòkò awu. . . Nkuci awu kavwa mwà kwikala mupweke pa nyama wa mùshindù mukwàbò kanà wònsò ewu to, bwalu bìvwa bikèngela bwà bònsò bàbìdì kwikalabò bàà ngiikadilu umwe. Nwamònu anyi? Bu ne Nkuci uvwa mufwànyine kwikila pa mbwa wa diitù, nùnkù's mmumubulukile anyi mukungule, Nkuci pèndè's uvwa mwà kwikala Mupaapàlale muye.

⁹⁵ Èè, mmùshindù ùmwèumwè awu mpindyewu. Ne njila yètù mibolè, Nyuma Mwîmpè Ùdi ànu upaapalala uya. Bìkèngela ciikale ne ngiikadilu umwèumwè awu. Nyuunyi wa mu Maulu, nkuci; nyama mutàmbe kwikala mupolè wa pa buloba, mwànà wa mùkòòkò; bìdì mwà kupetangana. Nènku pàdì Nyumà Mwîmpè ulwa pambidi pèètù ne utuvwija bifùkiibwa bipiyabipyà, dîbà adi Yèyè ùdi mwà kutùlombola. Kàdi twètù tudi tuteeta kwikala ne nsòmbelu umwèumwè wa kale awu, kabyàkukumbanaku to! Kabyàkukumbanaku to.

⁹⁶ Mpindyewu, cidya cyà kumpàla cyukààdiku pàmwàpa mwèle mu nsòmbelu webè, mu kwakula bwà kulombodiibwa, pàmwàpa mbyanza byà *maamù* kampànda mukulakaji. Byanza abi bìdì mwà kwikala bishààla kabiyi binyunga dilòòlò edi, mu nkita emu mwaba kampànda, kàdi's ki byanza byàkukukwata bwà kukwelesha cidya cyèbè cyà nzananza mbyòbì abi.

⁹⁷ Pashiishe paanyimà pàà maamù mumane kukulongeshà mwà kwenda, nènku uvwa mwà kwela ndambù wa bidya pashiishe kudishinda, ne kujuuka, kàdi pèèbè's uvwa wela meeji ne uvwa wenza bintu binènè, pashiishe kukufilaye kùdì *mulongeshi wa kàlaasà*. Ki dîbà adi kubangaye kukulombola ku dilonga dyà tulaasà; bwà cyùdi ne cyà kwenza ne mùshindù wà kucyënza, ne mùdi ne cyà kuyiila, ne—ne bikwàbò byà bwena abi.

⁹⁸ Pashìishe paanyimà pàà mulongeshi wa kàlaasà mumane kujikija neebè, díbà adi wèwè kwalukila, *tatwèbè* kukutwaye byanza. Pashìishe pààkakutwà tatwèbè byanza, kukulongeshaye pàmwàpa bungèdààmùshingà bwèbè abu; mùshindù wà kwikala ngèdààmùshingà wa ulubuluka, mùshindù wa kwenza maalù mu wówò. Mamwèbè ngwàkakulongesha mwà kwikala mukàjì wa—wa nzùbu, mwà kwipika, ne bikwàbò byà bwena abi.

⁹⁹ Pashìishe paanyimà pàà bamane kujikija neebè, ki *mwambi* webè anyì *mwakwidi* awu kukutwàye byanza.

¹⁰⁰ Kàdi *mpindyewu* udi ukulombola nnganyì? Ki lukonko ndwòlò alu mpindyewu. Mpindyewu, twètù bònsò tudi balombodiibwe kùdì cintu kampànda dilòlò edi. Bikèngela twikale nànkù. Tudi balombodiibwe. Mònaayi!

¹⁰¹ Mpindyewu tùtàngilàayi nsongàalùme ewu...civwa cimupèeshe bwenzeji. Tùtàngilàayi ku...mwena kantu-ku-byanza wa citende ewu mutùdì bafwànyine kumubiikila, bwalu ùvwa mwena kantu-ku-byanza. Ùvwa muntu wa dyàkalenga wa dikema. Tùtapàayi dīsù kùdì balombodi bèndè.

¹⁰² Pàmwàpa, dyàmbedi, mamwèndè ùvwa mumulongeshe bu mwànà wa balùme mutekète maalù àvwaye ne cyà kwenza. Tatwèndè ùvwa mumutuucishe dyàkalenga dyà dikema's, nènku pàmwàpa mumushiile bu—mumushiile bumpyànyì, bwalu yèyè mene ùvwa mulombodi; pàmwàpa tatwèndè ùvwa mufwe, nànkù yèyè ùvwa mwena—mwena kantu-ku-byanza. Ùvwa... Tùmubiikile ne, leelù ewu, bu mwena Kilistò mwena kantu-ku-byanza; anyì, ùvwa mwena kantu-ku-byanza mutèndeledi, ngeela meeji ne aci civwa mùshindù mutàmbe bwîmpè wà kumubiikila.

¹⁰³ Muntu ewu ùvwa mutèndeledi, kàvwakù mwena dyabùlù tò nànsha kakesè. Nènku ùvwa mulongeshiibwe kùdì mamwèndè mùshindù wà kwikala mujaalame, mùshindù wà kwenda, mùshindù wà kuvwala. Ùvwa mulongeshiibwe kùdì tatwèndè, mudimu munène, ne mùshindù wa kwikala muntu wa dyàkalenga; ne mudimu wèndè ùvwa wènda bìmpè. Nènku taatù ne maamù bàvwa bakoleshiibwe mu èkèleeziyà, ne bamufunkwine mwakwidi. Nènku mwakwidi ùvwa mumuvwiye mutèndeledi wa bushùwà. Ki bwà cinyi ùvwa muntu mulenga wa dikema mupiluluja, ùvwa nsongàalùme wa maalù mîmpè mwikàle ne ngiikadilu mwîmpè.

¹⁰⁴ Piikalabi ne Yesù Kilistò wàkamutàngila ne kumunanga, kuvwa cintu kampànda pa bwalu bwà mwànà wa balùme awu civwà cilelèlè. Cyà bushùwà's. Bwalu Bible mmwambe mwab'ewu, tudi tusangana mu Maako ne: "Nènku Yesù ùmutàngila, wàkamunanga." Èyowà: "Yesù ùmutàngilà, e kumunanga." Ki bwà cinyi kùdì ne cyà kwikala cintu kampànda cyà pabwaci menemene bwà nsongàalùme ewu. Ùvwa...ùvwa

ne ngiikadilu mwîmpè, ne ngiikadilu mwîmpè wa ukoka ntema yà bantu. Ûvwa muntu uvwa mukolèshîibwe bîmpè; wa meeji, wa meeji matwè, wa mamanya a mu mutù, utanta mu mudimu, ne muntu mutèndeledi. Ûvwa ne mulongolongo wà ngiikadilu mîmpè yivwà yà pabwayi, mu mùshindù wà ne byàkakòka ntema yà Yesù Kilistò Musùngidi. Kàdi pààkakungamanganaye ne bwalu bwena diìnà, mwikale utanta mu maalu makwàbo ònsò aa . . .

¹⁰⁵ Kakuvwa cìvwa kaciyi cyenda mu cyòci to; ùvwa musonga bîmpè menemene, mu cipidi cikumbàne, wa meeji, mulonge tulaasà tujaalame, ditanta dyèndè, ùvwa wa meeji matwè, mwena kantu-ku-byanza mwîmpè, pàmwàpa ùvwa wa ku cisumbù kampànda cyà beena kantu-ku-byanza bàà mu mwaba kampànda mu Pàlèstinà amu. Ûvwa mufwànyine kwikala mu bwobùmwè bwàa beena kantu-ku-byanza bu mutùdi naabu mwaba ewu dilòlò edi emu, kakuyi mpatà to mmùvwàbi, bwalu mwena kantu-ku-byanza ùtu misangu yònsò ànu mu bwobùmwè ne mukwèndè, muntu ne mukwèndè.

¹⁰⁶ Bwalu ànu bu mudi “nyuunyi yà masàlà mafwànàngane,” yidi ne maalu a kwakula. Nènkù pìikala eci. . . Batèndeledi, kî mbaswè kwakula bwà muntu mwena cinwìnu cyà maala ne. . . bàkula bònsò pamwè to, bwalu kabeena ne cintu nànsha cimwè mu bwobùmwè to. Bìkèngela twikale ne bintu bîmwè. Pa nànkù beena Kilistò bàdi ne bintu bîmwè ne beena Kilistò; bangènzàmpèkààtù bàdi ne bintu bîmwè ne—ne bangènzàmpèkààtù; ne—ne tusumbù twà bantu basungùlùke, ne cyònsò cìdibo aci, badi ne bintu bîmwè. Nènkù pàmwàpa nsongààlùmè wa citende ewu ùvwa wa mu bwobùmwè bwà—bwà beena kantu-ku-byanza.

¹⁰⁷ Nènkù ùvwa mutèndeledi ne mwèndè pèndè mwònsò, bwalu Yesù wàkamwela lukonko mwab'ewu, kwambayè ne: “Mémè ntu mulame mèyi matùma aa, muàtumikilè ònsò ànu kacya ku bwànà bwànyì.” Ncyà bushùwà.

¹⁰⁸ Nwamònu's, yèyè ùvwa mukolèshîibwè bîmpè, mulongèshîibwè bîmpè, ne bikwàbò byònsò. Kàdi pààkakungamanganaye ne—ne meeji à Mwoyi wà Cyèndèlèlè. . . Mpindyewu ndi muswe bwà nwènu kumòna ne, ne ngiikadilu yònsò uwaye nendè ewu, nànsha nànkù ùvwa mumanye ne kàvwa ne Mwoyi wà Cyèndèlèlè to.

¹⁰⁹ Mpindyewu, tusumbù twètù twònsò twà bantu, èkèleeziyà wetù, buumambala bwètù ne bintu bitùdi bangate ne musinga mukolè, tusumbù twètù twà beena Àmèrikè, ne bikwàbò byònsò, s'mbilenga be, kakwena cintu nànsha cimwè cyà kwamba pa byòbì abi to. Nènkù kasumbù kèètù kàa Beena Kilistò bà Kantu-ku-byanza aba, ncintu cinène, citu nciibi cingunzulwila mémè bwà. . . pa meeji àànyì à pambelu pàa cyena mangumba à ne “tudi beena Kilistò.”

¹¹⁰ Kakwena muntu nànsha umwe (dingumba nànsha dimwè) didi mwà kutùnana bu bàadi, kunana mwena Kilistò mulelèlè to, bwalu udi cintu cyà Nzambi. Mangumba mmenza kùdi bantu, ne bwena Kilistò mbutumibwè mu Dyulu. Kàdi mu maalu ònsò atùdi naawu aa, nànsha mudiwu malenga amu, malenga ànu mutùdi tudisanga emu, ne masangisha malenga ànu mutùdi naawu emu, dyumvwangana dyà buwètù ditùdi naadi edi, nànsha nànkù tudì muntu ne muntu bakùngàmàngana ne *Mwoyi wà Cyendèlèlè*. Nènku nànsha twètù batante mu mudimu bishi, nànsha twètù batante bishi, ne nànsha biikale cidimba cinène cyà èkèleeziyà cyà bishi, ne mutùdi tukwata mudimu, mutùdi tuteeta kwenza maalu mu mùshindù mujaalame, nànsha nànkù, byòbì kabiyi byenza mu mùshindù mujaalame to, cidi ndikuukwila dyà Nzambi mu cyanààna.

¹¹¹ Yesù wàkacitèeka mu mùshindù ùmwèùmwe awu, bu mûndi ngiimana kaaba aka bwà katanci kakesè. Yèyè ne: “Mmu cyanààna munùdi nuNkuukwila, nulongesha mèyi matùma à bantu bu dilongesha.” Mpindyewu elanganaayi meeji! Dikuukwila dyà meeji matòoke, dyà kweyemena (ne meeji matòoke à mu mwoyi wèbè) kùdi Nzambi, kàdi diikale ànu dyà patupù! Byàkabanga mùshindù awu ne Kaayinà, mu budimi bwà Edena. Dikuukwila dyà meeji matòoke, kàdi dyàkabèngiibwa’s! Mutèndeledi wa dikema, kàdi mubengiibwe ànu’s!

¹¹² Mu Shreveport lumingu lushààle elu, lumingu lwà kumpàla kwà lushààle elu, ku disangisha dyà Beena Kantu-ku-byanza, cyàkudyà cyà dindà kuntwaku kùvwà nkàmà ne nkàmà yà bantu midikungwije, Mèmè kwangata mèbà àbidi ne citùpà bwà kwakula pa: *Kwenzela Nzambi Mudimu Kabiyi Diswa Dyà Nzambi To*. Mpindyewu, aci cidi cyumvwika cyà pabwàci, kàdi bidi bikèngela bwà twètù kudyelà mu kajila kalongolola kàà Nzambi ne mùshindù wa dicyenza wà Nzambi. Nànsha twètù twela meeji ne ncyà bushùwà bishi, bidi bikèngela ciikale bilondeshile Dìyi dyà Mukalenge bwà cyanààna cidi ànu cyanààna. Kaayinà wàkakuukwila, kàdi kabivwa bilondeshile Dìyi dyà Mukalenge to. Bafaalèsà bàvwa bakuukwila, kàdi kabiyi bilondeshile Dìyi dyà Mukalenge to. Nènku mu edi diyisha dyà pabwàdi edi dyà ku Beena Kantu-ku-byanza, ki mèmè kulongesha nùnkù.

¹¹³ Davidi, wàkaswa bwà kwenzela Mukalenge mudimu, ne yèyè uvwa mubinge mu ciwaye mwambe aci. Yèyè ne: “Mbimpè bwà mushèète wà cipungidi wà Mukalenge kwikalawu kuntu kwaka anyi? Tuwùbandishaayi kuneeku.” Mu matùkù à mfùmù, mfùmù mukwàbò wàkabikulayè awu. Yèyè ne: “Ki mbimpè to. Kabààkakonkaku Mukalenge ku mushèète wa cipungidi to, kàdi tudì ne cyà kucyèza.” Mpindyewu, aci’s cidi mu cyòci, ki ciwà cikèngela bwà kwenzabò. Yèyè ne: “Bivwa bikèngela twètù kuya kangata mushèète wà cipungidi, bwà twètù kupeta mùshindù wà

kukonka Mukalenge.” Nènku ncyà bushùwà, ùvwa mu ditùnga dikwàbò amu. Yèyè ne: “Bidi bikèngela bwà twètù kuwùtwàla kaaba aka. Kubànda naawu kuneeku bwà kuwùtèèka mu nzùbu wetù ewu, ne kukuukwila Mukalenge.”

¹¹⁴ Mpindyewu mōnaayi yèyè wakaya mu kajila kavwa kakàyi kòkò to bwà kucyènzà. Yèyè kukonka baakàpiteenà bàà masàlaayi makumi ataanu ne bàà nkama ne bàà binunu. Bònsò bààkakonkiibwa, muntu ne muntu. Bu mùvwàci diswa dyà Mukalenge, bimweka bu nànkù, anyi cìvwa n’Dîyì dyà—dyà Mukalenge.

¹¹⁵ Dîyì dyà Mukalenge, misangu mikwabo, bikèngela ùDitèèke mu mwaba Wààdi mujaalame bwà cyanààna kacyna Diswa dyà Mukalenge to. Nwamònu anyi? Mpindyewu aci cipwekeku ne mu ndòndò nènku nenùpete mmwenenu mu—mujimà wa cìndi nteeta kwamba.

¹¹⁶ Ncyèna muswè bwà èkèleeziyà akapòne mu bidyacilu binùdi nupete mu Angleterre mwàmwa abi to: balùme ne nsuki mile, ne kwisù kulaaba bilaabu, ne banyangakaja. Twètù katwèna baswè byà nànkù to! Nànsha ciikàle cyumvwika cyà maalu à butèndeledi à bishi, nànsha Elvis Presley mwà kwimba misambu yà butèndeledi yà bishi, yèyè ùdi ànu démon. Ne mèmè ncyèna nzuji to, kàdi “Ku mamuma àbò nkunwàbàmanyina.” Nwamònu anyi? Yèyè mmwena Mpenta, kàdi aci kacyna ne cìdici cishintulula nànsha cikesè to. Nwamònu’s, mamuma èbè adi afila bujaadiki bwà cyùdi.

¹¹⁷ Nànsha bu Nyumà mwà kulwa pambidi pèndè, ùvwa mwà kwakula mu myakulu, ùvwa mwà kwela mbila, ùvwa mwà kwondopa babèèdi, ne Yesù kwamba ne: “Bààbùngi bàà kùdìbo nebàlwe Kùndi mu ditùkù adi, bàmba ne: ‘Mukalenge, mèmè ewu ncyakenza *cikampànda* ne *cikansanga* anyi?’ Nènku Nèngàmbe ne: ‘Ngumukilaayi apa, nwènu benji bàà bubì, kacya ncitu munùmanyeku to.’” Nwamònu anyi?

¹¹⁸ Bidi bikèngela bwà twètù kwikala beena Kilistò balelèlè, bashùwashùwale, nènku mùshindù umwèpelè utùdi mwà kwenza aci nkucikùngamija ne lukonko elu lwà “Mwoyi wà Cyendèlèlè.”

¹¹⁹ Kùdi mùshindù ànu umwèpelè wà Mwoyi wà Cyendèlèlè, ne wòwò awu ùdi ùfumina kùdi Nzambi. Ne Yèyè wàkadyànjila kulongolola cìfukùibwa cyònsò cìvwa cìfwànyine kuWùpeta aci. Ànu mùvwà wèwè mutòloku munda mwà tatwèbè amu, uvwa mutòloku munda mwà Nzambi; cìmwè cyà ku byambiibwà Byèndè ku cibangidilu, bwà cyanààna kwàdyàkwikala Kwaka to. Wèwè udi mufumine ku budimi bwà dyela mamiinu bwà mamwèbè; tatwèbè kavwa mukumanye to, uvwa mu twonyi twèndè. Nènku paùdi upatuka mu budimi bwà dyela mamiinu bwà maamù abu, dībà adi udi ulwa muntu ne udi mwenjiibwe mu cimfwànyì cyà tatwèbè, mpindyewu udi mwà kubwela nendè

mu bwobùmwe. Nènku cintu cìmwècìmwè aci kùdì Nzambì, pawikala ne Mwoyi wà Cyendèlèlè.

¹²⁰ Mwoyi wùdì ubwelamu awu, mwoyi wa mu bufùki ewu, mwoyi wa mubidi, ùvwà ngwà kùdì tatwébè awu. Ne mùshindù umwèpelè wùdì mwà kulediibwa cyàkàbidi, ki mùshindù umwèpelè, ngwà ne ùdì ne cyà kufùmìna kùdì Taatù webè wa mu Dyulu, byambiibwa Byèndè. “Bònsò bàdì Taatù muMpèèshe nebàlwe kùNdi.” Nwamònu anyi?

¹²¹ Udi mwab'ewu bwalu dìnà dyèbè dyàkafundiibwa mu Mukàndà wa Mwoyi wà Mwànà wa mùkòòkò kumpàla mene kwà kwikalaku difùka dyà dyulu ne buloba. Ncyà bushùwà menemene. Wèwè udi mutòloku, mutòloku wa nyumà wà kùdì Tatwébè wa mu Dyulu, citùpà cyù Dìyì dyà Nzambì. Ki mudibi nànkù, ànu múnkaadi mwambamba ne, dībà adi wèwè uvwa ne Yesù pavwaYe pànwapa bwalu Yèyè ùvwà Dìyì: wàkakènga Nèndè, wàkafwà Nèndè, wàkajikiibwa Nèndè, ne wàkabìlka Nèndè ku lufù, ne mpindyewu udi musòmbe mu myaba yà mu Dyulu *munda* Mwèndè!

¹²² Mònaayi, Davìdì wakeela meeji ne maalu ònsò avwa bîmpè, ki kukonkaye bantu bònsò aba, ki bòbò bònsò kubangabo kuja maja ne kwela mbila ne mikunda mikolè. Bàvwa ne nkwaka yààbo yònsò yà butèndeledi yìvwaku ayi, kàdì nànsha nànkù kacìvwa ànu diswa dyà Nzambì bwà kupweka ne kwaluja Dìyì dyà Nzambì ku nzùbu wa Nzambì to. Kàdì, nudi numòna's, Nzambì misangu yònsò (mu bikondo byònsò) ùtu ukwacila mudimu mu mùshindù umwèpelè. Dyèndè dipangadika dyà kumpàla adi ke dipangadika Dyèndè dimwèpelè, bwalu Yèyè mmupwàngane mu mapangadika Èndè. Yèyè kèna wenza cintu nànsha cìmwè padiYe kàyi mwanji kucibulwila dyàmbedi basadidi Bèndè, bapròfetà to. Aci mmwòmò menemene.

¹²³ Ki bwà cinyi eci, cikondo cyà èkèleeziyà citùdimu ne mwoyi eci, kakwena èkèleeziyà nànsha umwe, Méthodiste, Baptiste, mwena Mpenta, anyi nî ncinyi cìkwàbò, udi mwà kufikisha Èkèleeziyà ewu mu Mukàji-musèla to. Nebikèngele bwà Maalàki 4 kwikalaye dyandamuna, bwà Nzambì kutumaye mupròfetà bwà kubuuludiibwaYeku, bwalu ki mùshindù umwèpelè ngòwò awu. Èkèleeziyà yètù mmidyenze mangumba ne mikabweje cintu mu bukooya ne cibwejàkàji, ànu mùtùbo misangu yònsò amu, ne Nzambì ùtu misangu yònsò ànu ùtùma bapròfetà.

¹²⁴ Nènku Naatànà's ùvwàku mu ditùnga amu, mupròfetà mushindika kumpàla kwà Nzambì, ne kabààkamukonkakù nànshà to.

¹²⁵ Nènku kupwekabo kuntwaku ne kufwishabo muntu wa kweyemena, ne bikwàbò, ne kwangatabo mushèete wà cipungidi. Pamutù pà kuwutèèkabò pa makaaya à beena Lewì, bwà

kuwambula, bàakawùtèèka pa ditempu bwà kuwambula. Kunyangakajabò byònsò's!

¹²⁶ Nudi numòna's, wèwè kuyi wenza bilondeshile diswa dyà—dyà Nzambì to, ne mùshindù ùdi Nzambì mutupe bwà kwenza awu, bàdi bàCìvwija bukooya ne baCibweja mu bulongolodi kampànda, dingumba, diyisha kampànda, nènku ki nwènù bayaaya abu's. Nwamònu anyi? Bitu misangu yònsò ànu byenzeke mùshindù awu.

¹²⁷ Ncintu cìmwècìmwè aci cyàkakungamangana naaci nsongààlùme ewu. Yèyè wàkabwela; ùkaavwa ci—ci—cidimba pàmwàpa cyà Bafaalèsà anyi Basadoka, anyi mulongo munène kampànda wà ditùkù adi. Ùvwa mutèndeledi ànu ne mwèndè mwònsò. Yèyè ne: “Mèmè ntu ngenza mèyì matuma aa àngààkalongeshiibwa, kacya ànu pàncìvwà mwànà.” Nwamònu anyi? Ne Yesù wàkamunanga bwà ciine aci. Kàdi yèyè wàkabenga kulombodiibwa, wàkabenga kwitaba kulombodiibwa kwà bushùwà kwà Yesù Kilistò bwà kumupa Mwoyi wà Cyendèlèlè.

¹²⁸ Mònaayi, ùvwa mwitabuuje ne kuvwa cintu kampànda cishìilàngàne ne civwaye naaci, bwà cyanààna kàvwaàku mufwànyine kwamba ne: “Mulongeshi mwìmpè, cìndi ne cyà kwenza mpindyewu ncinyi?” to.

¹²⁹ Nwamònu's, ùvwa muswè kudyènzela cintu kampànda. Ki mùshindù utùtù twètù twenza ngwòwò awu, tutu baswe kudyènzela cintu kampànda mu twètù. Dipà dyà Nzambì ndipà dyà ku bitupu. Nzambì ngudi ukupèèshaDì, kwena ne cyùdi wenza bwàDì to. Yèyè wàkakulongolwelaDì, nènku wèwè nèuDipetè. Nwamònu anyi?

¹³⁰ Mònaayi, yèyè ùvwa mumanye ne Dìvwakù. Ùvwa muDitàbùùje ne ùDìjìnga. Kàdi pààkakungamanganaye ne mùshindù uvwabi bikèngela bwà yèyè kucyenza, bìvwa bishìilàngàne ne mishìngà yèndè. Bìvwa bishìilàngàne. Ùvwa mwà kulama mfranga yèndè ne kushààla wa mu èkèleeziyà uvwàye wa mwòmù awu, ne bikwàbò. Kàdi Yesù ùvwa mumanye aci, ne mumanye ne yèyè ùvwa mubùte mfranga eyi, ke Yèyè kwamba ne: “Nda usumbishe byònsò byùdi naabi, ne ubipèèshe bapèlè. Nènku ulwe, wambule nkuruse webè ùNdòndè, nènku newikale ne mabanji mu Dyulu.” Kàdi yèyè kavwa mwà kucyenza to.

¹³¹ Balombodi bakwàbò bàvwàye nààbo mu matùkù èndè à bunsònga abu, bavwa ne bwenzeji bwàbùngi pa yèyè mu mùshindù wa ne wàkabenga kwitaba Njila mulongolola wa Nzambì, uvwa Yesù Kilistò awu; Umwèpelè udi mukwàte Mwoyi wà Cyendèlèlè, Umwèpelè udi mwà kukupèèshaWu. Kì ng'èkèleeziyà udi mwà kukupèèsha Mwoyi wà Cyendèlèlè to; kì mmutumba neebè to; kì mmpaasàtà webè to; kì mmwakwidi

webè to; kî ntwitabàayi webè to; ànu Yesù Kilistò Nkaayende ke udi mwà kukupèesha Mwoyi wà Cyendèlèlè. Yèyè's ke . . .

¹³² Nànsha wèwè mwîmpè wa bishi, cyûdi mulekele kwenza aci, cyûdi mubange kwenza aci, bikèngela witabe *Mupersona* wà Mukalenge Yesù Kilistò. Ne pashiishe paûdi wenza aci, Yèyè ûdi Dîyi, ne dîbà adi nsòmbelu webè ûdi ukumbanangana ànu menemene ne Dîyi ne Didi diDimwènesha bwà cikondo cyûdi ne mwoyi eci.

¹³³ Byàkakèngela bwà Noà kwenzaye aci bwa Dîyi kumweneshiibwadi mu cikondo cyèndè. Mpindyewu, kàdi bu ne Môsà wàkalwa, kwamba ne: “Tudi bamanye cyàkenzà Noà, netwàngate dîyi dyà Noà. Netûcyènzè ànu mwàkacyènzà Noà amu. Netwenze bwà—bwâtù bwà twètù kulèlema pa Musulù wà Nil, ne kupâtuka mu Ejiipitu”? Mòna's, kacivwa cifwànyine kukùmbàna to. Nwamònu's, aci's civwa ncikondo cikwàbò.

¹³⁴ Yesù kavwa mwà kwikala mulwe ne mukenji wà Môsà to; Luther kavwa mwà kulwa ne mukenji wa Kàtòlikè to; Wesley kavwa mwà kulwa ne mukenji wa Luther to; Mpenta kavwa mwà kulwa ne mukenji wà cikondo cyà Wesley to. Ne Mukàji-musèla kèna mwà kwenjiibwa mu dingumba dyà beena Mpenta to, nànsha kakesè. Nènku aci's ncyà bushùwà menemene. Yèyè mmumane kudyenza bulongolodi ne mupatuke mwab'ewu, nènku's kî yèyè awu musòmbe, ànu bu mîkwàbò yònsò ayi. Ncizubu. Ànu mùdi mwoyi upatukila mu . . . Nwamònu anyi?

¹³⁵ Mufùndi awu, mûmvwà ngamba dilòlòlò adi, mufùndi wàkafùnda mukàndà ewu awu . . . Nènku kabîyi ne mbwalu yèyè mmundyule bikolè to, wamba mûmvwà “démon, bu ne kuvwa cintu bu nànkù.” Pa nànkù kwambaye ne kavwa mwitabuuje Nzambi to. Yèyè ne: “Nzambi uvwa mwà kuvunga mabòko Èndè kàdi kwimana ne kutàngila bafwile diitabuuja abu, mu bikondo byà mbangilu abi, kàdi kwamba mudiye ne bukolè bwà kukangula Mbû Mukùnze, ne kulekela bakàji abu ne bânà bàbàsunsulula kùdi nyama yà ntambwe ne bikwàbò, ne pashiishe kwamba mûvwàYe Nzambi wa dinanga.” Yèyè ne: “Kakùtu cifukùibwa bu nànkù to.” Nwamònu's, muntu awu, kàyi ne disonsodiibwa dyà Dîyi to, upanga kuCimòna.

¹³⁶ Lutete lwà kumpàla lwà blé, Mubàki, byàkakèngela bwà kumatalu mu buloba bwà kujuukalù cyàkàbidi. Ki mwàkenza kabidi Mukàji-musèla wa kumpàla wàkalediibwa ku Mpenta awu byàkakèngela bwà kupicilaye mu Bikondo byà Midimà bu mùdi dimiinu kanà dyònsò edi, kujiikiibwa. Bivwa bikèngela bwà kufwàbo. Bàvwa ne cyà kwenza nànkù. Kàdi dyàkabanga kupâtula cyàkàbidi kabeji mu Luther, mu dilongolola dyà kumpàla. Kabivwa bîfwànàngane ne dimiinu dyàkabwela mu buloba to, kàdi divwa m'Bukênkè bwà ditùkù adi. Ki cicolakola aci kutungunuka e kubwela mu mwepu, Wesley. Nènku kuumukila ku mwepu kubwelaci mu Mpenta, cizubu.

¹³⁷ Paùdi umòna mu blé, padiye upàtuka, lutete lwà blé, muntu ukààdikù mukune blé, udi upàtuka ukamòna mmwenekelu wa blé awu mwômò amu, udi umweka ànu menemene bu lutete. Kàdi bu wêwê mwà kwangata lukwàtu ne kusòmbela panshi bwà kwangata blé awu ne kumubuulula, kamwena lutete nànsha lwà kànà to. Cìdi ànu ncizubu pa cizubu. Ne pashiishe cinyi? Cìdi—cìdi cìdivunga mwaba awu, bwà kulama lutete. Nwamònu anyi? Nènku pashiishe, katanci aka anyi, mwoyi ùdi uumuka mu—mu—mu cìkolakola aci bwà kubwela mu mwepu; uumuka mu mwepu ubwela mu cizubu; ùdi ùmuuka mu cizubu ùkabwela mu blé. Bitùpà bisàtù, nwamònu's, byà cyôci aci. Ne pashiishe ùdi wènza Blé *pambelu* pà bitùpà bisàtù abi (Luther, Wesley, Mpenta). Ànu menemene. Nwamònu's, kakùyì mpatà to. Kwèna mwà kwimanyika bufùki to.

¹³⁸ Mpindyewu tàngilààyì, bidimu byònsò bisatu paanyimà pàà Mukenji mumane kupatuka mutuma kùdi Nzambi, bàdi benza bulongolodi. Eci cìkaadi cyenzà bidimu makumi àbìdi, kàdi kakwena bulongolodi to. Kabwàkwenzeka to. Nwamònu anyi? Mpindyewu cizubu cidi ne cyà kuumuka, kushiila Blé mpùngà bwà kudyàdijaye kumpàla kwà Mwànà, bwà kuboba; Mukenji wàlukila buludi mu Èkèleeziyà cyàkàbìdi, munkaci mwà kufwimba Mubidi wà Yesù Kilistò ànu bu Yèyè wa kumpàla wa ku cibangidilu wàkabwela mu buloba awu. Mpindyewu, bwà kumòna Mwoyi wà—wà Cyendèlèlè.

¹³⁹ Mwoyi, ncyà bushùwà ne ci—cìkolakola cìvwaku eci cìvwa cyambùle Mwoyi. Cyà bushùwà, ke muvwabi. Kàdi, nudi numòna's, pààkalwàci cìkolakola ne kujikaci, bulongolodi abu, Mwoyi wàkaya buludi mu Wesley; kupatuka buludi, kubwelamu. Musangu kampànda, yònsò wa kudìbo. . . Ewu, dibèji dinène, kàyì mufwànàngane ne lutete to. Kàdi pààkalwa bungungu bukesè abu, bwenze bu. . . pa—pa cizubu. . . anyi pa cìkolakola, bungungu bwà mwepu abu, mbufwànàngane bikolè menemene ne lutete. Kàdi padìbi bikafika ku cizubu aci, apu's ng' ànu lwòlò menemene.

¹⁴⁰ Yesù kààkambaku ne: “Mu matùkù à ndekeelu” (Maatààyì 24.24) “bìbìdi abi mbifwanyine kwikala bitwàngane nkùndù mu mùshindù wa bifwanyine kuseeswisha ne mifungu mene, midyanjila kulongolola, Basungula Abu's, bu ne bivwa mwà kwenzeka anyi”? Cyàmba kufwànàngana ne cintu cilelèlè, nwamònu's. Pa nànkù, mu matùkù à ndekeelu. Mpindyewu, nudi numòna's, ncikondo cyà blé mpindyewu. Tukààdi cikondo cyà dinowa. Eci kì ncikondo cyà Luther to, eci kì ncikondo cyà Mpenta to, eci ncikondo cyà Mukàjì-musèla.

¹⁴¹ Bu mwàkabiikila Mòsà ditùnga bwà kupàtuka mu ditùnga, leelù ewu Kilistò ùdi munkaci mwà kubiikila Èkèleeziyà bwà kupàtuka mu èkèleeziyà, nudi numòna's; cintu cìmwècìmwè aci mu cìfwànyikijilu, ùya naabu ku Buloba bwà butùmbi Bulaya bwà Cyendèlèlè.

¹⁴² Mpindyewu, kubenga Muntu udi wenza dibìikila awu, Kilistò, nànsha wèwè mwikale mwena Mpenta, Méthodiste, Luther, cyònsò cyùdi aci, bikèngela bwà... Eci cikondo! Ncyèna naabo bwalu to, nànsha bwà mafi, kàdi mu eci cikondo *mpindyewu* bidi bikèngela bwà nwènù kwitaba (ànu mwàkenzabo mu cikondo aci amu) Mupersona wà Kilistò udi mwikale Dîyì edi!

Ku cibangidilu kwàkadi Dîyì, ne Dîyì dyàkadi ne Nzambi, ne Dîyì dyàkadi Nzambi.

Ne Dîyì dyàkandamuka mubidi, ne dyàkasomba munkaci mwètù, ...

...umwèumwè awu makèlèlèlè, ...leelù, too ne kashidi.

Ebèlu 13.8. Nwamònu's, udi ne cyà kwitaba Mupersona wà Mwoyi wà Cyendèlèlè awu!

¹⁴³ Mpindyewu, Mwoyi ùvwà naawù Luther, ùvwà ndibingishiibwa. Wesley ùvwà ne dijidiibwa, disàkidilaku. Mpenta ùvwà ne dyalujulula dyà mapà àvwà àlukilamù awu, masàkidilaku. Kàdi mpindyewu cikaadi cikumbanangana cyònsò mu mubidi, nudi numòna's, bitùpà byàci bisàtù, nènku mu cyòci aci... Dîbà adi, pàalwa dibìika dyà ku lufù, Mwoyi wàkasòmbela mu ba-Luthériens abu awu, wàkapatuka awu, Mwoyi wàkasòmbela mu ba-Méthodistes ne wàkapatuka awu, Mwoyi wàkabwelà mu beena Mpenta awu, newùpatuke mu buloba wàmbwibwa ónsò mu Mubidi wà Mukàji-musèla bwà kwangaciibwa kuya kumpàla kwà Yesù Kilistò. Butùmbi kùdi Nzambi's wè! Kaa, s'mbyà bisalulangana's wè! M'Bulelèlè!

¹⁴⁴ Tudi biibàke ditumba! Tudi batangile ku Dyulu, bindile dilwa adi; Mùsongà pa Cipaapu cyà musàkà, mutùdi bafwànyine kwamba, dyalukila Dyèndè adi's! Èkèleeziyà ùdi ne cyà kwikala mubiike ku lufù àbidi aa, nènku tudi ne cyà kudilongolola.

¹⁴⁵ Nènku mùshindù umwèpelè wùdiku mwà kudilongolola awu, kí ngwà kwamba ne: "Èè, mèmè's ndi mwena Assemblées. Ntu wa mu ba-Unitaires, ba-Binitaires," anyi cyònsò cidiku aci, bònsò abu ne: "Mèmè ndi mwena Église de Dieu," aci kacýèna ne cidici cyùmvwija to. "Baatatwètù's bavwa beela mbila ne baja maja," abi's bidi ànu bimpè nememene, aci's civwa *ndyàbo* ditùkù. Kàdi *leelù wa ndaaya* kwenà mukungamangane ne bulongolodi bwàkenzàbo abu to, kàdi nne Mwoyi ùdi munkaci mwà kutùngùnuka, wùdi Yesù Kilistò.

¹⁴⁶ Nsongàalùmè ewu uvwa mwenze cintu cìmwècìmwè aci. Mòsà ngwakafùnda mèyì matùma awu. Kàdi, nudi numòna's, Nzambi umwèumwè wàkafùnda mèyì matùma awu, ku mupròfetà Wendè, civwa ncintu cìmwècìmwè cyàkambà cipròfetà cyà ne ditùkù adi divwa mwà kulwa ne: "Nènjülè Mupròfetà mufwànàngane naanyi. Nènku nebyenzeke ne bònsò bàdi kabàyi baMuteeleja nebùumushiibwè"; nebàdisangane

mu bizubu byà cyena màngumba ne mu myepu. Badi ne cyà kutùngùnuka too ne ku Mwoyi. Kàdi leelù ewu, kwambi ne: “Ndi mwena Mpenta. Ndi wa mu *cikampànda*, ndi wa mu *cikansanga to*.” Aci kacyena ne cìdici cyùmvwija to. Bidi bìkèngela bwà witabe Mupersona Kilistò, Mwoyi wà Cyendèlèlèlè. Cidi cìkungamangana ne umwe ne umwe wa kutùdi! Kanùpu aci mwoyi to.

¹⁴⁷ Balombodi bakwàbò, nudi numòna’s, bàvwa ne bwenzeji bukolè pa yêyè’s. Bantu bààbo mbalongeshiibwe ne: “Èè, twètù tudi beena *cikampànda*, ne tudi beena *cikansanga*,” nènku biikale ne bwenzeji bukolè pa yêyè apu. Kàdi ncintu kaayi cyà kabùtù, bwà kubenga kulombodiibwa kwà Mwoyi wà Cyendèlèlèlè!

¹⁴⁸ Mpindyewu, Mwoyi awu udi kaaba aka dilòlòlò edi. Ncyà bushùwà. Nyumà Mwimpè udi kaaba aka, udi mwikale Kilistò mu mmwenekelu wa Nyumà; Nyumà Wendè, dilaabiibwa didi kaaba aka.

...mu katanci kakesè emu, bàà pa buloba kabàakummòna kàbidi to; kàdi nvènù nenùmmone:...

...Bwalu Nèngiikalè neenù, munda mwènù mene, too ne ku dikumbana dyà maalu ònsò, too ne ku ndekeelu wa buloba.

¹⁴⁹ Yesù nkààyendè ngudi mwà kukulombola ku Mwoyi wà Cyendèlèlèlè awu. Kakwena èkèleeziyà nànsha umwe, dingumba nànsha òmwè, muyiishi nànsha umwe, nsaserdose nànsha umwe, cintu cikwabo nànsha cìmwè kacyèna mwà kukulombolaKu to, udi ne cyà kulombodiibwa kùdiYè, Umwèpelèlè udi mwà kukulombola awu.

¹⁵⁰ Nudiku mwà kudifwànyikijila Yêyè unulombola pambelu pà Dìyì Dyèndè, diine didi diikale Yêyè awu adi anyi? Nènku pùikalabi ne Yêyè ùdi Dìyì, ne wêwè mwikale citùpà Cyèndè, kwènàku muswè kwikala citùpà cyà Dìyì anyi? Dìyì didi Nzambì muswè kupongolwelapu màyi à lupandu leelù ewu, bwà kuMumanyishisha leelù ewu; ànu mùvwà bàpostòlò baMumanyishe, bu mùvwà Luther, bu mùvwà Wesley, bu mùvwà mu bantu bàà mu matùkù awu abu baMumanyishe. Eci ncikondo cikwàbò. N’Dìyì! Dìyì ndyambe ne bintu bitùdi tumòna byenzeka mpindyewu ebi, mbidyanjila kwamba ne nebyenzeke mu dîbà edi. Pa nànkù itaba Yesù Kilistò ne Mulekele àkulombole ku Mwoyi wà Cyendèlèlèlè.

¹⁵¹ Nànsha mukààvwayeku mukumbaje, nsongààlùmè ewu... Ùkaavwaku mukumbaje maalu mimpè ònsò. Mu kàlaasà, ùvwa ànu wa maalu malenga. Yêyè bu mwànà wa balùme mwimpè, kakùyì mpatà to, ùvwa mwimpè. Bu taatù mulelèlè... Mu dìteeleja dyà tatwèndè mu mudimu, ùvwa mwànà wa balùme mwimpè—mwimpè. Mwimpè kùdi baledi bèndè. Ùvwa ne lulamatu kùdi mwakwidi wèndè. Ùvwa ne lulamatu kùdi

èkèleeziyà wendè. Ûvwa ne lulamatu ku mikenji yà Nzambì. Kàdi wàkajìmija cintu cyà citambe bunènè, ne bikwàbò abi kabyàkamwenzela menemene bwalu to pàakabengaye kulombodiibwa kwà Mwoyi wà Cyendèlèlèlè, Yesù Kilistò.

¹⁵² Mònaayi! Eku kulombodiibwa nkukùngàmàngane ne muntu ne muntu wa kutùdi leelù ewu, cintu cimwècimwè mwàkenzàci nsongààlùmè awu, twètù. . . nànsha twètù biikale batèndeledi bàà bishi. Udi mwà kwikala mwena Kàtòlikè, udi mwà kwikala Baptiste, Méthodiste, anyi udi mwà kwikala mwena Mpenta, anyi cyònsò cyùdi aci, cintu cimwècimwè eci ncikùngàmàngane neebè dilòòlò edi: Mwoyi wà Cyendèlèlèlè, mbwena kwamba ne, diitaba dyà Yesù Kilistò. Tudi bapèèbwe mpùngà ewu.

¹⁵³ Misangu mikwàbò mu nsòmbelu bikèngela tùkungamanganè ne cintu ànu bu mwakenza nsongààlùmè ewu amu, bwalu wèwè udi muntu wa cifwàkà ne udi mupèèbwe—udi mupèèbwe mpùngà wa kusungula. Udi ne disungula. Nzambì mmucyènzè mu mùshindù wà wèwè kumòna mwà kusungula. Piikalabi ne Yèyè wàkateeka Adàmà ne Evà pa budishikaminyi bwà disungula bwà bààmòna mwà kusungula, ne pashiishe kwenzabo disungula dibi, nènku, nwamònu's, Yèyè kèna mwà kukwenzela cikwàboò citàmbe cyàkabenzelaYè aci to. Bikèngela bwà Yèyè kukuteeka pa cintu cimwècimwè aci bwà wèwè kumòna mwà kusungula anyi kubenga.

Udi ne disungula. Tutàngilààyi bàmwà bàà kudibo:

¹⁵⁴ Wèwè udi ne disungula, bu nsongààlùmè, ní wikala mwà kulonga kàlaasà anyi to. Udi ne disungula adi. Udi mwà kuswa bwà kwikala ànu ne “ncyèna ànu naaci to,” udi ànu mwà kucibenga.

¹⁵⁵ Wèwè udi ne disungula dyà kwenza bwà didìtwàla dyèbè. Bwà apa néntapèku ku mwoyi ndambù. Nwamònu anyi? Udi mwà kupatuka kàdi kulekela nsuki yèbè yishààla dilùmbalùmbà ne kwikala Muyàpàndi anyi cimwè cyà ku binyonga ebi.

¹⁵⁶ Anyi nwènù bakàjì, nudi mwà kwikala ne mmwenekelu wa—wa muntu wa kaneemu anyi nudi mwà kwikala umwe wa ku bifukiibwà byà luncimba bitùdi naabi myaba yònsò eyi, byà bishiye mèsù bleu abi's. Ne nsuki mikosa bisuba byà mbonkòdi ne bikwàbò, bìdi kabiyyi bipetangana menemene ne Dìyi dyà Nzambì to, kakùyi mpatà to biikale bibengangana; nànsha mwà kwenza. . . kabàyi nànsha mwà kwenza disambila dyà diitabiibwa to. Aci's m'Bulelèlè. Aci's ncyà bushùwà menemene. Ki cidi Bible mwambe.

¹⁵⁷ Kàdi cidi cikwenzekele ncinyi's, èkèleeziyà? Ûkaadi mumònèmòne byàbùngì byà ku télévision, bintu bùngì cyanààna byà pa buloba, mbipepèlè menemene bwà ngiikadilu webè wa kale wa Adàmà awu kwongolokaye kuya mu byòci abi, bwà kwenza maalu bu bakwàbò bònsò.

¹⁵⁸ Swayiku ngambulule eci cyàkàbìdì's! Mu kosher, mu mulambu wa—wa—wa difuta dyà cibawu mu matùkù à Mòsà, pààkapatula Mòsà bânà, kuvwa ne cyà kwikala matùkù mwandamutekete àvwàbo kabàyi ne cyà kusangana lwevenyi nànsha lukesè munkaci mwà bantu. Muntu yònsò ewu mmumanye aci. Mu Ekèsòòde ne: “Lwevenyi nànsha lukesè kalusanganyibu mu cituudilu cyèbè to nànsha kakesà, mu matùkù mwandamutekète.” *Matùkù mwandamutekète* awu's avwa aleeja kaabujima kàà “bikondo mwandamutekète byà èkèleeziyà.” Nwamònu anyi?

¹⁵⁹ “Lwevenyi nànsha lukesè.” Mpindyewu, ncinyi ciine aci? Witabàayi nànsha umwe, maalu à pa buloba nànsha makesè. Yesù wákamba ne: “Nwènù banange buloba anyi maalu à pa buloba, dinanga dyà Nzambi kadyena nànsha munda mwènù to.” Nwamònu anyi? Kàdi tudi tuteeta kubisambakaja; kanwena mwà kwenza nàнку to! Bìkèngela nufike ku cintu *cimwèpelè* cyà kwitabuuja: anyi udi witabuuja Nzambi, anyi udi witabuuja èkèleeziyà webè, anyi udi witabuuja buloba, udi . . . Kwèna mwà kubisambakaja to. Ne kwèna mwà kulamata bintu byà kale byàkenza èkèleeziyà mukwàbò kumpàla kwèbè abi to. Bìkèngela wàngate Mukenji wà dîbà edi.

¹⁶⁰ Kwambayè ne: “Cìvwa cishààle aci, kanucilekediku cishààla too ne mu dîndà to (bwà kubwelaci mu cikondo cikwàbò eci), nucyòshè ne kapyà; cibutudiibwe.” Bwà ne cikondo cinùdimu ne mwoyi eci, Mukenji wà cikondo eci, Bidi bìkèngela bwà kupatukilawu mu Mifundu ne mushindikìibwe ne mujaadikìibwe kùdì Nzambi ne Nzambi ngudi wenza nàнку awu. Dîbà adi anyi udi wakidila Aci anyi uCibenga. Ki Mwoyi wà Cyendèlèlè awu's, kulombodiibwa kwà Nyumà Mwîmpè, ulombola Èkèleeziyà Wendè.

¹⁶¹ Tudi bafwànyine kushààla pa cyôci aci ntanta mule, kàdi tutentemukàayi, tungunukàayi ànu ne kuya kumpàla.

¹⁶² Disungula dyà ngenzèlu webè wa maalu. Udi mufwànyine . . . Kwèna mwà kubisambakaja mpindyewu to. Anyi udi mutwè ku cyà Nzambi anyi ulwisha Nzambi, mmwenekelu wa pambelu ùdi uleeja menemene cìdì munda. Nwamònu anyi? Mpoopu . . . Bààbùngì bèènù bàtu beela meeji ne: “Mèmè ndi ne dibatiiza dyà Nyumà Mwîmpè, Nyààya mu Dyulu.” Aci kacyèna cyùmvwijaku ne uyààya mu Dyulu to. To, mukalenge. Udi mwà kwikala ne dibatiiza dyà Nyumà Mwîmpè ku dîbà ne dîbà dyònsò mu nsòmbelu webè, kàdi mwikale ànu mujimine ne uya mu iferno. Bible ngudi wamba nàнку. Uh-huh, ncyà bushùwà menemene.

¹⁶³ Tàngila kuneeku, wèwè udi muntu wa pambelu. Udi ne byumvwilu bitaanu bidì bipetangana ne mubidi wa pambelu awu. Nzambi mmukupèeshe byumvwilu bitaanu; kabiyi bwà

kupetangana Nendè to, nzùbu webè wa pa buloba ewu: lumònò, lulabulu, lulengu, lununku, ne luumvu.

¹⁶⁴ Pashiishe udi ne nyumà munda mwà cyôci aci amu, ne ùdi ne bipatukidi bitaanu: kondo kaa mwoyi, ne dinanga, ne bikwàbò. Bipàtukidi bitaanu byùdi upetangana naabi ne nyumà wa pa buloba, kàdi ne nyumà webè.

¹⁶⁵ Citùpà cyèbè cyà mubidi aci cìdi cipetangana ne byà mubidi. Citùpà cyèbè cyà nyumà cìdi cipetangana ne byà nyumà. Kàdi munda mwà cyôci aci udi ne musùukà, ne musùukà awu ki mùtòlokù ùdi mufùmine kùdi Nzambi awu.

¹⁶⁶ Nènku ànu mùdi mwànà wa mu dibòko ùfwimbiibwa munda mwà mamwëndè amu. Pàdi mwànà awu ubwela mu—mu difù dyà maamù ku kaacivuba kakesè aku, ùdi ùdikòka bitekèbetekekete too ne mu diyi, kacyèna cyèna kabulu kàmwè kàà mashi kàà muntu, kàà mbwa kalondela, ne kàdi kàlondà kàà kaampuusu, ne kàdi kàlondelà kàà kabalù to. Byònsò ntubulu twà mashi twà muntu bwalu ntwezenza ku kabulu kàà mashi kàà muntu kàà ku cibangidilu.

¹⁶⁷ Nènku pàdi muntu ulediibwa cyàkàbìdi ku Dìyì dyà Nzambi, mudyanjila kulongolwela Mwoyi wà Cyendèlèlèlè, ubiikidiibwa ne “Musungula,” neciikale Dìyì dyà Nzambi pamutù pàà Dìyì, Dìyì pa Dìyì! Ki ntwitabàayi wa cyena mangumba ne pashiishe Dìyì kampànda to, ne twitabàayi kampànda; nènku abi kabyàkukùmbanaku to. Kwèna mwà kwelaMu lwevenyi alu to! Mwoyi wà Cyendèlèlèlè ànu umwèpelè, Yesù Kilistò Dìyì:

Ku cibangidilu kwàkadi Dìyì, ne Dìyì dyàkadi ne Nzambi, ne Dìyì dyàkadi Nzambi.

Ne Dìyì dyàkandamuka mubidi, ne dyàkasòmba munkaci mwètù, . . .

¹⁶⁸ Balunda bàanyi, nutu nudiisha bàna bàanyi. Nutu nuntùma dyàmwàmwa mu madimi à bwambi, bwà kutwàla Mukenji. Bikèngela ngiikale ne meeji matòòke kunùdi. Cìndi munkaci mwà kutàngila eci, pàmwàpa kanwena numòna to. Ki cìndi nteeta kunwambila mwab'ewu. Ki mbwà ne ncyèna munange bantu to, mbwalu ntu munange bantu bushùwà. Dilongolola bilema. Pàndi mmòna diseesuka dyà èkèleeziyà, wenda upàmbuka, wàmba ne: “Èè, tudi benze *cikampànda* ne tudi benze *cikansanga*,” ne nkènzakana mu èkèleeziyà ne mmòna . . . Kabyàkukùmbanaku to.

¹⁶⁹ Pashiishe ntàngila mu Bible emu mmòna ne bìdi bikèngela kwikalabi mùshindù awu ku nshiikidilu, Cikondo cyà Èkèleeziyà wa Laòdikiyà cyà civumvu aci, ciikale cyèla Yesù pambelu (Dìyì adi). Yèyè kàakabiikilaku . . . Yèyè kàakubiikilaku èkèleeziyà nànsha umwe to. Wàkamba ne: “Bònsò bàNdi munange, Ndi mbàtandisha. Ndi mbanyooka.” Ngàngata Dìyì ne kuDipoopelapù, ne kwamba ne: “Udi mupùile!” Ki bwà cinyi mèmè ndi mununange. “Bu nwènù mwà kuunzulula ciibi ne

kuMbweja, Mémè nêmbwelè ne nêndye neenù didyà dyà dilòòlò.” Kaciyi èkèleeziyà to, Yèyè mmwediiłbwe pambelu pèndè.

¹⁷⁰ Ūdi uya mutàngile ku Nsangilu wa Bukwántèndeleele. Ki kuyaayàye aku’s, walukila buludi mu Loomo mùvwàye mufùmine amu. Nènku aci ncyà bushùwà menemene. Ndi naaci cifùnda pa mabeji kukaadi bidimu makumi àbìdì ne bitaanu, anyi bidimu makumi àsàtu ne bisàtu, kàdi’s ki cyôci aci. Ki ng’ànù aci to, ncifùnda mu Bible, ku cikèènà-kumòna. Yèyè’s ukaadi mumane kwalukila. Kakwena mùshindù wà kumusùngila to, mmuye! Nebiikale mùshindù awu.

¹⁷¹ Nzambi’s ùtu ubiikila *bantu nkaaya*. “Ndi mwimane ku ciibi nkookola. Muntu kanà yònsò, muntu kanà yònsò ewu. . .” Muntu nkaaya umwe pa cinunu, mmufwànyine kwikala umwe pa mùliyò mujima.

¹⁷² Ànu múmvwà mwambe kukaadi ndambu wa maalòòlò. Pàakapatuka Izàlèlèlà mu Ejiipitu, kwakalwa ànu bantu mùliyò yìbìdì, ànu mùliyò yìbìdì cyanààna; ànu umwe. . . ànu bantu bàbìdì mbàakabwela. Umwe pa mùliyò mujima. Nuvwaku bamanye aci anyi? Kaalèba ne Yoshùwa.

¹⁷³ Nènku Yesù, pavwaYe pa buloba, kwambabo ne: “Baatawètù’s bàakadyà manà mu cipèlèlà. Tudi balame bilèlè. Ne tudi twenza *cikampànda*. Tudi bamanye mwaba utùdì biimanyine!”

¹⁷⁴ Yèyè ne: “Ndi mumanye ne baatawètù bàakadya manà mu cipèlèlà, kàdi bôbò abu muntu ne muntu mbatapuluke Cyendèlèlèlè. Mbafwè!”

¹⁷⁵ Pàdi bilùmè bifùmina kùdì mulùmè anyi mukàjì, kùdì mayi mùliyò mujimà àłwalwà, kùdì bivuba mùliyò mujimà bìłwalwà. Nènku mu tuubivuba twònsò tukesè atu, twà mùshindù awu. . . Piikalaci—piikalaci cyà kùdì ngombe mulùmè, anyi muntu mulùmè, anyi nì ncinyi cyònsò cidiku aci, kùdì ànu mùliyò yà bivuba cyanààna, bivuba mùliyò mujima bìdì bìkwàta mudimu. Mwómò amu mudi ànu cimwèpelè cyà ku bivuba abi cidi cilogolwela mwoyi, bwalu kùdì diyi òmwèpelè luseke lukwàbò alu, didi ne bufukè, bwà kutwilangana naaci. Ncyà bushùwà. Diyi ànu òmwèpelè ke dyàtwilangana. Ànu mudi mubidi ewu musòmbe apa, ne civuba cifùmina kùdì Nzambi. Nwamònu anyi? Nènku tàngilàayi kaacivuba kakesè kàdi kabanda munkaci mwà bivuba bikwàbò byònsò ebi, ne kadinyònda kabicyòla, katungunuka ne mudiku kabìpita, kaya too ne eku bwà kupeta diyi dyà bufuke adi ne—ne kadifindamu; nènku bikwàbò abi bìdì bifwa.

¹⁷⁶ Kàdi bu ne bìvwà mùshindù awu ne èkèleeziyà leelù ewu, umwèpelè pa mùliyò mujimà? Nudi numòna kuvwaci cifwànyine kwikala anyi? “Mushiku wà mbelu mmubùmbàkane ne Njila mmubùlākane, ne nekwikale ànu bakesè bààMupeta;

bwalu mwalabale nnjila uyààya ku kabùtù, ne bààbùngi mbààyiilàmu.”

“Mbulelèlà anyi, Mwanèètù Branham?” Ncyèna mumanye to, kàdi ndi nteela ànu Mufùndù. Nwamònu anyi?

¹⁷⁷ Mpindyewu, udi mulongolwela Mwoyi. Udi uCimòna pawikala mulongolwela kuCimòna. Wèwè kùyi mulongolwela kuCimòna to, kwàdyàkuCimònaku to. Wàkamba ne: “Bàdi ne mèsù kàdi kabeena mwà kumòna to, ne maci kàdi kabàyi mwà kuumvwa to.” Mùshindù mwine udibi bikèngela bwà wèwè kwikala ne kusakidila’s, èkèleeziyà! Mùshindù mwine udibi bikèngela bwà wèwè kudilongolola ku bintu ebi’s wè! Mùshindù mwine udibi bikèngela bwà wèwè kwikala ulàkuka kapyà bwà Nzambi’s wè! Mùdi mèsù èbè àtàngile byùdi umòna ebi, maci èbè ùmvwa maalu àùdi umòna awu. Kulombodiibwa! Mbwa cinyi bunùdi balwile kaaba aka dilòlò edi bwà kuteeleja Mukenji bu Ewu? Ndi mwamba mambàvi buloba bujima, kùdi maèkèleeziyà, bu “mukoleshi wa maalu.” Nudi balwile cinyi? Nyumà Mwimpè mmunùlombole kaaba aka (nwamònu anyi? nwamònu anyi?) bwà kutèeleja. Kutengula! Umushaayi bintu byà pa buloba, itabaayi bulombodi bwà Yesù Kilistò, bwà cyanàànà nenùbutuke menemene ànu bu buloba.

¹⁷⁸ Wèwè udi ne disungula dyà ngenzeli wa maalu. Mùshindù wùdi uditwàla wèwè mwine, aci’s ncikutàngile.

¹⁷⁹ Udi ne cyà kusungula mukàji. Udi uya wangata mukàjèèbè. Udi muswè kwangata mukàji, udi muswè kwangata umwe udi ukumbanangana ne webè. . . ne cyùdi muswè bwà webè. . . ulongolola bwà ciikala dīkù dyèbè maalaba. Nudiku mwà kudifwànyikijila muntu, mwena Kilistò mulùmè, ùpàtuka ùkangata umwe wa ku ba-Rickettas bàà cyena-leelù aba bu mukàjèndè anyi? Huh? Nudiku mwà kudifwànyikijila anyi? Muntu awu ùdi wela meeji kaayi? N’dīkù dyà mùshindù kaayi diikalaye mwà kupeta yèyè mukangate muji wa maja wà ùvuula ne bilàmbà awu, mwedi wà mapikù mu mùsèèsù emu, ndumbà wa mu mùsèèsù? “Kaa,” mùdi wamba, “mpindyewu, anji indilabi kakesè.” Mmunyi mùtùye ùvwàla? Nwamònu anyi? Nwamònu anyi? Ùvwala tuputulu ne bikwàbò, s’ndumbà wa mu mùsèèsù. “Kaa,” mùdi wamba, “mpindyewu, Mwanèètù Branham!” Kaa, tuujipè tukesè twà kale atu, umweka mudibondemù, ndumbà wa mu mùsèèsù.

¹⁸⁰ Yesù wàkamba ne: “Ewu yònsò ukàtàngidi mukàji bwà kumwalakana, wamanyi kwenda nendè masandi munda mwà mwoyi wèndè.” Dībà adi ùdi ne cyà kulumbulula bwà bwalu abu. Kàdi cidiye mwenza ncinyi? Mmudyaanyike yèyè mwine. Udi mupiile nganyi? Anji elaayibi meeji pa bwalu abu.

¹⁸¹ Wèwè udi wamba ne: “Kabàcyena benza bilàmbà bikwàbò to.” Bàdi ne bilàmba byà mpeesà ne màshinyi à bilàmbà.

Kakwena pà wêwê kumbingila to. Huh-uh. Aci's mmwômò menemene.

¹⁸² Mpindyewu, ncyêna muswè kunùtapa ku mwoyi to. Ne eci kî mbilèlè to, eci ng'EMU MMÛDÌ MUKALENGE WÀMBA bifumina mu Mifundu. Ncyà bushùwà menemene, mulunda wanyì. Mémè ndi muntu mukulakaji, ncicyêna ne cikondo cile pànu to, kàdi bikèngela nkwàmbilè Bulelèlè. Pìikalabi ne eci ki mukenji wanyì wa ndekeelu, m'Bulelèlè. Nwamònu anyi? Kuteeci to, mwanèètù wa bakàjì. Kuteeci to, mwanèètù wa balùmè.

¹⁸³ Nènku nwênù bakwètù bàdi kacya nwakulama ku twitabàayi kampànda—kampànda, kàdi bamanye ne Dîyi dyà Nzambi ndishindikiibwe ànu ku mèsù kwènù mene. Dibatiiiza dyà Nyumà Mwimpè ne malelèlè atùdi naawu leelu ewu aa, nènku pashiishe, bwà twitabàayi yèbè, ukomaKù nyimà? Mmunyi mùdi mwà kwikala mwànà wa balùme wa Nzambi kàdi uvila Dîyi dyà Nzambi didi didyànjlila kwamba bwà matùkù à ndekeelu atùdi ne mwoyi aa? Mmunyi mùdi mwà kwenza nànkù? Mmunyi mùdi Bible mwà kubiikila eci . . .

¹⁸⁴ Ànu mûmvwà ngamba makèlèlè dilòlò bwà mfù—mfùmù musangu kampànda, lwà mu Sud mwàmwa, pàvwàbo basumbisha bantu bafiike muntwamu bu bapika. Mòna's, kabivwa bishiilàngane nànsha ne ci—cìsalu cyà mashinyi à kale to, bakupèeshelabo mukàndà wà disumba naawu. Nènku bivwa biinkèmèsha, mwaba kampànda mukesè. . . Mvwa mbala dīngà ditùkù mwaba ùvwà mu—musùmbidyanganyi mulwè bwà kusùmbakù bàmwè, kwambaye ne: “Èè, mpindyewu, ndi njinga. . .” Bàvwa babungame, bivwa bikèngela kubèèla nkodi, kubenzeja mudimu bwalu bàvwa kule ne ku maabo. Bàvwa basùmbishiibwe, bapika. Nènku bàvwa mu ditùnga dyà ku baabèndè kabàvwa bamanyemu kwa kwela dīnù ne kwà kwela dikàla, ne kabàvwakù mwà kwalukila kàbidì ku maabo to, nènku bàvwa babungame. Bivwa bikèngela kubèèla nkodi, kubenzeja mudimu. Kàdi musùmbidyanganyi ewu kupicilaye ku budimi kampànda.

¹⁸⁵ Nsòngàalùmè mukwàbò kuntwaku ùvwà kacya wàtadika cyàdi, ne cibàngà, kabivwa bikèngela bwà kumwela nkodi to. Ùvwà yèyè ànu kuulu, ne ukolesha bakwàbò abu ku mwoyi.

Musùmbidyanganyi awu kwambaye ne: “Ndi nsùmba ewu.”

¹⁸⁶ Yèyè ne: “Kî ngwa disùmbisha to. Ncyêna mwà kuteeta to. Kwena mwà kumusùmba to, bwalu kî ngwa disùmbisha to.”

¹⁸⁷ Yèyè ne: “Èè, kàdi cìdì cyenza ne ikale mushiilàngane bikolè nùnkù ncinyi?” Yèyè ne: “Yèyè ki mfùmwabo bônso wa mudimu anyi?”

Yèyè ne: “To.”

Yèyè ne: “Udi umudiisha bishiilàngane anyi?”

188 Yèyè ne: “To. Mmupika, ùtu udiilà ku cìkukù aku ne bakwàbò bônso abu.”

Yèyè ne: “Cidì cimuvwija mushiilangane menemene ne bakwàbò nunku ncinyi?”

189 Yèyè ne: “Mvwa ndikonka pàanyi, too ne pângàalu kujandula. Mu Áfrikè mwàmwa (mudibo bafumine, mùdi baaBoers babàsùmbe, ne balwe naabo muneemu emu ne babàsùmbishe bu bapika), kuntwaku tatwëndè ùdi mfùmù wa cisà. Kàdi, nànsha mùdiye mwenyi, kule ne kwabo, yèyè mmumanye ne m’mwànà wa mfùmù. Pa nànkù ùdi uditwala yèyè mwine mu mùshindù awu.”

190 Nkadyùwu kaayi bwà bwena Kilistò’s wè! Tudi ne cyà kuleeja Nzambì ne Mwoyi wà Cyendèlèlè. Kùtu mùshindù ànu umwèpelè wà Mwoyi wà Cyendèlèlè, ne mwine awu n’Nzambì. Yèyè nkaayende ngudi ne Mwoyi wà Cyendèlèlè. Ne twètù tudi bintu byangata ku Yèyè, bwalu tudi ne mifungù yà Nyumà Wendè. Dìbà adi bìvwa bikèngela twètù biine kuditwàla, bakàjì ne balùme, bu mùdi Bible mwambe bwà twètù kuditwàla. Kì mba-Izàbèlà bàà mu mùsèèsù, ne ba-Rickys bàà mu bulongolodi abu to; kàdi beena Kilistò bàà kalolo, bàà bàà balùme ne bàà bakàjì bàà Nzambì, balediibwe ku Nyumà wa Nzambì, tumwenesha Bukènkè mu matùkù ètù ne tuBumwangalaja. Ncyà bushùwà menemene.

191 Mùshindù mene utùdi baye kule naaCi’s wè! Bwà cinyi? Cintu cimwècimwè cyàkenzà mwànà wa balùme ewu mwaba ewu aci. Wàkapidya, wàkabenga Mwoyi wà Cyendèlèlè, bwalu Wòwò awu uvwa ne cyà kumupangisha luumu lwèndè, Ùvwa ne mwà kumupangisha mvwàdilu ne ndiilu wà musinga mukolè mfranga bìvwa yèndè—yèndè—yèndè yimupa, Ùvwa mwà kumupangisha bwobùmwe bwèndè bwà mu èkèleeziyà, Ùvwa mwà kumupangisha bintu bùngì cyakaa. Ùvwa mumanye civwa Wu ne cyà kumupangisha, ùvwa nsongàalùmè wa luumvu, ki kuumwaye ne kavwa mwà kufuta musinga awu to. Nànsha nànkù kudyambidilaye ne: “Nèngemene ànu ntèndeleeleu wanyì ewu nye mutangile kumpàla.” Kàdi munda mwà mwoyi wèndè ùvwa mumanye ne kùvwa cintu kampànda pa bwalu bwà Yesù Kilistò civwà cishiilàngàne ne baakwidi bàà mu ditùkù adi abu.

192 Nènku Mukenji kanà wònsò udi ufika, Mukenji mushùwashùwàlè, mulediibwe kùdi Nzambì, mmushiilàngàne ne mmwenenu wa kale. Pààkapatuka dyondopa dyà kùdi Nzambì, ànu àbidi àdi panshi aa, nwakamònà mwàkalonda batentudi anyi? Nwamònu anyi? Nènku yònsò wa kudibo udi ànu mu malongolodi awu amu, kacya bààshàalamu. Kudiku muntu mumanye ne kuvwa ne cyà kwikala Mukenji ulonda ciine aci anyi? Mòna’s, Nzambì nkì ngutunayisha to! Ùdi ukoka ntema

yètù ku cintu kampànda, ne padiYe ukoka ntema yètù, díbà adi Udi ne Mukenji Wèndè.

¹⁹³ Tàngilàayi pàakalwaYe pa buloba musangu wà kumpàla, ne pàakabangaYe mudimu Wèndè wa bwambi, “Èyi Laabi wa citende, tudi baswè Ùlwe muneemu mu èkèleeziyà wetù. Tudi . . . Pwekela kuneeku tǔng.” Mupròfetà wa citende awu. “Kaa, tudi baswè Ùlwe lwà kuneeku. Lwílaku apa.”

¹⁹⁴ Kàdi dǐngà ditùkù kujuukaYè e kwamba ne: “Mèmè ne Taatù Wanyì tudi Umwe.”

¹⁹⁵ “Kaa, ekèlekèle! Udi uDìvwija Nzambi.”

¹⁹⁶ “Nwènù kanùyì badyè Mubidi wà Mwànà wa muntu ne banwè Mashi Èndè, kanwenaku ne Mwoyi munda mwènù to.”

¹⁹⁷ “Mmukishi munwanganyi wa mashi! Katwena bwalu ne aci to.”

¹⁹⁸ Bàpostòlo abu bavwa basòmbe ànu mwaba awu; binunu kuMushiyabi, kàdi bapostòlo abu bavwa balongolwela Mwoyi. Ki cyàkambaYe. Kabavwaku mwà kuCyùmvwija to; bààkaCiitabuuja. Bààkashààla ànu naaCi bwalu, bààkamba ne: “Kakwena muntu uvwa mwà kwenza byenzedi ebi to.”

¹⁹⁹ Nànsha baakwidi biine bàvwa bamanye aci. Nikodemu wàkamba ne: “Twètù tudi bamanye” (Tubàdi twà beena Yuda atu) “ne kakwena muntu udi mwà kwenza byenzedi ebi piikalabi kabìyi byà kùdi Nzambi nànsha.” Nwamònu anyi?

²⁰⁰ Peetèlo, mu Ditùkù dyà Mpenta, wàkamba ne: “Yesù wa mu Nazalèètà, Muntu mwanyishiibwe kùdi Nzambi munkaci mwènù. Nzambi ùvwa Nendè.”

²⁰¹ Tàngilàayi mu Mifùndù, cìdi Mifùndù myambe ne neènzè. Yesù wàkamba ne: “Kenketaayi Mifùndù, mu Yòyi amu mmunùdi nwela meeji ne nudi ne Mwoyi wà Cyendèlèlè. Yòyi ayi ki yìdi yiMfidila bujaadiki. Bu nwikala bamanye Mòsà, nùnkù’s nudi baMmanye, bwalu Mòsà wàkafùnda ne nèNdwe, mu mmwenekelu wùMvwà mwà kulwila awu.” Wàkalwa bu Mwànà wa muntu.

²⁰² Ùdi ùlwa mu mènà àsàtu, bu Nzambi. Isatu (bu Taatù, Mwànà, ne Nyumà Mwímpè), Nzambi umweumwe awu, mbyambiibwà bisàtu.

²⁰³ Mpindyewu díbà adi, kàbìdi, dibingishiibwa, dijidiibwa . . . ; Luther, Martin, ne—ne—ne beena Mpenta; cintu cimwècimwè aci: byambiibwà bisàtu, bitùpà bisàtu, bikondo bisàtu byà èkèleeziyà.

²⁰⁴ Cintu cimwècimwè aci: màyi, mashi, ne nyumà. Kaa, ànu panùdi nwenda nuya apu, bintu bisàtu abi bìdi bìnwaluja mu mubidi. Bu mùdìbi bikutwala ku dileediibwa dyèbè dyà mu bufùki edi, bìdi cimfwànyì cyà dileediibwa dyèbè dyà mu nyumà. Padi mwànà ulediibwa, cintu cyà kumpàla mmâyì, mashi adi

àlonda, ne pashiishe mwoyi. Mùshindù awu ngûdi ubwela mu Bukalenge bwà Nzambi, mùshindù ùmwèùmwè awu. Nwamònu anyi? Mùshindù awu ke ùdi Èkèleeziyà ubwela, mùshindù ùmwèùmwè awu. Cintu cìmwècìmwè aci. Mpindyewu mònaayi pa bintu bisàtù ebi, Nzambi mmufwimbe Wèndè...ùfwimba mubidi Wèndè.

205 Mpindyewu tudi tusangana ne mwômò emu ne, nudi ne bukenji mu disungula dyènù. Udi usungula nsongààkàjì ùdi muswè kusela awu; ùdi ukwitaba, èyo.

206 Pashiishe cikwàbò cintu, udi ne disungula dyà ne udi muswè kwikala ne mwoyi anyi peeshi kwena muswè kwikala ne mwoyi to. Udi usungula mpindyewu pankaci pàà Mwoyi ne lufù. Udi mwà kwikala ne mwoyi.

207 Mwànà wa balùme awu ùvwa ne disungula adi. Wàkatanta mu bikwàbò byònsò, muntu mutèndeledi, kàdi ùvwa mumanye ne pàvwà...Wàkadyambidilaci yêyè mwine ne: “Mêmè ntu mwenzenze mèyi matùma ònsò aa kacya ànu ku bwànà bwànyì,” kàdi ùvwa mumanye ne kavwa ne Mwoyi wa Cyendèlèlè to. Nwamònu anyi? Nènku yêyè ùvwa ne cyà kusungula bwà kuWitaba anyi kuWùbenga, kàdi kuWùbengaye. Ki cilema cìvwa citambe kwikala cyà njiwu cyàkenzayeku pèndè ncyôci aci. Bikwàbò byònsò abi kabivwa mwà kwikala ne mushinga to. Kacyèna, kacyèna ne mushinga to, paùdi kùyì wenza disungula Adi.

208 Mpindyewu tumulondàayi ku disungula dyèndè adi, bwà tumòne kwàkamufikishàdi. Mpindyewu, tumònebi mwaba wàkasungulaye. Mpindyewu, tàngilàayi, ùvwa—ùvwa muntu mubanji, ùvwa mwena kantu-ku-byanza, ùvwa mukookeshi, ne ùvwa mutèndeledi. Byònsò abi!

209 Leelù ewu tudi bafwanyine kwamba ne: “Balumyana, yêyè’s m’Méthodiste mushùwashùwàle, anyi m’Baptiste, anyi mmwena Mpenta. Yêyè—yêyè mmuntu wa bushùwà, mwànà wa balùme wa maalu malenga wa dikema. Bîmpè!” Kakwèna cintu nànsha cimwe cyùdi mufwànyine kumwamba to; wa musàngèelu, wa maalu malenga, mumanye kusòmba ne bantu, ne bikwàbò byònsò. Kùyì mwà kumupeta mu masandi to. Pàmwàpa kàvwa ùnwa mfwanka, ùnwa maala, anyi unyeemakana eku ne eku mu myaba yà sèndemà ne maja to, nènku cyònsò citùdi bafwànyine kuciinyika leelù ewu aci, mutùdi bafwànyine kutèeka mwena Kilistò. Kàdi nànsha nànu aci kî m’Mwoyi wà Cyendèlèlè to! Aci kî ncitùdi twamba to. Ùvwa mufwànyine kwikala ne lulamatu ku èkèleeziyà wèndè, mwine mùvwàye pàmwàpa amu. Kàdi, nudi numòna’s, nènku cyàkamulombola ku cinyi? Dimanyika dinène. Twàmbèbi tũng, bu ne ùvwa muyiishi, nùnkù’s mmu...mupete èkèleeziyà mutàmbe bwîmpè. Nùnkù’s ki uvwa mwà kwikala mukulu mutangidi wa ditunga dijima anyi

mwepiskopo. Nwamònu anyi? Cidi cikulombola ku dimanyika, ne cyàkamulombola ku mabanji ne ku luumu.

²¹⁰ Ncifwànyine kwenza cintu cìmwècimwè aci leelù ewu, udi ne dipà dinène dyà kwimba. Mvwa ngeela meeji ku nsongààlùme uvwa wimba musambu mwaba ewu awu ànu katanci aka; mwàkafilaye aci kùdi dyabùlù, nènku mpindyewu mmucyangàtùlule... Kadi mùshindù mwine ùdiye mushiilàngàne ne Elvis Presley ne bàmwè bàà ku bóbò aba's. Pat Boone, ne kasùmbù kàà mùshindù awu, Ernie Ford, balumyana abu, bimbi banène bàà misambu; nènku bangate mapà àbo, mapà mabàpa kùdi Nzambi, kàdi bàkwàta naawu mudimu bwà kusonsola mi—midimu yà dyabùlù. Ncyà bushùwà's. Bàmwè bimbi banène bàà misambu bapaana mapà àbo mabàpa kùdi Nzambi bwà luumu lwà pa buloba ebu, bwà kushàalabo baakampànda. Mmunyi mùdi mufwànyine kulwa mukwàbò "mubidi" wà mutàmbidile kupita mùdi mufwànyine kwikala, kwikala kampànda, kutàmba kwikala mwànà wa balùme wa Nzambi?

²¹¹ Nànsha cimenga cyònsò eci cishààle cyèbè, buloba bujimà ebu, kàdi kùyi mwitabe kulombodiibwa kwà Mwoyi wà Cyendèlèlè ku Nyumà Mwimpè (Kilisto) to, mmunyi muwikale... Wèwè mwine udi nganyi, twamb'eku twamb'eku? Udi muntu wa cifwàkà mufwè, mufwè mu mpèkaatù ne mu matomboka! Wikale mutèndelee di mùdi muswè kwikala amu; ne lulamatu bu mùdi muswè kwikala naalu ku èkèleeziyà amu; muiyishi, pawikala muswè kubànda mu cyambilu; kàdi wèwè mubenge, udi ufwà!

²¹² Wàkatanta bikolè be. Wàkatanta bikolè be mu nsòmbelu wa panu apa. Ncyà bushùwà. Tudi tumusangana mwaba utùdi tumòna... Pashìishe tudi tusangana mwabilaayi ewu ne, wàkaya... Tudi tumulonda kakesè, ne tudi tumòna ne wàkatanta bikolè. Ne tudi tumulonda mu Bible. Tudi tumòna ne yèyè—yèyè... Tudi tumusangana muntu mubanji. Ùdi ne myaba minène menemene ya kacya, ùvwa wàkidila nzuji ne mulombodi wa cimenga, anyi nî mbanganyi bakwàbò. Nyèyè awu kuulu kwà nzùbu wendè aku, mwenzeje madyà manène àà mikùkùku; ne bafidi bàà byàkudya búngi kabùyi kwamba, bakàji, nsongààkàji, ne bikwàbò byònsò, bamunyingulukile. Kàdi kùdi mulombonyanganyi wa kàà pa luse mulààle ku ciibi cyà lupangu aku, dyèndè Lazàrò. Ùdi ùmwimanshila tusunsukila atu. Tudi bamanye bwalu bulonda abu. Cintu cidi cìlondà, kutùngunukaye ne kutanta, ànu mùdi èkèleeziyà yènda yitanta leelù ewu amu.

²¹³ Mwena kantu-ku-byanza kampànda musòmbè mwaba ewu, ùngambila ne: "Ànu mu Californie emu, ne èkèleeziyà ke udi ne cyà kwambila kasùmbù kaakwidi kàà beena mudimu cyà kòkò kwenza." Nwamònu's, cidi cìlwa cyàkàbidi èkèleeziyà ne mbùlāmàtadi. Cikaadi pambidi pèènu mene. Nudi numòna's,

nudi ànu badiinemu ne kasuki's, nènku nudi nwangata cimanyinu cyà nyama wa lwonji kanüyi bacimanye to.

214 Ni nùkààdiku basùmbe ùmwè wà ku mikàbà yànyì yà mèyi, petààyi ewu, pângààya—pângiikalà mwalukile kumbelu: *Cifundu Cyà Nyoka*; nènku nenùmòne ne cidi penyi, numòne kwàshikidila eci. Ndi mpingana kumbelu mpindyewu bwà kwakula, bu Mukalenge mwà kwanyisha. Mbifwanyine kungangata mèbà matwè ku anaayi, pa nànkù ncyèna mwà kucitwàla mu òimwè dyà ku masangisha bu nùnkù ewu to. Bidi bikèngela bwà nye kwàka kùtù èkèleeziyà untwala ntàntà mule menemene, ne lutùlù lwònsò. Mònaayi. Kàdi mpindyewu nudi mwà kuteeleja mukàbà wa mèyi awu díbà kampànda mu nzùbu mwènù.

215 Mònaayi eci, mpindyewu tudi tusangana ne yèyè wàkatanta bikolè be. Díbà adi tudi tumusangana pashìishe too ne mwàkatàmbàye kutanta bikolè, mu mùshindù wà wàmba ne: “Ndi mupete byàbùngì bè!” Balumyana wa yààya, s'mmufwànyineku kwikala muntu mushùwashùwàle wa menemene wa ditùkù edi. Ki mmwòmò anyi? “Nànsha mayeebà àànyì mmùle, àdi àmba kutaayika. Ne mèmè ndi mupetè byàbùngì be mu mùshindù wa ngàmba ne: ‘Kaa, musùùkà, ikishaaku wèwè's.’”

216 Kàdi, cyàkenzàye ku cibangidilu aci, wàkabenga bulombodi bwà Yesù Kilistò. Èkèleeziyà wendè, meeji èndè, dilonga dyèndè dyà tùlaasà, ne byònsò abi, byàkamufikisha ku ditanta. Beena Yuda bònsò bàvwa bamunange. Òvwa ùbàpa, ùvwa ùbàmbulwisha, ùvwa mufwànyine kwikala mwenze *cikampànda*, *cikansanga*, anyi *cikankenga*. Kàdi, nudi numòna's, yèyè wàkabenga bu—bu—bulombodi bwà Yesù Kilistò, Mwoyi wà Cyendèlèlèlè awu. Nènku aci... Bible mmwambe, Yèyè kwamba ne: “Wèwè mukùtākàne wè, dilòlòlò edi musùùkà wèbè mmulòmbiibwe.”

217 Nènku mpindyewu tudi tumusangana (mwaba wùdi wùlondà) mu iferno; wela mèsù muulu umòna mulombyanganyi wa kàa pa luse awu, wàkiipatayè mu mùsèèsù awu, mu cyàdi cyà Abraham. Ncilema kaayi cyà lufù's wè! Mùshindù ùdi èkèleeziyà yì—yì—yì—yì—yìsanganyibwa buludi mu njila udiyi milonde awu, kàdi kabàvwa ànu banji kupeta Mwoyi wà Cyendèlèlèlè to.

218 Cidi cimvulwija diyiisha kampànda dingààkayiisha mwab'ewu ànu matùkù mashààle aa ne: *Kasengulu kàa Muntu Udi Wela Meeji*. Nuvwa bafwànyine kwikala naadi. Mvwa ngenda nya, ngenda mpicila mu diitu, mvwa munkaci mwà kulemba nshindi (muvù wa mabeji apòòpoka ewu) nènku mèmè kutàngija mèsù panshì. Nènku, mu bushùwà bwà bwalu, ncyèna mwà kutèela cyàpù cyà mfwankà aci to. Nudi bamanye nànkù's. Nènku's ke dibùkì dyà—dyà mfwankà edi dilààle mab'awu. Nènku mèmè kupicila pabwìpi naadi apu, ngenda nkebangana

ne...mu diitu amu. Ki mème kumòna dibùkì adi dilààle mwab'awu, nènku mème kutàpa dísù paanyimà cyàkàbìdì, bàvwa bafùndepù ne: “Kasengulu kàà muntu udi wela meeji, mwenya wà munù wa mfwankà.” Mème kubanga ànu kwenda kunyunguluka mu diitu amu.

219 Ki Nyumà Mwìmpè kwamba ne: “Kudimuka ùdyambùle.”

220 Mème kwolola cyanza e kudyàmbula: “Kasengulu kàà muntu udi wela meeji, mwenya wà munù wa mfwankà.” Mème kudyambidila ne: “Eci ncyàpù cyà beena Àmèrikè's, cisumbishà lufù cidyaalulè, kùdì beena ntanda bàà mu Àmèrikè.” Kasengulu kàà muntu udi wela meeji? Wèwè...Ne mwenya wà munù wa mfwankà?

221 Mvwa nsanganyibwa ku Cisalu cyà cìnsàngansànga cyà Buloba bujimà ne Yul Bryan...Brynnner, ne bakwàbò kuntwaku, pààkenzaye diteeta dyònsò adi. Ne mùshindù wàkatèekaye mucì ùmwè wa mfwankà ne kukòkela...lwà mu cikopokopo ne kwangata...Kuumushaye bulùngù bwà mfwankà abu ne kubùtèeka pa nyimà pàà nkose, pàà nkose mutòòke, ne mu matùkù mwandamutekète yèyè uvwa mùle tente ne kansère mu mùshindù wà kàyì mwà kwenda to. Ki kwambabò ne: “Nudi bamanye's, bàdì bàmba ne 'kasengelu,’” yèyè ne, “cintu's ndiyele, bwà kusumbisha mfwankà yàbùngì.”

222 Bidi bìkèngela bulùngù bùngì kampànda bwà kusankisha démon awu. Ncyà bushùwà's. Nènku paùdì wangata mucì wà mfwankà mutaata, bidi bìkèngela micì yà mfwankà mitwè ku yinaayi bwà kwangatayi kaaba kaa ùmwè cyanààna. Cintu's ndiyele bwà kusumbisha mfwankà yàbùngì. Kwena mwà kupeta mishi padiku kakùyì kaabùdìmbù to; ne kaabùdìmbù, udi mupeetà kansère. Nwamònu mùdìbì anyi? Ne mpofo yà cyena Àmèrikè eyi, mindile bwà kumona mùdì kabwà kwoota mudilu ne mukila, s'ki bóbò badyadya butù abu's. Kwèna mwa kwikala naaci to; ndufù, nànsha wèwè muye mùshindù kaayi, ndufù mu mùshindù kanà wònsò uwàya awu. “Kasengulu kàà muntu udi wela meeji,” muntu udi wela meeji kì mmufwànyine kunwà mfwankà to nànsha kakesè, ncyà bushùwà, pìikalaye ne meeji nànsha ètù à kànà aa.

223 Èè, mème kudyambidila ne aci cìdì mwà kukùmbanangana ne maèkèleeziyà's. Nwamònu anyi? Mème kwela meeji ne, Nzambi ùtu ne kasengulu anyi? Èyowà.

224 Ne èkèleeziyà yònsò ùdì ne kasengulu. Ncyà bushùwà. Yìdì yitaata yònsò udi ubwelamù, ne yìdì kàbìdì yilekela lufù lubwelamu bùngì cyanààna.

225 Mmunyi mùdìku mufwànyine kupicishila dingumba mu Kasengulu kàà Nzambi? Mmunyi mùdì mwà kwenza nànkù? Mmunyi mùdì mwà kupicishila mukàjì mubèbùle nsuki mu Kasengulu aku? Ngambilaaku's. Mmunyi mùdìku mwà kupicishilaMù mukàjì udi ulwàta mipànu, pàdìbì ne “Ncinyangu

bwà mukàjì kulwàta civwàlù cyà muntu mulùme”? Nwamònu’s, Kasengulu kàà Nzambi nkafwànyine kumukwacila pambelu pààpa, Kì nkafwanyine kumubweja to. (Kàdi èkèleeziyà ùdi ne twèndè yèyè tusengulu.) Pa nànkù ndi ngàmbe ne kùdi Kasengulu kàà muntu udi wela meeji, n’Díyì dyà Nzambi, ne Didi dipetangana ne mwenya wà muntu wa cijila. Ncyà bushùwà, muntu wa cijila; kì mmuntu wa èkèleeziyà to, kàdi mwenya wà muntu wa cijila. Bwalu n’Díyì dyà Nzambi dikezukeye, ne cijila, kadiyi disambakaja to! Kùdi Kasengulu kàà muntu udi wela meeji. Nènkù wèwè cidimba cyà èkèleeziyà, ndi nkubela bwà kukwàta mudimu ne Kwòko aku’s.

226 Bwalu kàdi kabweja maalu à buloba, ne mutanda wààci ndufù. Mutanda ùdi útuntumuja, kaa lwevenyi kakesè kàdi katuntumuna mutanda mujimà. “Ewu yònsò wadidìnga kuumushila Díyì òmwe ku Cyòci eci, anyi wasàkidilaKu díyì òmwe awu, cyèndè citùpà necyùmushiibwe ku Mukàndà wà Mwoyi.”

227 Mu budimi bwà Edènà, cyàkakèbà lufù, ne tunyinganyinga twònsò etu, disaamà dyònsò dyà mwoyi, mwànà mukesè wònsò wa mu dibòko udi upunga ne lufù, disunsuma dyònsò didi pa muminu, màshinyi ònsò à cyambula-babèèdi àdi akungula, lupitaadi lwònsò elu, majambu ònsò awu? Civwa mbwalu Evà wàkeela mpatà ku Díyì *dimwèpelè* (kì nDyòdi dyònsò to), cyàkaDinyangakaja ànu cyanààna. Mpindyewu, Nzambi wàkamba ne: “Muntu,” mwaba awu, “ùvwa ne cyà kulama Díyì *dyònsò* dyà Nzambi.” Mpindyewu, aci ki cyà kumpàla cyà Bible.

228 Munkaci mwà Bible, Yesù kulwa, e kwambaYè ne: “Muntu kààkwikala ne mwoyi ku dyàmpà nkààyaadi to, kàdi ku Díyì *dyònsò* didi dipàtuka mukana mwà Nzambi.” Kì ng’ànù citùpà cyàDì to, kantu ne kantu.

229 Mu ndekeelu wa Bible, Bwàkabuulwibwà 22, Yesù wàkafila bujaadiki bwà Yèyè mwine. Dibuuulula dyà—dyà Bible n’Yesù Kilistò. Ne Yèyè wàkamba ne: “Ewu yònsò wadidìnga kuumushila Díyì *dimwè* mwaba ewu, anyi wasàkidilaKu díyì *dimwè* awu, cyèndè citùpà necyùmushiibwe ku Mukàndà wà Mwoyi.”

230 Mpindyewu, udi upicila mu Kasengulu kàà muntu udi wela meeji *aku*, nèupete mwenya wà muntu wa cijila pawàpatukaMu. Cyà bushùwà. Nèupete mwenya munsantu.

231 Mwanèètù wa bakàjì, wèwè ùdi ùvwàla bilàmbà abi awu, anji elabi meeji ku bwalu abu. Newikale mwà... Wèwè udi wamba ne: “Ndi mudilame kùdi bàyaanyi.” “Ndi mudilame kùdi mulunda wanyi wa balùme.” “Ndi mwànà wa bakàjì mudilame.” Kadi udi wamba bishi bwà ngènzàmpèkààtù wàkakutangila awu? Pàlumbululaye bwà masandi, uvwa mucyenza awu nganyì? Nwamònu’s, newikale mupiile. Nwamònu’s ncifundiibwe mu

Dìyì, pa nàнку cìdì. . . Nwamònu anyì? Kaa, ikala mukàjì udi wela meeji. Ikala udi wela meeji. . .

²³² Udi mufwànyine kwamba ne: “Mbifwànyine. . .” Èè, kàdi amba tũng bu byôbi mwà kwenzeka ne biikale mũshindũ awu? Yêyè ngudi mwambe nàнку, ne Dìyì nànsha òmwèpèlè kadyèna mwà kupangilaku to. Nwamònu anyì?

²³³ Muntu munène mmungambile ànu àbidì àdì panshi aa, mmumbiikidile mu cibambalu cyèndè, kwambayè ne: “Ndi nkutentekela byanza, Mwanèètù Branham. Udi munkaci mwà kunyangakaja mudimu wèbè wà bwambi, paùdì uyiisha bintu byà mũshindũ awu abi.”

²³⁴ Mèmè ne: “Mudimu wònsò wa bwambi wikalà Dìyì dyà Nzambi mwà kunyangakaja awu’s, bìvwa bìkèngela kunyangakajiibwawu.” Nwamònu anyì?

²³⁵ Yêyè ne: “Nènkutentèkèlè byanza.” Wamba ne: “Wèwè uvwa mutumiibwe bwà kusambidila babèèdì.”

²³⁶ Mèmè ne: “Udi witabuuja bintu abi anyì, mwanèètù?”

Yêyè ne: “To. Kàdi abu kì mbututàngile twètù to.”

Mèmè ne: “Abu mbutàngile nganyì, dībà adi?” Nwamònu anyì?

“Èè,” mwàakambaye, “abu’s mbutàngile mpaasàtà.”

²³⁷ Mèmè ne: “Tàngila disangisha.” Uh-huh. Ncyà bushùwà. Nwamònu anyì?

²³⁸ Ku cidimu ne ku cidimu cyònsò ntu mpìta ngènda nyiishà maalu aa, wa bwalu ndyambidila ne: “Bàdi bàByùmwa bushùwà,” cidimu cìlwalwà ngaalukila, s’mbipite ne byà kwònsò eku. Nwamònu anyì? Ncyà bushùwà. Bìdì bìleeja ànu ne “Bààbũngì mbabiikidiiibwe kàdi bakesè mbasungùdiiibwe.”

²³⁹ Bulombodi n’Nyumà Mwímpè, mulunda wanyì. Ùdi ùkulombola ne ùkuludika mu Bulelèlè bwònsò, padi Yêyè Nyumà Mwímpè awu ulwa. Mpindyewu elanganaayi meeji pa bwalu abu. Angata Kasengulu kàà muntu udi wela meeji, ki Bible. Kì ntwtitabàayi webè to, kì ng’èkèleeziyà webè to; wèwè neùjimine. Angata Kasengulu kàà muntu udi wela meeji aku.

²⁴⁰ Ki mwaba ùvwa nsongààlùme awu kàyi mwele meeji to. Wàkangata yêyè kasengulu kàà èkèleeziyà. Kulwaye mumanyike, muntu munène: “Kàdi mu iferno yêyè wàkambandisha mèsù, mwikale mu dikengeshiibwa.”

²⁴¹ Mpindyewu angata Kasengulu kàà muntu udi wela meeji, Yesù Kilistò, Dìyì, nènkù neùjinge mwenya wà muntu wa cijila, bwalu neDìwùsankishe. Wèwè ne Nyumà Mwímpè munda mwèbè, Aci ncidi cìcìsankisha.

²⁴² Piikala Nyumà Mwímpè kàyimù to, udi wamba ne: “Kaa, èè, ncyèna ngeela meeji ne aci cidi ne cidici cishintulula to.” Tàngilàayi numòne cinukaadi benze ànu mwaba awu! Cintu

cimwècimwè cyàkenzà Evà aci. Nukaadi baalukile buludi mu mwaba ùmwèùmwe awu.

²⁴³ Mpindyewu tuyaayi kumpàla ndambù. Mpindyewu twàngatàayi... tushiile muntu awu apu, uvwa kàyi mukwate mudimu ne Kasengulu kàà muntu udi wela meeji aku awu. Wàkabenga kwitaba bulombodi bwà Yesù Kilistò, bwà Mwoyi wà Cyendèlèlè.

²⁴⁴ Mpindyewu twàngatàayi mukwàbò mubanja, mwena kantu-ku-byanza wa citende, mukookeshi wàkapeta mpungà wa bwena wàkapeta muntu ewu awu. Ne kuCiitaba, yèyè wàkiitaba bulombodi bwà Kilistò. Mpindyewu, kùdi bàbidi bajimà mu Bible batwikala mwà kwakula bwàbò. Ewu utùdi tumòna wàkàCibenga awu, mpindyewu twàngatàayi ewu muntu: mukwàbò mubanja, mwena kantu-ku-byanza wa citende, ne mukookeshi. Nènku yèyè wàkiitaba Bulombodi.

²⁴⁵ Mifùndu yidi yitwambila bwà muntu ewu, panwikala baswè kucifùnda, mu Ebelu 11:23 too ne ku 29.

...Mòsà, ku diitabuuja, wàkabenga bwà
kubùkidiibwa mwànà wa balùme wa mwànà wa bakàji
wa Pàlò;

Kusungula bwà kutwala ntatu ya Nzambì...

*Ubalu bundu bwà Kilistò bu mabanji manène kutamba
mabanji ònsò àà Ejiipitu:...*

²⁴⁶ Nwamònu's, wakiitaba Mwoyi wà Cyendèlèlè. Mòsà wakabala bundu bwà—bwà—bwà Kilistò bu mabanji manène kutamba mabanji ònsò àvwa naawu bàà pa buloba. Mòsà wàkabala Aci ne cìvwa cìtambe bunène. Mpindyewu, muntu mubanja ewu kàakacyènza to.

²⁴⁷ Nènku Mòsà uvwa mubanja, mukookeshi wa citende, bwà kushààlaye Pàlò. Ùvwa mwànà wa balùme wa Pàlò, ne uvwa mupyànyi wa nkwasà wa butùmbì. Kàdi yèyè wàkatàngila pambelu ku cìvwa kaciyi mwà kwenzeka to, musùmbà wa basopi bàà bitoci, musùmbà wa bapika. Kàdi ku diitabuuja wàkamòna mulayi wà Nzambì, ku Dìyi: “Ne cisàmbà cyèndè cìcwa mwà kusòmbela mu buloba bwenyi munda mwà bidimu nkama yinaayi, kàdi neciikale mwà kupatudiibwa ku cyanza cyà bukolè.” Ne yèyè wàkabala Aci (àlèluuyàh) bu mabanji manène kutamba mabanji ònsò à Ejiipitu, bwalu wàkashiya Ejiipitu kàyi mumanye kuvwaye uya to. Ùvwa mulombodiibwe kùdi Kilistò. Wàkashiya!

²⁴⁸ Pèndè's ùkaavwa ne dikàsà dyèndè pa nkwasà wa butùmbì, ne ùvwa mwà kwikala—kwikala Pàlò uvwa ulonda mu Ejiipitu. Kàdi yèyè wàkabala bundu bwà Kilistò. Bundu's! Bwà kutwibwa dìnà ne “muyàpàndi awu,” kubùkidiibwa ne “mukoleshi wa maalu” awu, bwà kwangata kaaba kèndè pàmwè ne basopi bàà bitoci ne bakoleshi bàà maalu; bwalu yèyè

wàkamòna ne díbà adi, dyàkalayiibwa Mufùndu bwà kuula adi, divwa difika.

249 Nènkú Èyì nwènú èkèleeziyà, tàbulukàayi! Kanwenaayiku mwà kumòna cintu cimwècimwè aci dilòòlò edi anyi? Díbà divwà dilayiibwe didi pambidi pèètù. Ubala bundu bwà Yesù Kilistò bu mabanji manène kutàmba bwobùmwe bwònsò bwà ní ncinyi cyònsò; piikalabi bikèngela kushiya taatù ne maamù, èkèleeziyà, cintu cikwàbò kanà cyònsò. Londa bulombodi bwà Nyumà!

250 Twánjàayi kulonda Kilistò ewu bwà ndambu wa, Mòsà ewu, bwà katanci kakesè, wàkenza cyòci aci awu; tutàngilàayiibi nsòmbelu wendè. Cintu cyà kumpàla, pàvwàye mwiàbe bwà kwangata bundu bwà Kilistò ne kulekela dilonga dyèndè dyà tulaasà, kulekela lungenyi lwèndè lwònsò... Ûvwa mulongeshiibwe mu lungenyi lwònsò lwà beena Ejiipitu. Ne dimanyika dyèndè dyònsò, nkwasà wendè wa butùmbi, dikombo dyèndè dyà bukalenge, bukalenge bwèndè, cifulu cyèndè cyà butùmbi, cyònsò civwaye naaci aci, yèyè kucibengaye!

251 Kàdi mulumyana mukwàbò ewu uvwa muswè aci, ne kubenga Kilistò; kàdi muntu ewu kubenga aci, ne kwitaba Kilistò. Ne lukasa lwònsò cyàkenzekà ncinyi? Byàkakèngela bwà kuditapululaye.

252 Àlèluuyàh! Mwaku awu ùdi umvwija ne “Tumbishàayi Nzambi wetù!” Mbibi be bwà patùdi tucipwa mwoyi.

253 Yèyè wàkapidya nkwasà ya matùmbi ne dimanyika. Ûvwa mufwànyine kwikala ne nsongàakàji ku... bakàji bèndè nkama ne nkama, ne ùvwa mufwànyine kupeta nkita mwínshi mwà... Mòna's, Ejiipitu ùdi ùkòòkesha buloba. Buloba bujimà ànu ku bukookeshi bwèndè, ne yèyè ùvwa mupyànyi wa kantu ne kantu kàà byòbi abi. Kàdi mu kutàngila kwà mu Mifùndu ne kumòna ditùkù divwaye ne mwoyi, ne kumanyaye Cintu kampànda munda mwèndè amu, Dimiinu didyànji la kulongolola dyà Nzambi adi kubangadi kukwàta mudimu's!

254 Nànsha wèwè mwikale mumanyike munyi, anyi mùdi mwà kwikala *cikampànda*, udi mufwànyine kwikala mukulu mutangidi, udi mufwànyine kwikala mpaasàtà, udi mufwànyine kwikala *cikampànda*, *cikansanga*, anyi *cikankènga*, kàdi piikalà Dìyì dyà Mwoyi wà Cyèndèlèlè adi ku Dìyì dyà Nzambi didyanji la kulongolola munda mwèbè, ne wèwè mumòne cintu aci pabwìpi, nebikwate mudimu, byàsa lwendu mùshindù *awu*. [Mwanèètù Branham udi utuuta cishòndo misangu ne misangu—Muf.] Banga kupatuka! Twàdija kuMupeta!

255 Ki yèyè kubenga kubiikidiibwa mwànà wa mwànà wa bakàji wa Pàlò, bwalu yèyè wàkabala bundu bwà Kilistò bu mabanji manène kutàmba mabanji ònsò à Ejiipitu anyi à pa buloba. Yèyè wàkabala Aci. Tàngilàayi cyàkenzaye, wàkaCilonda. Mònaayi, ne lukasa lwònsò wàkiipaciibwa mu cisàmbà cyèndè, cisàmbà civwa kale wàwa cimunange aci's.

256 Ncifwànyine kukulòmba byònsò byúdi naabi. Ncifwànyine kukulòmba díkù dyèbè, Ncifwànyine kukulòmba bulunda bwèbè, Ncifwànyine kukulòmba cisangilu cyèbè cyà batedi bàà bilàmbà, Ncifwànyine kukulòmba kaaba kèèbè mu ba-Kiwanis. Mmwòmò's. Ncyèna mumanye cyàkulòmbaCi to, kàdi neCikwangate bintu byònsò byà pa buloba anyi bidi bitangila maalu à pa buloba. Nebikèngele bwà wèwè kutàpuluka ne byònsò byà pa buloba. Nebikèngele bwà wèwè kwenza nàнку.

257 Mòsà wàkateeka bintu byònsò ku luseke ne wàkaya mu cipèèla ànu ne dikombo mu cyanza. Amen! Matùkù ne matùkù kupita. Kàdi ndi ndikonka ní úvwa wela meeji ne mmutupakane anyi? To.

258 Misangu yàbúngi bantu batu ànu babanga, nènku bàmba ne: “Kaa, nèngénzè nàнку. Butùmbi kùdi Nzambi's wè, ndi nCimòna!” Muntu àkuseke ne àkwelùlwile ne: “Pàmwăpa mvwa mutupakane.”

259 Wàkamba ne: “Aba bàdi kabàyi mwà kutwàla dinyooka mbànà balela mu masandi ne kî mbànà bàà Nzambi to.” Nwamònu's, mbambwibwe mu disaluka. Nwamònu's, dimiinu dímvwà mwakule kukaadi katanci adi, musùukà awu kawùvwamu kwònsò eku to. Úvwa mulaabiibwe ne Nyumà, ne wàkenza byà mîshindù yònsò. Kaa, wèwè, bóbò. . . Pàdi nyumà webè mulaabiibwe, udi mwà. . . N'Nyumà Mwîmpè mulelèlè, mushùwashùwàlè, kàdi pèèbè mèikale ànu démon.

260 “Kaa,” mùdi wamba, “Mwanèètù Branham!”

261 Bapròfètà bàà mashimi! Bible mmwambe ne: “Mu matùkù à ndekeelu nekwikalè bapròfètà bàà mashimi.” Yesù wàkamba ne: “Nekùjuuke ba-kilistò bàà mashimi.” Kî nne “ba-Yesù bàà mashimi” to, mpindyewu, muntu nànsha umwe kèna mwà kutùkija bwà aci to; kàdi “ba-kilistò bàà mashimi.” *Kilisto* udi umvwija ne “balaaba maanyì.” Balaaba mu mashimi; mbalaaba, kàdi mbàà mashimi ànu ku muji aku, ne benza bimanyinu binène ne maalu à kukema, bààkula mu myakulu, baja maja mu Nyumà, bayiisha Èvànjeeliyò.

262 Yudaasa Mpongoloki wàkenza nàнку! Simeona. . . anyi to, mfwilaayikù. . . Kaayifa wàkamba cipròfètà! Baalama, mwena lubombo! Bushùwà, mwenze bimanyinu byònsò, bintu byònsò, minyùkunyuku yònsò yà butèndelededi.

263 Kàdi, nudi numòna's, paùdi uteeka dimiinu dyà mpoopu ne dimiinu dya blé mu bulaba bùmwebùmwe abu ne uàpongolwela màyi ne uàlaaba, ònsò àbidi neàcyonkomoke. Byònsò bibidi nebikoleleku, màyi àmwèàmwe awu. “Muunya ùtu ukenka pa baakane ne babì, ne mvula ùtu ulokela bîmpè ne babì, kàdi ku mamuma abo ki kunwàbàmanyina.” Mmunyi mùdi mwà kubenga kudilongamija mu njila wa Díyi? Amen. Nudi bumvwe cîndi muswe kwamba aci anyi? “Màyi adi amacila baakane ne babì,” mulaaba maanyì.

264 Yesù wàkamba ne: “Nebàlwe kùNdi mu ditùkù adi, bàmba ne: ‘Mukalenge! Mukalenge! Mémè ewu ncyênàku mwipate baadémons anyi? Ncyàkambaku bipròfetà anyi? Ncyàkenzaku bintu binène mu Dìná Dyèbè anyi?’” Neámbe ne: “Nwênù beena mudimu bàà bubì, nguMukilaayi apa, Ncyèna nànsha munùmanyè to. Ndaayi mu iferno wa cyendèlèlèlè utubo balongolwele dyabùlu ne banjèlo bèndè.” Nudi numòna anyi? Dìyì kaayi’s wè! Bàà mafi. Bàkuukwila ànu mu cyanààna, basumpakana ànu mu cyanààna. Nudi nwenza nànkù bwà cinyi pàdibi kabiyi bikèngela bwà nwênù kucyenza? Bwà cinyi kwangata mupinganyi pàdi Maulu mùle tètè ne cishùwashùwàle? Nwamònu anyi? Kabyèna bikèngela bwà wèwè kwenza nànkù to.

265 Mpindyewu tudi tusangana Mòsà mulaabiibwe, cintu nànsha cìmwè kacivwa mwà kumwaluja cyànyimà to. Bàna baabo sungasunga kumubengabo; aci kacyàkamupangishaku to. Yèyè wàkatungunuka ànu ne kuya too ne mu cipèèlà. Nènku ditùkù dikwàbò kuntwaku, yèyè kutuutakeena ne Nzambi mpàla ne mpàla, ne Dikunji dyà Kapyà dilembelele mu kaacipuka. Yèyè ne: “Mòsà, kopola bisabaata byèbè, buloba bwèbè bùdì mwimanyine mbwà Cijila. Bwalu Ngũmvù mbila yà cisàmbà Cyànyì, ne Ngũmvù mikemu yààbò, ne Ngāvùluku mulayi Wànyì wà Dìyì. Nènku Ndi mutuuluke, Ndi nkutuma wèwè kuntwaku bwà kubapatula.” Cyà bushùwà’s. Yèyè wàkatwilangana ne Nzambi cìmònààmèèsù, yèyè wàkaakula Nendè. Wàkatùmiibwa ne mudimu kùdì Nzambi.

266 Nzambi kwalukila buludi, Dikunji dyà Kapyà òmwèdìmwè adi, ne kushindika mupròfetà awu ànu pa mukuna apu mene; bwà kujaadika ne civwa, pààkangataYe byanza byèndè ne kwenza bishima byà mshindù yònsò ne bikwàbò apu. Kaa, bavwa ne batentudi. Kaa, bushùwà’s. Kuvwa Yambèlè ne Yanè, biimane ànu mwaba awu, kwenzabo cintu cìmwècìmwè cyàkenzàbo aci. Kàdi wa ku cibangidilu uvwa nganyì? Nwamònu anyi? Byàkabangila penyì? Byàkafumina ku Dìyì anyi? Divwa ndìbà anyi?

267 Kàdi nudi bamanye ne cintu cìmwècìmwè aci ncilayiibwe cyàkàbìdì mu matùkù à ndekeelu aa anyi? “Ànu muvwa Yambèlè ne Yane bakandameene Mòsà amu, ki mwikala kàbìdì bantu aba, bàà meeji moonèke pa bìdì bìtangila Bulelèlè.” Nwamònu’s, mu matùkù à ndekeelu. Ne kwenza cintu cìmwècìmwè aci, (kutentula bintu byònsò), ànu mu lukòkà lùmwlùmwlè amu’s ne: “Ngulube uya ku bitoci byèndè, ne mbwa wàlukila ku bilùshi byèndè.”

268 Nwênù beena Mpenta bàdi bapàtuke mu malongolodi awu kukaadi bidimu ne baèla mulawu, baatatwênù ne baamamwênù’s; kàdi nwênù kwalukilamu buludi ne kwenza cintu cìmwècìmwè cyàkenzàbo aci, ne mpindyewu ànu bitoci bimwèbimwè ne bilùshi’s. Nwamònu anyi? Pìikalabi ne

byàkalukisha Èkèleeziyà mu cikondo cyà mbangilu cyà beena Mpenta aci, s'nebiMulùkishèci cyàkàbìdi leelù ewu. Nwamònu anyi? Bìdi ne cyà kwikala nànkù, nànsha nànkù, ncizubu, cìdi ne cyà kulwa. Mwepu kawena mwà kwikala ànu nkaayawu to; bikèngela cizubu cilwe, nwamònu's, cyambudi aci's. Mpindyewu tudi ne mwoyi mu matùkù à *ndekeelu*, tàngilàayi bintu bìdi bilayìibwe bwà dîbà edi.

269 Tàngilàayi Mòsà mushìndika ewu. Nudi bamanye! Mmwenze ànu upatuka kwàka, bàmwè bàà ku bàna bààbo kadi kumukùdimukilabò, bakeba kwenza bulongolodi kampànda. Kwambabò ne: "Udi wenza maalù bu ne wèwè ki muntu umwèpelè wa cijila munkaci mwètù's." "Disangisha dijimà ndyà cijila," mwàkambà Koola, ne Daatànà. "Tusungulàayi bantu bwà twènzè cintu kampànda."

270 Mòsà, yèyè...Mémè kuumumvwila luse. Kupwekaye, kwamba ne: "Mukalenge..." Kuponaye panshi kumpàla kwà cyoshelu e kwambaye ne: "Mukalenge!"

271 Nzambi kwamba ne: "Tàpuluka naabo. Byàbo byàNtondi." Kukangula ànu buloba kàdi kubàmina. Kwajiki. Nwamònu's, ùvwa mumanye mudimu mumutuma naawu.

272 Nzambi kàtu ùkwàta mudimu ne malongolodi to, Yèyè kàtu ùkwàta mudimu ne tusumbù to. Ùtu ùkwàta mudimu ne bantu nkàaya. Ncyà bushùwà. Misangu yònsò. Kabìyi mu bisumbù to; bantu nkàaya, muntu umwèpelè. Mu matùkù à *ndekeelu*, Yèyè kwamba ne: "Ndi mwimane ku ciibi nkookola, ne muntu kanà yònsò..." (kì "nkasumbù kanà kònsò to") "...muntu kanà yònsò wàdìdinga ànu kuumvwa Dìyi Dyànyi, Mémè nè...ne kuNgumvwa, Nèmbwelè mùdiye ne ndye nendè didyà dyà dilòlò." Nwamònu anyi: "Muntu kanà yònsò yèyè mwà kuumvwa."

273 Mmunyi mùdi mwà—mmunyi mùdi cikòlokolo eci mpindyewu mwà kupatula dìyi dyànyi aku nànkù pùikalaci kacìyi cyenjiibwe nùnkù ewu? Mvwa mwà kwelele mbila mikolè ku mboodi kwàka, ne mwànyi mwònsò, kàdi kàvwa mufwànyine kungenzela bwalu nànsha bumwè to. Bwalu eci's ncilongolola, ne cyenza, cifwimbìibwe, cikòlokolo kampànda. Nènku Dìyi dyà Nzambi dyòdi munda mwèbè kuumukila ku didyanjila-kulongolola dyà Nzambi, munda mwèbè amu, "Mikòòkò Yànyi yidi yumvwa Dìyi Dyànyi. Mmimanye dîbà Dyànyi. Kayààkulondaku mwenyi to." Nwamònu anyi? Bikèngela ciikàle aci dyàmbedi. "Bwònsò bàdi Taatù muMpèèshe, nebàlwe." Muntu ne muntu wa kùdìbo, nwamònu's.

274 Mpindyewu yèyè udi ùtùngunuka, kundekeelu kwà mwoyi eku. Yèyè wàkapita ànu...Mònaayi pààkafikaye ku *ndekeelu* wa njila.

275 Nènku tukaadi tujikija mpindyewu bwalu dîbà dikaadi dyenda diya bikolè, nkushààle tusunsa makumi àbìdi ne tutaanu

bwà kufika ku díbà dikumi. Mònaayi. Mpindyewu, bwà kwètù díbà dicidiku dipite búngì. Pa díbà bu ibìdì anyì isàtù jaajaaja nànkú awu twètù kubanga kwamba ne: “Amba tǔng, díbà dikaadi dyenda diya ndambu.” Nwamònu anyì? Nwamònu anyì? Kàdi mpindyewu, nkaatù muyiishe mafùku àbúngì, bufùku bujimà.

²⁷⁶ Pólò wàkayiisha Èvànjeeliyò umwèumwè ewu mu ditùkù dyèndè, ki nsongààlùmè kampànda kuponaye ku—ku cimanu ne kudifwishishaye. Nènkú Pólò, ne dilaabiibwa òmwèdìmwè adi, ne Èvànjeeliyò umwèumwè awu, kudyàdijayè pambidi pèndè, wàkalukila cyàkàbìdì ku mwoyi. Bòbò bavwa basankishiiibwe. Èkèleeziyà ùvwa munkaci mwà kufwimbiiibwa. Cintu kampànda civwa munkaci mwà kwenzeka. Mònaayi cyàkenzekà mwaba ewu.

²⁷⁷ Mòsà, pààkapwekaye . . .

²⁷⁸ Muntu mubanjì ewu, paakapwekaye, anyì, mukookeshi wa citende utùdì twamba ewu, mutèndeledi wa dikèma, ne mwikale mwena èkèleeziyà ne bikwàbò byònsò, mulenga, mulonge tùlaasà, mwena kantu-ku-byanza wa dikèma, ne bikwàbò byònsò, pààkafikaye ku ndekeelu wa njila, kubangaye kwela mbila mikolè ne: “Kakwena mwaba wa kudyacila nànsha ùmwè to!” Kulombodiibwa kwèndè aku kwàyì penyi? Ùvwa mulombodiibwe kùdì èkèleeziyà wèndè, mwine awu mufwè. Ùvwa mulombodiibwe kùdì buloba bufwè, nènkú kakuvwa kantu nànsha kàmwè kàà yèyè kudyacilapu ànu civwa buloba bucilongolwele aci: iferno.

²⁷⁹ Kàdi ki Mòsà ulwàlwa ewu, musadidi wa lulamatu yèyè wàkabala bundu bwà Kilistò bu mabanji manène kutàmba mabanji ónsò a Ejiipitu awu. Wàkafika ku ndekeelu wa njila, muntu mukulakaji, wa bidimu lukama ne makumi àbìdì. Kubàndayè pa mukuna, ne ùvwà mumanye ne lufù lùvwa lùsanganyiibwa kumpàlà kwèndè, ne kutàngilayè mu buloba bulaya. Ki kutàngilaye; ku luseke lwèndè aku, ki Mulombodi wèndè uvwa usanganyiibwapu awu, Lubwebwe alu. Yèyè kubànda pa Lubwebwe, ne Banjèlo bàà Nzambi kumwambulabo e kuya nèndè mu Butùmbi—Butùmbi bwà Nzambi, mu cyàdì cyà Nzambi. Bwà cinyi? Bidimu nkàmà mwandamukùlù paanyimà, yèyè ùcivwa ànu mulombodiibwe kùdì Mulombodi wèndè awu.

²⁸⁰ Tudi tumusangana pa Mukuna wà Dikudimuka dyà mpàla, mwimane mwaba awu ne Eliyà, wàkula ne Yesù kumpàlà kwà kuyaYè ku nkùrusè, bidimu nkàmà mwandamukùlù paanyimà pàà lufù. Ewu wà—wàkatwaye musinga awu, ùbala bundu bwà mudimu wèndè wà bwambi, mabanji manène kutàmba dimanyika dyònsò dyà pa buloba ne mfranga yònsò yà pa buloba, Mulombodi wèndè ùcivwa ànu ùmulombola. Kaa, èkèlekèlè! Yèyè's ùvwa mulombodiibwe! Mulombodi wèndè, Yèyè uvwa ulombola mu lufù, mindidimbì yà lufù. Ùvwa

mulombodiibwe ne ku lukitâ. Nkàmâ yâ bidimu mimane kupita, ki yêyè awu mwimane cyâkâbîdî bwalu, bu mûvwâye mu bwânâ bwëndè, musungule bulombodi bwâ Nyumâ Mwîmpè. Dînâ dyëndè nedîikalè dinène pîikalâku kakûciyi kâbîdî Ejiipitu anyî mabanji. Pâdî bipaapu byâ musâkâ bishaale lupwishi, ne pîikalâ Ejiipitu kâciçi yi kâbîdî Ejiipitu to, Môsâ neikale udi kâyi mwâ kufwaku to munkaci mwâ bantu bwalu wâkiitaba bulombodi bwâ Kilistò pamutù pàâ kulonda njila wa èkèleeziyâ wendè.

²⁸¹ Kùdî bakwàbò bààkenza cintu cîmwècîmwè aci. Tàngilâayi Henoka. Wàkenda ne Nzambi munda mwâ bidimu nkama yitaanu, ne pashiishe kupetaye bujaadiki bwâ ne “Wâkasankisha Nzambi.” Nzambi ùvwa mucikenkète, e kwamba ne: “Kabyèna bikèngela bwâ wèwè kufwâ to, banda ànu wèwè Kumbelu mu mapingaja emu.” Ki yêyè kubànda.

²⁸² Ne Eliyâ. Paanyimâ pàâ yêyè mumane kutandisha bakâji bàvwa ne nsuki mibebula ne bikwàbò byònsò, bu mwàkenzaye mu ditùkù dyëndè amu, Ba-Izàbèlâ ne bilaabu kwîsù, paanyimâ pàâ byònsò abi bimane kumutonda, ne—ne mumane kwenza byònsò bivwâye mwâ kwenza abi, ne baakwidi bònsò abu bamwelulwila, ne bikwàbò byònsò, kupwekaye ku musulu dîngâ ditùkù. Nènku ànu dyàmwàmwa dyâ musulu kuvwa tubalu tuswikila ku kaacipuka aku, dikalu dyâ mvita dyâ kapyâ ne tubalu twâ kapyâ. Yêyè kubandamu, ne kukùpa mùzàbî wendè kùdî mupròfetâ uvwa ulonda bwâ kumutwa paanyimâ awu, ne kubandayè mu Dyulu. Yêyè wâkiitaba bulombodi bwâ Mwoyi wâ Cyendèlèlè, bwalu ùvwa n’Kilistò uvwa munda mwâ Eliyâ awu. Kaa! Eyowâ’s, mukalenge!

²⁸³ Cîvwa ncinyî? “Ùndonde Mêmè!” Mpindyewu udi ne cyâ kusungula *wèbè* mulombodi. Bikèngela ùmûsungule, balunda bàànyî. Tàngilâayi mu lumwènu lwâ Nzambi, Bible’s, numòne kunukaadi dilòlò edi.

²⁸⁴ Kaabwalu kakesè kàâ dilondelangana. Mwânâ mukesè, musangu kampànda, ùvwa musòmbèle ku ncyâmâ. Kacya yêyè kâvwakù mwanji kumòna lumwènu to, kâdî kulwaye mu cimenga bwâ kumònaye mamwëndè mukwàbò. Nènku ùvwa ne nzùbu... ne nzùbu yâ cyena kale ayi yîvwâ ne lumwènu ku ciibi; Ncyèna mumanye ní nudi bavùluke aci anyî to. Kâdî mwânâ mukesè wa balùme ewu, kacya kavwaku mwanji kumòna lumwènu to. Pa nànkù ùdî ùnaya ku nzùbu eku, ne wèla mèsù mu... “Huh?” Kutangilaye mwânâ mukesè wa balùmè awu. Nènku kukupaye cyanza, ne mwânâ mukesè wa balùmè awu kukupaye pèndè cyanza. Ki kudînanayè dîci, ki mwânâ mukesè wa balùmè awu kudînanayè pèndè dîci. Nènku kutùngùnukabi ànu mùshindù awu. Wàkatùngùnuka ànu ne kwenda kuya, kuseemena pabwîpî, kâdî kukudimukaye e kwamba ne: “Maman! Mmêmè’s!” Mmêmè’s.

²⁸⁵ Mmwenekelu wa cinyi *ûdi* nendè? Cyûdi *wêwê* wenda ulonda ncinyi? Citûdi benze ncinyi? Udi ne cya kusungula *mulombodi* webe. Sungula leelù ewu. Udi usungula Mwoyi anyi lufù. Disungula dyèbè nedileeye kwèbè kwà Cyendèlèlè kuuyaaya, cyûdi usungula aci. Vùlukàayi ne, Yesù wákamba ne: “Ùndonde Mémè.” Nènku nudi babiikidiùbwe bwà kwenza nàнку dilòlò edi. Nènku bwà kuMulonda too ne ku Mwoyi wà Cyendèlèlè udi ne cyà kulwa bilondèshila mèyi Èndè, ncyà bushùwà, Dîyi adi. Ki mpa twitabàayi to, kî mpa mmwènenu wa bantu bwònsò to, kabiyi pa bìdi muntu kampànda mukwàbò wèla meeji bwà Cyôci aci to, kàdi mpa cidi Nzambi mwambe bwà Cyôci aci.

²⁸⁶ Wêwê udi wamba ne: “Èè, Mwanèètù Branham, mémè’s ndi mumanye mukàji kampànda mwîmpè ne mwèndè mwònsò, ùtu wenza *cikampànda*. Ndi mumanye muntu mulùmè utu mupicile mu *cikampànda*.”

²⁸⁷ Mémè ncyèna ne cyà kwamba pa cìdibo benze to. Dîyi dyà Nzambi, Yèyè wákamba ne: “Dîyi dyà muntu yònsò diikale mashimi, kàdi Dyànyi diikale Bulelèlà.” Bikèngela ulwile pa mèyi Èndè, ulwile pa mishingà Yèndè, Dîyi adi’s. Kwèna mwà kulwila mu twitabàayi to. Kwèna mwà kulwila mu dingumba to. Kwèna mwà kuCisambakaja mùshindù awu to. Kùdi cintu ànu cìmwèpelè cyûdi mwà kwenza: kuCìitaba pa mèyi Èndè, ne udi muswè kufwà mu wêwê ne mu ngeelèlù yèbè yònsò yà meeji, bwà kuMulonda. “Lekèla bintu byònsò byà pa buloba, ne ùndònde Mémè.”

²⁸⁸ Ndi mumanye ne aci m’Mukenji wà dîsù dikolè, wa utapa, mwanèètù. Kàdi ncivwa mulwe kaaba aka ne kusungwila bantu mukenji kampànda—kampànda ànu bwà kuteeta kubafikisha ku dimba misambu, kwela mbila, kwela mikunda to. Mémè nkààdikù mubwelè mu masangisha a bampàngaanù mùdibo benze cintu cìmwècìmwè aci. Cìdì cìnsankisha mémè mmwoyi wènù. Mémè ndi musadidi wa Nzambi udi ne cyà kulumbulula kumpàla kwà Nzambi dîngà ditùkù, ne mudimu wà bwambi ùdi Mukalenge mumpèèshe mmudishindike nkaayaawu misangu binunu ne binunu kumpàla kwènù.

²⁸⁹ Vùlukàayi ne, Yesù wákamba ne: “Ùndònde Mémè. Ùndònde Mémè. Lekela byûdi naabi, kàdi ùndònde Mémè.” Nènku ke mùshindù umwèpelè wa kwikala ne Mwoyi wa Cyendèlèlè. Ki bwanga bumwèpelè bùdiYe mupèèshe muntu ewu, ki bwanga bumwèpelè bùdiYe mupèèshe mwena kantu-ku-byanza ewu, ki bwanga bumwèpelè bùdiYè upèèsha muntu kanà yònsò. Disungula Dyèndè, Yèyè ùdi wangata dipangadika Dyèndè, ndipwangane musangu wònsò. Nènku tudi ne cyà kuMulonda, ki mùshindù umwèpelè wà kwikala ne Mwoyi wà Cyendèlèlè. Pa nàнку kulombodiibwa kwà Nzambi kùdi ne: kulonda Dîyi dishindika dyà dîbà adi kùdi Nyumà Mwîmpè.

Twinyikàayi mitù yètù.

290 Nènnwele lukonko, ne ndi muswè bwà nwênù kwikala ne meeji matòòke à menemene. Ndi muswè bwà mwanèètù wa bakàji angimbileku eci, *Ndi Mwà Kuumvwa Musungidi Wanyi Ubùkila*. Ndi mumanye ne ndibiikila dyà kale dyà ku cyoshelu. Nènku mwanèètù wa balùme, mwanèètù wa bakàji, bu mutùdi tumòna, tàngilààyì ànu cidi munkaci mwà kwenzeka leelù ewu eci. Mpindyewu ne mitù yènù miinyika, anji elanganaayibi ànu meeji bwà katanci kakesè cyanààna, tàngilààyì cidi munkaci mwà kwenzeka.

291 Nuvwaku babale cibejibeki lumingu lushààle bwà cìvwà muntu awu mu Angleterre mwambe anyi? Ne “Dipoopediibwa dyà pa nkuruse dyà Yesù Kilistò divwa anu cintu cifwikakaja cyanààna, cìwa ànu dyumvwangana pankaci pàa Pilaatu ne Yèyè.”

292 Nuvwakù bamòne cyàkamba mwena tèòloji wa cyena Àmèrikè ewu anyi? Wàkamba ne “Yesù ùvwa mulàadika ànu kùdì bisoosa bibi byà katàdyamba.” Bààbúngì bàà kunùdi nwênù beena tèòloji mbamanye, kale mu Genese mwàmwa mwàkaakulabo bwà bisoosa bibi byà katàdyamba. Cidi mwà kukulàadika tulù mwenze bu mufwè, mwoyi wèbè utuuta ne lutàtù mu matùkù àbidi anyi àsàtù malondàngane. “Nènku pààkaMupèeshabo mvinyo wa bwanji ne tunyonga twa bululu apu,” muvwabo bamba, “aci’s cìvwà ncisoosa cibi cyà katàdyamba aci. Ki kuMwelabo mu lukita amu, nènku Yèyè kulàalamu munda mwà matùkù àsàtù. Nènku, mu bushùwà bwà bwalu, pààkabàndàbo kuntwaku, kuMupetabo wenda ùnyùnguluka.” Nudiku mwà kudifwànyikijila aci anyi? Beena tèòloji, maaseminèrè, diitabuuya dyà budingibudingi. Pashìishe nànsha twamba mwine mmunyi. . . Cyàkumpàla, Bible mmwambè ne Yèyè wàkabibènga, pààkaMutwàbo mvinyo wà bwanji ne tunyonga twà bululu ku mishiku apu.

293 Nènku cìngà cintu, byôbi biikale nànkù, díbà adi mbwà cinyi bùvwà bayiidi abu “bààkalwa ne kuMwibabò kuya nendè,” bwà cinyi bààkafila mwoyi wàbò ku difwila dyà diitabuuya Bwèndè? Nènku kuponabu, kudibalabu kabàyi nànsha bakùmbànyine bwà kufwà mwàkafwàYè to; kubàkudikabo mitù miinamija ne bacyàmakaja pa nkuruse ne bikwàbò. Nènku bu ne bavwa . . . bamanye ne Yèyè ùvwa mwena lubombo ne bôbò biine abu beena lubombo, mmunyi mudìbo bafwànyine kufila mwoyi wàbò Bwèndè mùshindù awu?

294 Kaa, nudi numòna’s, edi nditùkù dyà mamanya à mu mitù ditùdi ne mwoyi edi. Dilonga dyà tulaasà, dishidimuka, ne mmwèneni wa cyena leelù wa ditùkù adi, byònsò abi mbyà dyabùlù. “Dishidimuka dyà dyabùlu anyi?” Eyowà’s, mukalenge! Bible mmwambe ne ki cyôci. Edi dishidimuka didi ne lufù. “Netwikalè ne dishidimuka bu dyôdi edi mu buloba bukwàbò anyi?” To, mukalenge! Netwikale ne dishidimuka dyà mùshindù mushiilàngàne. Dilonga dyà tulaasà, bintu byònsò ebi,

mbyà dyabùlù; maalu à mamanya àdi anyanga bintu byà mu bufùki, miikale enza cintu cikwàbò.

²⁹⁵ Tàngilàayi numòne cidiwu manwenzele mpindyewu. Pàdi nsongàakàji... Cibejebeji cyà *Reader's Digest's* ncyàmbe, lumingu lushààle elu... ngondo wa kumpàla kwà wàjiki ewu, ngeela meeji ne mmwômò. Cibejibeji cyà *Reader's Digest's* ncyàmbe ne “Bansongààlùmè ne bansongàakàji bàdi bàbwele mu ngikàdilu wa bantu bashindama, bakàji babwela mu cikondo cyà kabàciyi bàtwa panshi pankaci pàà bidimu makumi àbidi ne makumi àbidi ne bitaanu.” Lukòngo lukwàbò kumpàla eku, kakwàkwikala cintu nànsha cìmwè pa kuumusha... Nebiikale byà byenza ne bwòwà. Nwamònu anyi? Cìikale bifùkiibwa's, bitekètàngane, byà bukooya bwà kacya. Tàngilàayi ku—tàngilàayi nyumà, tàngilàayi mùdi nyumà udi nendè èkèleeziyà, musopakaja, basèlàngane ne bàà pa buloba. Kaa, edi ndìbà kaayi's wè! Nyeemaayi, nwênù bânà! Nyeemaayi! Nyeemènaayi ku Nkuruse! Lwâyi kùdi Kilistò, Mulekelaa yi ànùlombòle.

²⁹⁶ Patùcidi ne mitù yètù miinyika apa, mèsù ètù mabwita, nènku bu wèwè mwà kuswa, inyika mwoyi wèbè pàwù. Udikù mwà kuswa anyi? Ndi muswè kunwelaku lukonko. Ncyà bushùwà ne udi uditàngilaku wèwè mwine, kumpàla kwà Nzambì anyi? Nènku udi umvwa ne kwèna mwaba ùdi—ùdi ne cyà kwikala pa dìbà edi anyi? Bwalu Dyambwibwa ndifwànyine kulwa pa dìbà kanà dyònsò. Nwamònu's, nedilwe.

²⁹⁷ Nkufwànyine kwikala ànu, bu—bu ne dīyī dīmvwà mwambe katancì aka adi ndyà cyà bushùwà, nekwikale ànu bantu batwè ku nkàmà yitaanu mu Dyambwibwa, bàdi ne mwoyi, bààshintuluka. Mòna's, twètù bangàte beena Kilistò bwònsò pàmwè, beena Kàtòlikè ne bwònsò, kùdi bantu mìliyò ànu nkàmà yitaanu cyanaànà, nwamònu's, bàdi bàmba mùdibo beena Kilistò. Kàdi umwe pa mùliyò mujimà, nebikale bantu nkàmà yitaanu. Kùdi bantu búngi abu bàdi bàjìmina ditùkù dyònsò edi, pa buloba bujimà, batùdi katùyi nànsha mwà kumanya cidi cibenzekela to. Nwamònu's, nedilwe, ne kùyi nànsha ucimànya to. Bantu nebàtungunuke ànu ne kuyiisha, bàmba ne... Nwamònu's, nènku nediikale dyònsò dimane kupita.

²⁹⁸ Bu mwàkambà Yesù. Bààkamba, bayiidi bààkamba ne: “Bwà cinyi bafùndi bàdi bàmba, bàmba ne: ‘Eliyà ùdi ne cyà kwanji kulwa dyàmbedi?’”

²⁹⁹ Yèyè ne: “Ùkaadi mumane kulwa kàdi kanùyi bamumanye to, kàdi bààkamwenzela cikààvwabo bambe ne nebènzè.”

³⁰⁰ Udi mumanye ne kwèna bimpè kumpàla kwà Nzambì to, ne udi muswè bwà bàkuvùlùkeku mu... kùdi Nzambì, bwà Nzambì wàmòna mwà kulongamija mwoyi wèbè kumpàla kwà Nzambì. Nudiku ànu ne kudipwekesha kwònsò mpindyewu, mu cipòòlù cyà cimùmà eci mene, mwà kwela byanza byènù muulu anyi?

Nànsha wêwê mwikàle nganyì, udi mwà kwenza nàнку anyì? Wamba ne: “Ndi ngèèla byanza byànyì muulu kùdi Nzambi.” Nzambi àkubènèshè. Nzambi àkubènèshè.

³⁰¹ Udi utangila mu Lumwènu anyì? Ndi nkukonka mu Dìnà dyà Kilistò, udi utangila mu Lumwènu lwà Nzambi anyì?

[Mwanèètù wa balùme kampànda ùdi wakula mu myakulu. Mwanèètù wa balùme kampànda ùdi wàndamuna—Muf.] Amen.

³⁰² Ndi muswè kukonka cintu cimwèpelè. Mbanganyì muneemu emu bàdi beena Mpenta? Elaayi cyanza muulu, nwènù beena Mpenta. Pabwìpì ne yònsò wa kunùdi. Mpindyewu, mbanganyì mwaba ewu bàdi bàmba mudibo beena Kilistò? Elaayi byanza byènù muulu, mwaba wònsò unùdi awu, wêwê wamba ne udi mwena Kilistò. Nutukù bamanye ne Bible utu mwambe cyôci eci, ne cyôci eci necyènzeke anyì?

³⁰³ Eci mene cyàkenzeka mu Dipungila Dikulukulu pàvwàbo badikonka ne cìvwàbo mwà kwenza ncinyì, mùshindù ùvwàbo mwà kwepuka dibùcikila dìvwà dilwa adi. Nyumà wàkapona pambidi pàà muntu ne kwambayè cipròfetà ne kubambila mwaba wa kutwilangana ne mwena lukuna, ne mùshindù kaayi, cyà kwenza bwà kucimuna mwena lukuna. Ki civwa Dipungila Dikulukulu, cìmwècìmwè ne Dipyadìpyà.

³⁰⁴ Mpindyewu, bamwè bàà kunùdi mbafwànyine kwamba ne: “Muntu wawa, kaa, aci kacìvwa nàнку to.” Kàdi pìikalabi ne ncyôci? Wêwê udi wamba ne: “Kaa, mèmè’s nkaadiku muumvwe byà nàнку abi.” Kàdi pìikalabi ne eci cidi mu cyôci? Nudi numòna’s, aci cidi dībà adi cijaadika ne mwòmò emu mudi bààbùngì bàdi ne dijinga dyà dishintuluka dyà mwoyi, pìikalabi ne Nyumà Mwimpè ngudi wakula awu. Kùdi bintu bìdi bìkèngela kwenjiibwa, pa nàнку bwalu mbulàle kunùdi nènù mpindyewu.

Ànu mûndi emu, nciyi ne cyà kudilumbulwila
naaci,
Kàdi ànu Mashì Èbè àkeediibwa panshi
bwànyì mèmè,
Ne Wêwê ubiikila . . .

Ki cyôci aci, cidiYè mmukubiikidile ànu piine apu.

. . . Kùdi,
Éyì Mwànà wa mùkòòkò wà Nzambi, . . .

“Nènguumushe mwoyi wà mupape, ne kuteekamù mwoyi wà musunya, wìkala mwà kudilekelela Kùndi.” Nwamònu anyì?

. . . lwàku!
Ànu mûndi emu, Wêwê nèungakidile,
Neù . . .

Udiku mwà kwenza dyèbè disungula dilòòlò edi anyì? Udi mwà kwenza dyònsò dyùdi muswè adi.

...kezùlàku.

Wêwè udi wamba ne: “S’nkaadi muumvumvwe aci.” Kàdi ewu mmufwànyine kwikala wèbè musangu wà *ndekeelu* wà kuCyùmva.

Bwalu ndi ngiitabuuja mulayi Wèbè,

Mabiikila à ku cyoshelu à cyena kale awu, àkaadi à cikùlukulù leelù ewu, kàdi Nzambi ucidi ànu ukwacilamu mudimu. Kanwènakù mwà kuMuumvwa ùkwàta mudimu mu nwènù amu anyi, èkèleeziyà?

...Ndi ndwa!

³⁰⁵ [Mwanèètù Branham udi wimbila mu matama *Anu Mùndi Emu*—Muf.] Kaa, elaayibi meeji, leelù ewu, myoyi yidi yenda yishààla mabwè, myùle ntènte ne maalu à pa buloba, kayiyi yìcyùka maalu to, bidimba byà èkèleeziyà, byà civùmvù, bu nsongaàlùme mubanji, mukookeshi awu; kàdi kàyi mumanye ne Nyumà Mwimpè munène awu mmwimane, ukookola ku ciibi mu Cikondo eci cyà Laòdikiyà. “Ewu wàteeleja Dîyì Dyànyì dyà mukana (Dîyì adi), wàkangula mwoyi wèndè, Nèmbwelè kwèndè ne ndye nendè didyà dyà dilòòlò.”

³⁰⁶ Nèku pavwa Nyumà wakwila kùdi mwanèètù wa balùme ewu mu tusunsa tukesè emu, mmwambe ne: “Nènguumushe mwoyi wà dibwe awu munda mwènù, ne kunupèèsha mwoyi wà musunya, munèfuke bwà Nzambi.” Tàngilàayi mpindyewu mwàluci, ànu disaluka dyà mamanya à mu mutù, cyanaàna. Nwamònu anyi? Kaciyi mwoyi munèfuke mùle ntèntè ne dinanga ne kalolo bwà Kilistò.

³⁰⁷ Kanwenaayiku baswè mwoyi wa mùshindù awu anyi? Mmunyi muwikala mwà kukùngamangana ne Kilistò pèèbè ne mmwenenu wa mamanya a mu mutù Bwèndè? Bikèngela witabe Mwoyi wà Cyèndèlèlèlè.

...àkeediibwa panshi...

Didilongolola adi dyàkenjiibwa ku Mashi.

Ne Wêwè ubiikila...

CyàkenzaYe ncinyi? Kwela Mashi Èndè panshi. Nèku mpindyewu ùdi ukubiikila ne: “Lwàku.”

...Kùdi,

Éyi Mwànà wa mùkòòkò wà Nzambi, ndi ndwa! Ndi ndwa!

³⁰⁸ Twètù, mwena Kilistò yònsò, twèlàayi ànu byanza byètù muulu mu cimùmà mpindyewu bwà kusambila.

³⁰⁹ Éyi Nzambi wa yààya, bu Wêwè mwà kuswa, Mukalenge, kwataku ditùkù ditùdi ne mwoyi edi. Kaa, s’mbikolè be, Taatù. Sàtaanà mmwenzele ànu bantu maalu bùngi cyanaàna. Myoyi yàbo yikaadi milwe mabwe. Nyumà Wèbè udi wamba patòoke; Dîyì Dyèbè didi dipatuka, dishindika; kàdi dilabula

dyà kale, dyà dilediibwa dyà cyàkàbìdi edi, bàdi. . .mbikabwele mu mmwenenu wa cyena mangumba, wa mamanya a mu mutù, mijiki bûngi cyanaàna, mbila bûngi cyanaàna, ne bintu byà lukutukutu bûngi cyanaàna. Kàdi, mu bushùwà bwà bwalu, mwoyi wà musunya awu, Nyumà awu, Mwoyi wà Cyendèlèlè awu, ncyà bushùwù ne Wówò mmushààle mwenyi kùdi èkèleeziyà.

³¹⁰ Nzambi, aci cìdi cìcìbulula mwoyi wànyì mêmè mwine, ne mêmè ngè—ngènzàmpèkààtù musùngila ku ngàsà Webè. Cìdi cimfikisha ku didyùmvwa bibi be, Taatù, bwà kumòna èkèleeziyà uWàkafwilà, èkèleeziyà Ûdi ukeba bwà kupikula awu. Ndi ngeela meeji ku cikèènà-kumòna cyÛdi mufùma ku difila bwà èkèleeziyà wa États-Unis ne wa makwàbò matunga aci. Mmwenekelu kaayipu's wa wenza bwòwà wa bavùudi bàà bilamba beena bidundadùndà uvwaci. Kàdi mwaba kampànda ngàkamòna mukwàbò ùpàtuka, mubenèshìibwè.

³¹¹ Ndi ndòmba, Taatù, bwà ne pìikala muntu kanà yònsò wa kùdibo mwab'ewu dilòlò edi udi mulongolwela Mwoyi awu, anyì muswè kuCìitaba, bwà ne eci ciikale dîbà dyàcyènzabu. Enzaku nànkù's, Mukalenge. Cibulaku mwoyi wa mabwe mpindyewu, mwoyi wa kale wà buloba awu. Nènkù pìikalàbo bakeba ditalala, mbaswè cintu kampànda cìdi cisankisha mu bulelèlè, cintu kampànda cìdi cifila ditwishiiibwa, swaku bwà kwitababo bulombodi bwà Kilistò dilòlò edi bwà kubalombola ku—ku Ditalala didi dipite luumvu lwònsò, Disànka didi kadiyi kwamba ne dyùle ntènte ne butumbi, anyì cintu kampànda cìdi lufù lwòlò lwine kalùyi mwà kwenzela bibi to. Enzaku nànkù, Taatù.

³¹² Mpindyewu, ne byanza byètù byela muulu, ndi ndikonka. . . Mbangananyi mu nzùbu emu mpindyewu bàdi bafwànyine kwamba ànu ne: “Mêmè nêngiìmanè pàànyì kuulu.” Mpindyewu, udi musòmbè ku luseke lwèbè nànsha yèyè nganyì; Nzambi ngudi wakula neebè awu. Ne wèwè mwine pèebè udi muswè kwikala mwena Kilistò mulelèlè. Nwamònu anyi? Cintu kanà cyònsò necì. . . Ànu cyòcì ciikàle ditentula's; kaa, s'mbipicìibwa ne mêmè mupàtuka ne mutùngùnùka ne kwikala mu maalu à pa buloba. Ndi ngiitabuuja ne mmunùdi bafwànyine kwenza, nwènù pèènù.

³¹³ Mpindyewu, dikenkète ànu wèwè mwine ku Diyì, ku Mukenji. Kenketaayi cìvwa cikèngela bwà mwena Kilistò mulelèlè kwikalaye: mukayabale, wa dinanga, kàyi umwe wa ku bwena Kilistò bwà cyena leelù ebu to. Mòna's, mbunèfuke, butekètàngane, bufwè cipùùka, bubolè, busopakaja. Nwamònu's, kì mbwena Kilistò bulelèlè to; kwikala ne nsòmbelu wa mùshindù kanà wònsò, kadi kwikala wa mu èkèleeziyà. Kwenàku muswè bwobùmwe bushèeme abu ne Kilistò, Nyumà Mwimpè awu, ùdi wèwè. . . dipetangana dyà mwoyi wèbè mwine ne Diyì, uya mutangile kumpàla too ne mu Kilistò anyi?

Pawikala muswè aci, ne ujinga bwà Nzambi àmonè dipàngadika dyèbè dilòòlò edi ànu mu kasumbù kàà bantu aka, bu wèwè ànu mwà kucyenza.

314 Wèwè udi wamba ne: “Aci ncifwànyine kwikala ne mushinga anyi, Mwanèètù Branham?”

315 Kaa, èyowà’s. Cyà bushùwà, cidi ne mushinga. “Wèwè muMfwe bundu kumpàla kwà bantu, Mèmè nènkufrwè bundu kumpàla kwà Taatù Wanyì ne Banjèlo bàà cijila. Kàdi ewu wànjikula Mèmè ne wàngata kaaba Kàànyì mu buloba ebu, Mèmè nèngàngatè kaaba kèndè mu Buloba abu. Nèmmujikùlè kumpàla kwà Taatù Wanyì.”

316 Mpindyewu, nànsha wèwè mwikale nganyì, mukàjì, mulùme, mwànà wa balùme, mwànà wa bakàjì, nànsha mwikale nganyì, mwena Kilistò anyi kuyi mwena Kilistò, mwambi, mulami, cyònsò cyùdi aci, bu wèwè ànu mwà kwitabuuja ne mwoyi wèbè wònsò nkòòng, bwà katanci kakesè cyanàànà, ne kwenza cyòci eci dilòòlò edi ànu bwa kulekela Nzambi umanya ne udi ne meeji matòòke. “Nzambi. . .”

317 “Mpindyewu tàngila, mèmè ndi mwena Mpenta,” mùdi wamba. “Ndi *cikampànda*,” anyi cyònsò cyùdi aci. “Ndi njikula patòòke mùndi nja maja mu Nyumà. Kàdi, Mwanèètù Branham, mvwa ngeela meeji ne bu mutùvwà ne aci, tuvwa baMupetè.” Kanwèna bamupetè to.

318 Nwènu biitabuuje ne mèmè ndi mupròfètà wa Nzambi, nuteeleje Mèyì àànyì. Nwamònu anyi? Aci’s ki diseeswishibwa dyà mu ditùkù edi. Bible kààkambaku ne: “Ncifwànyine kwikala cifwànàngane menemene mu mshindù wà cifwànyine kuseeswisha Basungula bu ne bívwa mwà kwenzeka anyi?” *Basungula* abu, “too ne mu musùkà.”

319 Kàdi wèwè muje maja mu Nyumà, mucikàle ànu ne maalu à pa buloba, s’kùdi cintu cipampàlámuke. Wèwè wakula mu myakulu; Pòlò mmwambe ne: “Ndi mwà kwakula mu myakulu yà bantu ne yà banjèlo, kàdi nciyi ànu musùngidiibwe nànsha.” Uh-huh, mshindù yònsò yìbidi, nwamònu’s. “Mèmè ndi mwà kwenza masaluka ónsò, ndi mwà kwikala ne diitabuuja, ndi mwà kuyiisha Èvànjeeliyò, Ndi mwà kufila bintu byànyì byònsò bwà kudiishabò kapèlè, ndi mwà kutwàla Dìyì mu madimi à bwambi eku ne eku kwà. . . kàdi pàànyì’s mwikale ànu cintu cyanàànà.” Nwamònu anyi? Cidi ne mushinga m’Munda mwà munda amu, mwanèètù. Aci. . . Nyumà Webè ùdi ùnyanguka paùdi ufwa, ùdi ùbuuka, kàdi musùkà wèbè wùdi ne mwoyi. Nwamònu anyi?

320 Mpindyewu uditàngile wèwè mwine. Mu bushùwà bwà bwalu, udi mwena Kilistò mshùwashùwàle wa mu Bible, mùle ntènte ne dinanga dyà Nzambi anyi? Nudi bavùlùke ne, Bible mmwambe, mu matùkù à ndekeelu pìikalà cikondo eci cikumbane, kwambaYè ne: “Mwanjèlo mutu wa citampi wàkapicila mu maèkèleeziyà, kupitaye mu bimenga, ne kutwaye

citampi ànu aba bàvwà bàpuma ne bàdila mwadi bwà cinyangu cìvwà cyenzeka mu cimenga.” Ncyà bushùwà anyi? Yèhezèkèlè 9, tudi bamanye ne aci m’Bulelèlè. Mwanjèlo mutù wa citampi wàkapatuka ne kutwà Cimanyishilu pa mutù wàbo, pa mpàla, kubàtwa citampi: “Aba bàvwà bàpuma ne bàdila.”

³²¹ Paanyimà pàà aci kulwakù banjèlo bashipyanganyi bafumina ku ntengu yinaayi yà buloba, bàkààdi mene pa kulwa, tudi tucimòna cilwa, mvità yènda yiseemena buludi yàshipa buloba bònsò nkòòng. Kakùvwa cintu nànsha cìmwè cìvwàbo kabàyi mwà kulenga to pa kuumusha aba bàvwà ne Cimanyishilu.

³²² Mpindyewu ndeejaaku . . . Mwoyi wèbè ùdi ùtàmba kucyùkà bwalu bwà bangènzàmpèèkààtù, ne mùshindù ùdi èkèleeziyà ne bantu benza maalù, mu mùshindù ùdi mwà kupuma ne kudila bwà bwalu abu muunya ne bufùku anyi? Kabìyi nànkù to, ndi ndikonka. Ki Mifùndu nyòyi ayi.

³²³ Udiku mwà kujuukila ànu kuulu cyanàànà ne kwamba ne: “Nzambi munanga, ncyèna ngìlmane kuulu ne bwalu Mwanèètù Branham ngudi mwambe nànkù to, kàdi ndi muumvwa Dìyi Dyèndè dyàmba *nànkù*, nènku ndi ngenza *nùnkù*. Kùdi Wèwè, Mukalenge, nkùndi ngìlmane. Ndi ne dijinga, Mukalenge. Udiku mwà kuswa bwà kukumbaja dyànyì dijinga dilòlò edi mwaba ewu anyi? Nyewu ndi mwimane.” Nzambi àkubènèshè. Nzambi àkubènèshè. “Ndi ne dijinga, ndi muswè bwà Wèwè kwikala naanyi luse.” Nzambi àkubènèshè. “Ndi muswe kwikala mwena Kilisto wa mùshindù wà. . .”

³²⁴ Mpindyewu, vùlukààyi ne, muntu udi mwimane ku luseke lwèbè awu udi cintu cìmwècìmwè cyùdi aci. Ndi muswè bwà wòlòlè ànu cyanza cyanàànà ne ùmukwàte ku cyanza, wamba ne: “Mwanèètù wa balùme, mwanèètù wa bakàji, nsambidilèku mpindyewu. Ndi muswè unsambidilèku. Ndi—ndi. . .” Amba ànu nànkù ne meeji matòòke ònsò a bwena Kilistò ne: “Nsambidilèku. Nè. . . Ndi—ndi—ndi muswè kwikala mu bulongame ne Nzambi. Nwànsambidilaayikù, nènsambilè bwà Nzambi ànùpèèshe mpùnga awu.”

³²⁵ Ndi—ndi mumanye ne tudi. . . Katwèna mwà kushààla mwaba ewu ntàntà mupitèpite bule to; nudi numòna aci’s. Tukààdi—tukààdi ku cikondo cyà nshùikidilu. Bònsò badi biitabuuja aci, ambaayi ne: “Amen.” [Disangisha didi dyàmba ne: “Amen!”—Muf.] Tudi. . . Kakùcyèna cintu nànsha cìmwè cìdi cishààle to. Byònsò bikaadi biye. Èkèleeziyà yìdi mu njila mitàngile ku nsangilu wa Bukwàntèndeleelelu. Bàà pa buloba, s’cidi. . .

³²⁶ Tàngilààyi kuneeku! Nudi bamanye cìdi Mukalenge wamba bwà Los Angeles ne myaba eyi anyi? “Kwèndè nkumanè kujika!” Nudi bavùluke cìngānwāmbidi, kukaadi bidimu bitwè ku bìbidi, muvwa dizakala dyà buloba adi mwà kulwa mu Canada emu, mu

Alaska? Ndi kàbìdì nnwambila ne “Hollywood ne Los Angeles bidi bisenunuka bitàngile mu mbù. Californie, wêwè udi mwena kabùtù! Kî ng’ànù Californie to; kàdi nwênù, bàà pa buloba, nudi beena kabùtù! Èkèleeziyà, ànu baditèèke mu bulongame ne Nzambì, cyanaànà nudi beena kabùtù!” EMU MMÙDÌ NYUMÀ MWÌMPÈ WÀMBA!

³²⁷ Nukaadiku bangumvwe mutèèle Dìnà adi kabìyi byenzeke anyi? Ndi nnùkonka! Nukaadi bammanye kukaadi bidimu makumi àbìdì. Kacyakacya nkaadiku munwàmbìle cintu kampànda mu Dìnà dyà Mukalenge cìdì kaciya cyenzeke anyi? Pikalàbi ne byònsò bínkaadiku munwàmbìle ne nebyènzèka, mbyènzèka, ambaayi “Amen.” [Disangisha didi dyàmba ne: “Amen!”—Muf.] Nwamònu anyi? Nyawu nnwambila, mpindyewu ki dībà ndyòdi edi, bìkèngela udilongolole, twètù bònsò.

Mpindyewu muntu ne muntu tusambidilàayi mukwètù:

³²⁸ Nzambì munanga, patùdì biimane mwab’ewu dilòlò edi apa, cisàmbà ciikale cipùnga ne lufù, mpalà yètù mmitangija ku buloba, ku lupwishi. Tudi ànu . . . Wêwè udi mutùpe diyishi dyà ditapa edi, Mukalenge. Tudi tumòna cileejilu cyà bantu bàbìdì. Umwe wa kudibo, mwikale mutèndeleeedi, uya mu èkèleeziyà kàdi kubengaye bulombodi bwà Mwoyi wà Cyendèlèlè. Ne mukwàbò wàkabenga luumu lwà pa buloba ne *kutàngila* ku Mwoyi wà Cyendèlèlè. Ne tudi tumòna ngikàdìlù yàbo bònsò bàbìdì dilòlò edi, bilondeshile Bible: muntu mubanjì ùdi mu dikengeshiibwa, ne Mòsà ùdi mu Butùmbi.

³²⁹ Taatù, tudi baswè kwikala bu Mòsà. Tudi baswè kulombodiibwa kùdì Mwàn’Èbè wa Cijila, Yesù Kilistò, ku Mwoyi wà Cyendèlèlè. Ùfilèku mu myoyi yètù dilòlò edi, Mukalenge. Paasùla mwoyi wètù wa kale wà dibwe awu; tèèka munda mwètù mwoyi mupyamùpyà awu, mwoyi wà musunya, mwoyi Ùdi mwà kwakula naawu ne kukwàta naawu mudimu, nènku katwakwikala ne dyambu anyi didyombola to. Swaku bwà Nyumà Mwìmpè kuumukiku to, Mukalenge. Swaku bwà Yèyè àlwe ne ajidile bantu aba mu mudimu. Akulaku naabo; paasùla budiswile bwàbò bwà mabwe abo, ne tèèkamù diswa dyà Nzambì. Sungila muntu ne muntu, Taatù. Tupèeshèku dinanga Dyèbè. Mukalenge, tufikishèku ku mwaba kampànda, bwà twamònaku mwà kutapuluka ne citùpà cyà—cyà disaluka aci, kuya ku luseke menemene lwà citùpà cyà njiya . . . citùpà cyà cyumvwika mu mwoyi, ndòndò wa Nyumà, mabanjì à Nzambì, Bukalenge bwà Nyumà mu myoyi yètù. Enzaku nànkù, Éyì Mulombodi Munène, Nyumà Mwìmpè munène, kumpàla kwà Wèwè kubuuka kuya mu maulu ne Èkèleeziyà Webè.

³³⁰ Éyì Nzambì wa yààya, ndekeleku nye, Mukalenge. Kunshiyiku paanyimà to, Yesù. Ndekeleku nye Neebè, Taatù. Ncyèna muswè kushààla pànu pa buloba ebu bwà kutàngila

makengeshiibwa alwàlwa aa to. Ncyèna muswè kushààla mwab'ewu mu katombòtombò aka to. Ncyèna muswè kwimana mwab'ewu pìikala bintu byà bikwacisha bwôwà... bantu bajimija lungenyi. Tudi tutangila bantu bateeta kwenza maalu bu nyama ne bafwànangana ne nyama; ne bakàji bateeta kufwànangana ne nyama, ne bilaabu kwisù. Mumanye ne bintu ebi mbidyanjila kwamba ne nebyènzekè, ne cintu neciikale, ne bawwijiibwe batombòkè mu mûshindù wà ne mpasu neyijuuke miikale ne nsuki bu bakàji bwà kuyoobesha bakàji; ne mènù bu nyama yà ntambwe, ne bintu by'Ûdì mwambe, ngiikadilu wa mu mitù yà bantu neikale mwatuke. Tudi tucimòna mu didyènza mpindyewu mene, Mukalenge. Tukwacisheku! Twalujululeku ku meeji makàne à Kilistò Yesù Mukalenge wetù.

331 Éyi Mulombodi Munène wa Mwoyi wà Cyendèlèlèlè, tudi twitaba mulayi Wèbè dilòlò edi, Taatù. Ndi ngakwila cisambà eci. Ndi ngakwila muntu ne muntu wa kùdibo, mu Dinà dyà Yesù Kilistò, Mukalenge. Ndi ndòmba bwà Kilistò Mwànà wa Nzambi abweleku mu myoyi yà umwe ne umwe wa kutùdì, Mukalenge, ne àtufwimbeku ne àtuvwije bifùkiibwa bipyabipyà mu Yesù Kilistò. Enzaku nànkù, Mukalenge Nzambi.

332 Tudi baKunangè. Nènku tudi baswè bwà bilunji byètù... dishintuluka dyètù dibweleku munda mwètù, bwà twamònakù mwà kwikala bânà Bèèbè, biikale tumvwa Nyumà Wèbè ùkwàta mudimu munda mwà myoyi yètù, Mukalenge, utuvwija banefùke ne utufikisha ku dijungulula dyà cikondo cyà katombòtombò citùdimu ne mwoyi eci. Enzaku nànkù, Nzambi. Patùdi tumòna bakàji batekete bakwaciibwe mu butatande bwà dyabùlù, nsongààlùme, ne meeji manyanguke, bânà, bakwaciki baa bintu byà lulengu, bânwa mfwankà, bânwa maalà, benda masandi, Edena wa Sàtaanà.

333 Nzambi, s'byàkaKwangata bidimu binunu bisambòmbò, bilondeshile Bible, bwà kwibaka Edena. Nènku Wèwè kutèeka mwân'Èbè wa balùme ne mukàjèndè muntwamu (mukàjèndè-musèla), bwà kumukookeshaye. Ki Sataana kuseemenaye pabwipi apu ne kucinyangakajaye; pèndè's ukaadi ne bidimu binunu bisambòmbò, ne ùkaadi mwibàka wendè Edena sungasunga wa mamanya à mu mutù ku maalu à mamanya, ne dilonga dyà tùlaasà, ne lungenyi lwà ku dînà alu, kadi mumwibake mu cimvundu cyà lufù's.

334 Éyi Nzambi wa yààya, twàlujàku cyàkàbidi mu Edena, Mukalenge, mùdi kamùyì lufù, mùdi kamùyì tunyinganyinga nànsha. Enzaku nànkù, Mukalenge. Tudi biimane ne kudipwekesha kwònsò, bindile bwà Adàmà mwibidi kulwaye bwà Mukàj'Èndè-musèla. Tuvwijeku citupà Cyèndè, Taatù. Tudi tulòmba mu Dinà dyà Yesù. Amen.

335 Nudi banange Nzambi anyi? Nudiku mwà kuumvwa... Nudiku nujingulula cindi nteeta kunwambila aci anyi? Bu nwènù

mwà kuumvwa, elàayi ànu byanza byènu muulu cyanaàna, nwamba ne: “Ndi ngumvwa cyúdi uteeta kwamba aci.” Nudiku mwà kumòna katombòtombò kàà cikondo eci anyi? Tàngilàayi mùdici ciye, kakwena nànsha mene dyela dyà lungenyi lwakàne munkaci mwà bantu to. Nkujike! Nkwepi kùdi wetù...? Ne balombodi mene’s.

³³⁶ Tàngilàayi Mfùmù wetù wa ditunga! “Bòbò baswè Communisme, balekèlaayi nendè. Cyònsò cidi bantu baswè aci, balekèlaayi naaci.” Baa Patrick Henry bèètù bàdi kwepi, ne baa George Washington bèètù? Balombodi bèètù bàdi mwà kwimanyina diyi dikulu bàdi penyi? Katúcýena naabo kàbìdi to.

³³⁷ Èkèleeziyà yètù yidi penyi, bambi bèètù abù? Nebàbweje bantu ànu ku dipungishangana, anyi babwelamu, bàkashààla bà mu èkèleeziyà ne benza *cikampànda* anyi kwikala ne kaadisaluka kakesè anyi cintu kampànda. Balùme bàà Nzambi abu bèpi, baprófètà abu bàvwà biimanakana ne bukitù bwà kunyangakaja, anyi kwela bintu byònsò byà pa buloba kadyòmbò?

³³⁸ Bantu bàà maalu majalame abu bèpi? Bàdi kunyi’s? Mbatàmbe kwikala batekètàngane, ne ku mmwenenu yà mamanya a mu mitù ne bikwàbò, mu mùshindù wà kabàciyiku pànwaapa kàbìdi to. Éyi Nzambi wa yààya, ikalaku neetù luse’s.

³³⁹ Bintu bìdi byenza bwôwà bìlwalwà pa buloba ebi. Nudi mwà kumòna mùdi bantu munkaci mwà kubwelamù buludi. Nkatombòtombò’s. Kàdi pàdi ànu cintu aci cyenzeka, Èkèleeziyà neikalè mumane kuya.

³⁴⁰ Nzambi, enzaku bwà twikalèmu. Ki disambila dyànyì ndyôdi adi kùdi Kampànda Mutàmbe-mfukilu udi mu nzùbu emu dilòòlò edi, Kilistò munène ucidi ànu ne Mwoyi wà Cyendèlèlè awu. Ndi nKulòmba, Kilistò, bu mündi mwab’ewu ne mèsù mabuulula, mutàngile èkèleeziyà Ûdi mupikule ne Mashì Èbè. Nzambi, muntu nànsha umwe wa kutùdi kàjìminyikù to. Tudi baswè kwikala ànu Neebè. Pa nànkù tùkezùlèku, Éyi, Mukalenge, ku mibi yètù yònsò. Umushaku mpèkaatù yètù ne bikwàbò.

³⁴¹ Tudi baKumòne wòndopa babèèdi bèètù, ubiisha mene ne bafwè bèètù (bàalukila ku mwoyi ku disambila), ne tudi bamòne bintu byònsò ebi byènzeka, Taatù. Mpindyewu twalujaku *twètù* aba ku Mwoyi, mu nyumà; tutingaje cyàkàbìdi mu dimanya dyà Mwoyi wà Cyendèlèlè kupicila ku Kilistò Yesù. Enzaku nùnkù, Taatù. Ndi ndambula byònsò Kùdi. Mu Dìna dyà Yesù Kilistò.

Too ne patwàsangila! too ne patwàsangila!
 Too ne patwàsangila ku makàsà à Yesù;
 Too ne patwàsangila!

Tàngilàayi kudìYe. Atuvwijeku bapole polàà.

...twàsangila!
 Nzambi ikale neenù too ne patwàsangila
 cyàkàbìdì!

³⁴² Twělààyi byanza byètù muulu mpindyewu:

Too ne patwàsangila! too ne patwàsangila!

Mwanèètù Salano, yônsò udi ulonda awu. [Muntu kampànda
 udi wàmba ne: “Cintu cikiwàbò kanà cyônsò anyi?”—Muf.] To.
 Nzambi àkubènèshè.



KULOMBODIIBWA LUA65-1207

(Leadership)

Diyyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diibidi dilòòlò, dya matùkù 7 à ngondo wa ciswà-munènè, cidimu cyà 1965, bwà didya dinènè dya mikùkùku dya Bwobùmwe bwà Buloba bujima bwà Beena Kantu-ku-Byanza bàà Èvànjeeliyò mu Kaabujima ku Covina Bowl mu Covina, mu Californie, U.S.A. Ndyumusha pa mukaba wa mēyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwîlà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org